

## Mateo Jesushuunoa Cununi

---

### Jesucristo ahuun shunifo

*Lc 3.23-38*

- 1** <sup>1</sup>Un mato Jesucristohuunoa tsain shara tapimai. Ahuun shunifoan aton anufo un mato yoiqui tau huai. Ahuun shuni David yafi Abraham.
- <sup>2</sup> Abraham facu Isaac ini.  
Isaac facu Jacob ini.  
Jacob facu Judá yafi ahuun yorafo ini.
- <sup>3</sup> Judápan facu Fares yafi Zara ini.  
Aton ahuari Tamar ini.  
Fares facu Esrom ini.  
Esrom facu Aram ini.
- <sup>4</sup> Aram facu Aminadab ini.  
Aminadab facu Naasón ini.  
Naasón facu Salmón ini.
- <sup>5</sup> Salmón facu Booz ini. Ahuun ahuari Rahab ini.  
Boozpan facu Obed ini. Ahuun ahuari Rut.  
Obed facu Isaí ini.
- <sup>6</sup> Isaí facu David ini. Nan David Israelifoan aton niaifocoin ipaoni.  
David facu Salomón ini. Salomón ahuafin Uriaspan ahuin ipaoniquin.
- <sup>7</sup> Salomón facu Roboam ini.  
Roboam facu Abías ini.  
Abías facu Asa ini.
- <sup>8</sup> Asa facu Josafat ini.  
Josafat facu Joram ini.  
Joram facu Uzías ini.
- <sup>9</sup> Uzías facu Jotam ini.

- Jotam facu Acaz ini.  
Acaz facu Ezequías ini.
- <sup>10</sup> Ezequías facu Manasés ini.  
Manasés facu Amón ini.  
Amón facu Josías ini.
- <sup>11</sup> Josías facu Jeconías yafi ahuun yorafo ini.  
Nantianri Babilonia anoa niaifoan ahuun ranushumuafó nichini Israelifo rutushon atirifi ahuun mai ano ihuushonafoanno ahuun oinmatifo huanon. <sup>12</sup>Chipofin Babilonia anoashu futsafori cainni.  
Jeconías facu Salatiel ini.  
Salatiel facu Zorobabel ini.
- <sup>13</sup> Zorobabel facu Abiud ini.  
Abiud facu Eliaquim ini.  
Eliaquim facu Azor ini.
- <sup>14</sup> Azor facu Sadoc ini.  
Sadoc facu Aquim ini.  
Aquim facu Eliud ini.
- <sup>15</sup> Eliud facu Eleazar ini.  
Eleazar facu Matán ini.  
Matán facu Jacob ini.
- <sup>16</sup> Jacob facu José ini.  
José ahuin María nan Jesús ahua ini.  
Jesús Upa Diosin catonni nocon Numamisi inon. Nan non Cristoran huamisi. <sup>17</sup>Abraham ahuun funafo catorce ahuun unutani David ini.  
David ahuun funafori catorce ahuun unutani Babilonia anoshon ato achinifo ato mai ano inonfo. Nanfoan ahuun funafori catorce ahuun unutani Cristo cainni.

**Jesús cainni***Lc 2.1-7*

<sup>18</sup>Jesucristo cainfin iscaniquin. José María yoini, —Non fiananon, —ishon. Ascafia fiananfotaima María man facu nanua ini. José ayamafian Diosin Yoshin Sharapan nanumana. <sup>19</sup>Ascashon José Dios tanasharacoinshon ahuun chain ahuun rafini huacasmaquin yorafoan ointaifi yoicasmáni. <sup>20</sup>Nanscara ahuun nomuranshon shinanfiaino ahuun namapan Diosin ahuun oinmatinin afu nai muran imisi aqui oshon yoiquin isca huani, —José minfin David funaquin. Ascacun shinanchacaquima María fihuu. Nan facu nanuafin Diosin Yoshin Sharapan nanumanaquin. <sup>21</sup>Ascan nan caianofin anuqui Jesusran min huashquicain. Nantonmain ahuun yorafo chaca soashofain ato numashquiamaiton, —ishon yoini. <sup>22</sup>Diosinhuunshon inon pacoai yoimisi foan cununifo cuscan man aaquin. <sup>23</sup>Nanfoan cunuquin isca huani, “Nicapon. Ainfo funuoma tsoa afu iyamafiamisi facu nanushquin. Caianno furonanfacu iishquin. Ahuun anufin Emanuel (Onicoinnin tsainman Diosin nofu icaran) ishquiquin,”

ishon Dioshuunshon inon pacoai yoimisi cununi.

<sup>24</sup>Ascaino José moinacahuatan nan Diosin oinmatinin afu nai muran imisi yoia cuscan María fiini. <sup>25</sup>Fiifiashocai afu ipaonima furun caiyain chain. Ascashu furun caincun José anuqui Jesusran huani.

**Nocofunu tapicoianfo fari oaiquirinoashu Jesús oinpai funifo**

**2** <sup>1</sup>Ascano Herodes niaifoaitian Jesús Belén anoashu cainni. Nan Belén Judea muran ini. Nantianri

fishifohuunoa tapicoianfo fari oaiquirinoashu fucani Jerusalén ano noconifo. <sup>2</sup>Ascano nococashon ato yocanifo, —Raniashumun a facu caianquin Judiofoan aton niaifo ishquiai. Non fishi oianhuunshon non tapia facu caincun. Man nonfin ahuun fishi fari oai aria oianquin. Ascacufin non aqui unimai oaquin. Min nocon niaiforan ishon oinpai non oaran, —ishon ato yocanifo.

<sup>3</sup>Ascaifoan nicai Herodes ahuun ointi fucashriscatani. Jerusalén anoa yoraforifi Herodes icai cuscan arifi muunifo. <sup>4</sup>Ascacun ahuun yorafohuunshon Diosin cufimisifoan niaifofo yafi Moisés cununi cuscan tapimamisifo Herodes ato yoimaquin isca huani, —Uqui fucahuun, —ishon ato yoimanano aqui fuaifoan ato yocaquin —¿Raniashumun Cristo cainshquiquin? —ishon Herodes ato yocani. <sup>5</sup>Ascaiton cumacaquin, —Belén Judea murannoashu cainshquin, —nannori Diosinhuunshon inon pacoai yoimisi foan cunuquin isca huani.

<sup>6</sup> “Belén anoafoan ua nicasharacahuun. Maton mai Judea muran. Maton pushu ichapayamafiano nannoashu niaifo uhuapacoin cainshquin. Uhuun yora Israelifoan aton cushumisi iishquiran,”

icashu cununi.

<sup>7</sup>Ascacun Herodes a fishifohuunoa tapicoianfo tsoa yoitama tsain ato fomaquin isca huani, —Fucahuun. Un matofu tsainon, —ishon ato yoimani. Ascano nocotoshiaifoan ato yocaquin, —¿Ahuutianmun man fishi oinquin tau huaquin? —ishon ato yocaiton. Tapimanifo ahuutianmain oinqu tau huafoquin. <sup>8</sup>Ascashon aton yoini, —Belén ano focashon facu funatacahuun. Fuchicashon nasofuratan

ua yoi fuushcaquin. Urifi un ahuun noicanon, —ishon Herodes ato yoini.

<sup>9-10</sup>Ascano niaifoan ato yonoa cuscan nicatan fishifohuunoa tapicoianfo fonifo. Focaquin oianfo fishi fari oaiquirinoashu oaiton oincani unimacoinnifo. Ascatan muufocaquin oianfo facu raca manaon nituni.

<sup>11</sup>Ascaiton oincani pushu muran iquifainshon facu yafi ahua María fuchinifo. Ascashon ratoconun mai chachishon facu yoinifo isca huaquin, —Minfin fasi sharashatocoinquin. Min nocon Ifo, —ishon yoinifo. Ascacatan aton mao fupucashon ahua chicao inancoinnifo. Oro inanfain ahuun ininti shara inanfain ininti sharacapa futsa ahuun anu mirra nanri inannifo.

<sup>12</sup>Ascashu nanno oshayofoan aton namapan Diosin ato yoiquin isca huani, —Afanan Herodes ari foyamacahuun. Fai futsan mato mai ari fotocahuun, —ishon Diosin ato yoini. Ascacuai Jerusalén ano fonifoma.

**José futan María furun Belén anoshon Egipto ano ichoquinifo**

<sup>13</sup>Man fishihuunoa tapicoianfo atomaquinoashu foafono Diospan oinmatinin afu nai muran imisi José ahuun namapan yoiquin isca huani, —Funinaca huahuun. Nan facu yafi ahua Egipto ano iyorisatahuun. Ascashu nanri iyohuu nan un mia afanan yoiaitian. Nan Herodes facu funaiqui rutushquin, —ishon Diospan oinmatinin José yoini. <sup>14</sup>Asca huaino moinachuatán facu ahua futan yamu Egipto ano ichoquinifo. <sup>15</sup>Ascashu nanno iyopaonifo nan Herodes naitian. Ascacun Diosihuunshon inonpacoai yoimisiton cunushoni isca huaquin, “Unfin uhuun facu Egipto anoa afanan yoimanicain,” ishon yoini cuscacoin man aquin.

**Herodes ahuun ranushumuafu yononi facumishtifo rutunonfo**

<sup>16</sup>Ascano fishihuunoa tapicoianfo fai futsan foafu nicai, —Ua paraforan, —icashu Herodes fasi sinacoinni. Nan fishifohuunoa tapicoianfoan yoiafo man fari rafu caano fishi oinquin tau huafo. Ascacun Herodes ranushumuafu yononi, —Belén anoafu yafi a chaima icafoan aton furonanfacufo fari rafu yafu non yomumishti rutuqui cuyotacahuun, —ishon ato yononi. <sup>17-18</sup>Ascano

“Ato nicafo Ramá anoashu uaicani aton facuhuunoashu uaiyanan shorarascaifoan nicacaquin. Aton ointi main huamapaicaquin, ‘Uaiyamacahuun,’ ato huafiainfono aton facu manocani unupainifomaran,”

ishon Jeremías Diosihuunshon inonpacoai yoishomisiton cununi cuscacoin man aaqi.

<sup>19</sup>Ascashu man Herodes naano Diosin oinmatinin afu nai muran icaton José ahuun namapan yoiqui isca huani, <sup>20</sup>—Moinacahuahuu. Facu yafi ahua afanan Israelifo muran ato nasoquishquin. A facu rutupaimisifo man naafoquin, —huani. <sup>21</sup>Ascaino moinachahuatan José ahua yafi furun Israeli mai ano afanan ato iyoni. <sup>22</sup>Caaquin nica Herodes man naano ahuun facu Arquelao Judea murannoa niaifo nicai José musuni. Ascaiton Diosin oinmati afu nai muran imisiton afanan ahuun namapan yoini, —Judea muran caquima futsanori catahuun, —huani. Ascano Judea muran catama Galilea anori fonifo. <sup>23</sup>Ascashu Nazaret pushurasi muran fonifo. Diosihuunshon inon pacoai yoimisiton nannori cunuquin isca huani, “Cristofin Nazarenon ishquiquin,” ishon cununi.

**Nan ato unu muran iquimamisi Juan tsoa istaipama ano ipaoni**

*Mr 1.1-8; Lc 3.1-9, 15-17; Jn 1.19-28*

**3** <sup>1</sup>Ascatan man fari ichapa finoanno nan Juan yorafo unu muran iquimamisi tsoa istaipama Judea ano cani. <sup>2</sup>Ascano nannoshon ato yoiquin isca huani, —Nantifi yorafoan ua nicacahuun. Maton chaca shatucoincashion Diosin tsain nicacoincahuun. Samamashta Diosin mato yonoshqui oiquin, —ishon Juanpan oi ashcafinin ato yoini.

<sup>3</sup>Nan Isaías Diosihuunshon inon pacoai cuscan yoimisi ipaoni. Nanton Juanhuunoa yoini isca huaquin, “Tsoan istaipamashon Diosin yonoa cuscan oi ashcafinin yoiquin isca huanonpacoín, ‘Nocon Ifo nocoqui ooshquin. Ascacun itisharacahuun. Maton chaca shatucoincahuun,’” ishon Isaías Juanhuunoa cununi.

<sup>4</sup>Ascano camello inapan ahuun rani sahuuti huashon Juanpan sahuua ini. Ascashion yoina fichin aqui nanushumuni. Ascatan ocutsuru pifain afuchi fona ayani. <sup>5</sup>Ascano Jerusalén anoafo yafi unu Jordán ano icafo non Judea muran icafori ahuun tsain nicapaicani aqui funifo. <sup>6</sup>Ascashion aton chaca shatupaicaquin yoiaifoa Juanpan unu Jordán muran ato iquimapacuni afanan ipaoni cuscan huatama ismanonfo.

<sup>7</sup>Ascaino Fariseofo yafi Saduceofo Juanqui funifo yorafo ato unu muran iquimanaiton oin fucani. Nanfori Israelifo ini. Ascaiton oinquin Juanpan ato yoini isca huaquin, —Manfin rono paupaton facu cuscaracoinfoquin. Icoinra huayamaifoa Diosin atoqui sinaquin ato omitsiscapanonfo. Ascan manfin omitsiscapanacafo muran focasmafiaqui maton chaca man shatupaima. <sup>8</sup>Ascacun chaca shatucoincashion Diosin mato yoia

cuscan nicacoincahuun. Man ipaoni cuscari afanan ayamacahuun. Man ascaiton yorafoan ointirofo man afanan chaca huapaitama Dios fusti man tanasharaiton.

<sup>9</sup>Ascashion maton nomuran shinanquin isca huayamacahuun, “Nonfin Abraham funafo non ahuun caiforiquin. Diosin Abraham yoyiotiani cuscan nocorifi ashotiro. Ascan Diosin noco onaintimashquimaran,” ishon anori shinanyamacahuun. Diosin onihuapaiquifin na unu cusumunnoa toquirifo Abraham ahuun funafo oni huatiroquin. <sup>10</sup>Fana fimi sharayamaiton ifoan ahuun tapo nantifi ruratinin shatuquin cuyoshon chi muran potatiro coi futsunon. Nanscarifiai natianri Diosin man itishara chaca shatutama man isharayamacaiyaiton mato omitsiscamapacushquin.

<sup>11</sup>Ascacun un mato unu muran iquimapacua maton chaca shatucoinshon natian Diosin tanasharashon man ismanon. Ascafia futsa matoqui chipo oi. Naantofin ua fasi finoncoianquin. Ahuamamishti huatiro. Nantorifi ahuun Yoshin Shara mato ya rafumapacunaca. Ascano ahuunshon maton nomuran man shinansharanon. Matofu rafuano nantifi ahuaara chacafo ahuunshon shatuuashu a cuscara shara man inon. Ascan uncai a cuscarama. Un ahuaara shara huahuu rafanancai un ahuun oinmatima. Ascata uhuun ramapaiyamainoricai un ahuun oinmاتي icuanama. <sup>12</sup>Ascano naantorifi chipo a icoinra huafo yafi a nicacasmaifo ato pashcanan huaashquin. Nan icoinra huafosi a icari ato ihuicoinshquin afu isharapacushanonfo. Ascan nan nicacasmamisifo chi urumanhuan muran ato potai anoashu omitsiscaí unupacunacafomaran, —ishon Juanpan nan Fariseofo yafi Saduceofo yoini.

**Jesús unu muran iquimani**

*Mr 1.9-11; Lc 3.21-22*

<sup>13</sup>Ascaino Jesús Galilea anoashu unu Jordán ano cani. Nan Juanpan ato unu muran iquimana nanno cani naanrifi iquimanon. <sup>14</sup>Ascashu aqui nocoaiton Juanpan Jesús yoini, —Uacaiarocon mian acafin shara icuanaquin, —huaiton. <sup>15</sup>Jesús cumani, —Upa Diosin noco yonoa cuscan fusti nantifi non aca shara itiro. Ascan natian ua iquimahuu, —huaiton. —Ascan min ua yoiái cuscan un mia unu muran iquimairan, —ishon Juanpan yoini. <sup>16</sup>Asca huatan Jesús unu muran iquimana cainna cahuan mapuiniñoanni. Ascatapaiyaino Dios ica ariashu nai fupuini. Nai fupuicaino Diospan Yoshin Shara ruhui cuscara Jesusqui fotopacu cahuani. <sup>17</sup>Ascano nanno niafoan nai murannoa Upa Diosin ahuun oi nicanifo yoiquin isca huaiton, —Nan uhuun Facu un catoan. Un fasi ahuun noi. Un fasi aqui unimacoinran, —ishon Apa Diosin yoini.

**Yoshin chacanun Jesús chaca huamapaini**

*Mr 1.12-13; Lc 4.1-13*

**4** <sup>1</sup>Ascano Jesús Diosin Yoshin Sharapan tsoa istaipama ano iyoni. Nannoshon nan yoshin chaca Satanás cuarenta oshatan chaca huamapaifafainni. <sup>2</sup>Nan cuarenta oshatan piqui tununi. Ascashu fasi fonaincoinni. <sup>3</sup>Ascaino nan yora chaca huamapaimisi aqui nocoshon yoini isca huaquin, —Min Diospan facumainquin na toquirifo misi onihuhuu, —ishon Satanás yoiáiton. <sup>4</sup>Jesús cumani, —Noncai misi fustihuunoashu ipatiroma. Diosin tsain fusti non yopacoin. Nan noco yoiá cuscan fustihuunoashu non isharatiroquin, —huaiton.

<sup>5</sup>Nicaquin Satanás Jesús Jerusalén pushurasi shara Diosin ahuun yorafofu

imisi ano iyoni. Nan Israeliffoan aton Diosfu tsainti pushu pumancaya cuyacoin iyoshon yoiquin, <sup>6</sup>—Minmain Diospan facuquin nuríashu pacucaintahuun. Diosin tsain mihuunoa cununi isca huaquin,

“Diosifin ahuun oinmatifo afu nai muran icafo yonoiquin min pacuaiton mia cushunonfo. Min tauri toquirifoquin rutunonma mia achinonfo,”

nannorifi Diosin tsain mihuunoa cununiquin, —ishon Satanás yoiáiton.

<sup>7</sup>Afanan Jesús cumani, —Ascafia Diospan tsain cununiri isca huaquin, Ahuara musunicoin huaquin shinanyamacahuun uatsi Diosin cushuiquin ishon. Ascacun asca huayamahuu ishon cununiran, —Jesús huani.

<sup>8</sup>Ascáiton afanan Satanás Jesús machi cuyamamaquin iyoshon nan manifoti sharashtacoin oinmani. <sup>9</sup>Ascashon yoini, —Oinpon Mian ratoconun mai chachishon ua yoiquin, “Minfin uhuun Ifoquin,” mian huaitofin nan na maitio un mia inantiroquin, —ishon yoiáiton.

<sup>10</sup>Afanan Jesús cumaqui, —Diospan tsain cununiri “Nan nocon Ifo Diosin fustifin non ratoconun mai chachishotiroquin. Nan fustimain nocon Ifocun,” ishon cununi. Ascan umaquinoashu cariscatahuun Satanás, —ishon Jesús yoini.

<sup>11</sup>Asca huaino Satanás Jesusmaquinoashu caino Diosin ahuun oinmatifo afu nai muran icafo aqui fotonifo pimashcaquin.

**Jesús Galilea anoshon ato tapimaquin tau huani**

*Mr 1.14-15; Lc 4.14-15*

<sup>12</sup>Ascashu nan Juan ranushumuafon cunu muran iquimanafo nicatan Jesús Galilea ano nasoni. <sup>13</sup>Nan Nazaret

anoashu pushconi. Nannoashu Capernaum ano cani atofu iyoicai. Nan Galilea ian cusumunri Capernaum ini. Nannori mani rafutan ato mai Zabulonfo yafi Neftalifo icafo. <sup>14-16</sup>Jesús nanno inon pacoai cuscan nan Isaías inon pacoai yoimisiton ahuunooa cunuquin isca huani,

“Zabulonfo yafi Neftalifo Galilea ian ano icafo. Nanno aton mai. Unu Jordán ocuma futsa. Nannori Dios icoinra huamafo atofu icafo. Ascashu nanfo faquish muran ica shinantsafo. Ascafia samamashta oianfo shafariscatani cafiscashqui. Nanscarifiai numamisimaisi omitsiscapanacafo muran focuanafo. Ascacun Cristo atoqui nocorisca ato numashquiran,”

icashu atohuunooa cununi.

<sup>17</sup>Nannoshon Jesús ato yosiquin tau huaquin isca huani, —Nocon Ifo Diosin matoqui samamashta nocoyoi. Ascacun maton chaca shatucahuun. Chaca huatamarocon Diosin tsain nicacoincahuun, —ishon Jesús ato yoini.

**Jesús rafu non rafuri nushumisifo ato cunani afu fononfo**

*Mr 1.16-20; Lc 5.1-11*

<sup>18</sup>Ascano ato yoitán Jesús ianmanhuan cusumun cani. Caquin Simón chipocu Andrés futan nushutinin nushuaifoan ato ointoshini. Nan Simón ahuun anu futsa Pedro. Nan rafutafin nushumiscoin inifoquin. <sup>19</sup>Ascaiton ato yoiquin, —Ufu fucahuun. Manfin nushumiscoinquin. Man shiman ichaparasi nushutinin fia cuscan natian man uqui yora ichapa ihuushqui un aton Ifo inon, —ishon Jesús ato yoini.

<sup>20</sup>Ascaino nushuti huafaicani afu fonifo.

<sup>21</sup>Ascashu chaimashta catan Zebedeo facu rafuri fuchini. Nan rafuri nanu rafu

Santiago yafi Juan. Nan rafutan apa futan shasho naquishon nushuti icushaifoan atori yoini, —Ufu fucahuun, —ato huaino. <sup>22</sup>Samamashta apa shasho naquí nichifainifocani afu fonifo.

**Jesús yorahuanrasi ato yosini**

*Lc 6.17-19*

<sup>23</sup>Ascatan afu foafoanno nantishon Galilea ano cahuancacaiquin. Judiofoan ichananti pushu muranshon Jesús ato Apa Diosin tsain shara yoiquin isca huafoanfafaini, —Itisharacahuun. Upa Diosin mato iquishquin oiran, —ishon ato yoifoafafaini. Ascashon pau futsa futsatapaofoan icaifoan ato caya huamani. <sup>24</sup>Ascaiton Siria mai anoafoanri ahuunooa nicacashon isinincaifo aqui ihuunifo ato cayahuamapacunon. Ascashon isipaunun icaiton caya huamafain yoshin chaca atomaquinoa potafain nisofori caya huamafain yoratisho charishi futsuari caya huamapaoni. Nantifi ato caya huamapacuni. <sup>25</sup>Ascaiton yorafoan mufainifo. Atirifi Galilea anoashu fuaino atirifi Decápolis anoashu fuaino atirifi Jerusalén anoashu fuaino atirifi Judea anoashu fuaino atirifiri unu Jordán oquirinoashu fucatan Jesús mufainifo.

**Jesús machi anoshon ato yosini**

*Lc 6.20-23*

**5** <sup>1-2</sup>Yorahuanrasi aqui fuaifoan oin Jesús mapufaintan machi pochinin tsaoni. Nanno tsaonoo ahuunshon tapiafo a shinain caiton noco yosiquin isca huani.

<sup>3</sup>—Tsoa futsan aton nomuran shinanquin isca huai, “Uficai un ishara tiroma. Un Dios yopacoinran,” icaiton Diosin ato unimamashquin. Ascashu uhuun Upa Diosin niaifo ano afu ipatirofoquin.

<sup>4</sup> Ascan tsoara futsa uaiquin omitsiscafishu chipo unimatiro.

Diosin atohuun ramapaiquin aton ointi main huamatiro.

<sup>5</sup> Cacapaimisi itamarocon futsa ahua huamisima. Mato ahuun nomuran shinanquin isca huai, “Ufi apaiyai cuscan atama Diosin ua amapaiyai cuscan fusti un atiroran,” ishon shinanfafainaiton Diosin ato unimamatiro.

Nan cuscarafu Diosin yoiyotiani cuscan ato inanshquin. Diosin icano arifi afu inonfo. Ascashu nantifi ahuunari atonari iishquin.

<sup>6</sup> Ascan nan ratoranfo Diosifu ipaiquin ahuun tsain tapipaiquin finaifo a cuscara shara iishcaquin.

Nan cuscarafu fuchipaiyaifo cuscan Dios ato imatiro a cuscara shara inonfo.

<sup>7</sup> Ascan nan futsafuun ramapaiquin ato shara huaiton Diosin man tapia.

Ascacun nanrifi ahuun ramapaiqui a shara huashopacunaca arifi unimanon.

<sup>8</sup> Ascan nan Dios fusti tanasharashu ahuun nomuran shinansharamisi.

Nan cuscarafu chipo Dios ointirofo. Ascaiton Diosin ato ointi unimamashquin.

<sup>9</sup> Ascan tsoan nan noicasmatanainfoan ato raunan huaino afanan rau huantanano.

Nan cuscarafu Diosin yoiquin, isca huaqui, “Min uhuun facuran,” ishon ato yoiaino fasi unimacoinshcani.

<sup>10</sup> Tsoa Diosin yonoo cuscan aiton futsafoan omitsisca huafainfoan tunua.

Nan cuscarafu Diosin ato unimamashquin. Ascashon nan Diosin niaifo icariafo nanfori atona iishquin.

<sup>11-12</sup> Ascan futsafoan uhuunshon mato roaquin omitsiscamafain matohuunoo chani futsa futsatapafo yoifiafoanno shinanchacayamacahuun. Mato omitsisca huaifo cuscan mato shunifori nan Diosin tsain yoisimiffo omitsisca huapaonifo. Ascan man uhuunoashu omitsiscafishu Upa Diosiqui man nocoaitian fasi sharacoin mato imashquin man afu ipashanon. Ascacun unimacahuun.

**Jesús icoinra huafo sao yafi shafa cuscara**  
*Mr 9.50; Lc 14.34-35*

<sup>13</sup> Ascan manfin nan nuno mai anoo sao cuscaroquin. Nami saomua shara payocotiroma. Nanscarifiai yora chacafo muran ishon marifi man ato shinanmasharatiro chaca huanonfoma. Ascan nami saomuamaca shara itiro. Paismacoin itiro. Ascafia afanan nami shara iyamainoricai saori shara itiro. Afanancai ahuashta itiro. Nanscara non potatiro puamanonfo. Nanscarifiai afanan man ua tanasharayamainocai matohuunshon tsoan ato chaca shatutiroma isharashquin. Man ua tanasharayamashu man funocointiro.

<sup>14</sup> Ascafia manfin nan manifoti ato chasha cuscaroquin. Machi cuya mamaquinoa pushurasi fasi chaicushon shafacafi ointirofo. Onuca atiro. Nanscarifi aquin man ua tanasharaino mato oinquin matohuunshon ua icoinra huatirofo shafacafi iishcaquin.

<sup>15</sup> Nanscarifi aquin tsoancai faquishiano oinpaifiaquin lamparina tapa camaqui otashon cutipan fupomisima.

Ascatarocon otashon tapa camaqui huatiro shafacafi tsaocun pushu muran iquicaquin oinsharanonfo. <sup>16</sup>Ascacun nantifi yorafo shara huacoincahuun. Man ato shara huai cuscan oinquin shinantirofo isca huaquin, “Diospan yorafoan fasi noco shara huafafaincani. Apa Diosin ato yosisharamisi. Asca aton Upa Dios fasi sharacoinran,” ishon shinantirofo. Anori shinacaquin maton Upa Dios nai muran ica yoitirofo isca huaquin, “iAicho! Upa Diosin tsoa futsacai mia cuscara sharama. Min nantifi finoncoianran,” ishon yoishquicani. Afanan yoitiro isca huaquin, “Dioshuunshon noco shara huashomisifo. Ascan aton Dios sharacoinran,” ishon yoishquicani.

<sup>17</sup>Isca huaquin man shinan raca, “Moisés Diosin yononi cuscan cunushoni yafi Diosin tsain yoimisi futsafoan cununi cuscari nanfo Jesús noco nicamapaima. Nanfo noco potamapairan,” ishon raca man shinan. Anori shinanyamacahuun. Uncai Moisés yafi Diosin tsain yoimisi futsafoan cununi cuscan potapaiquimarocon man cununifo cuscan un huamashquin un oa. <sup>18</sup>Un mato shafacafi yoi. Diospan tsain cunushoni cuscan nannorifi Diosin yonoi. Ato yonoquin cunushopaoni cuscan nan fustishtacai funopacunacama. Nai yafi maitio cuyoyamainon nanscasi apanaca ahuun tsainri inonpacoai cununshoni cuscan nantifi fustishtacai cuyopacunacama aqui tau huani cuscan.

<sup>19</sup>Ascan tsoa Diosin yononi cuscan fustishta potashu non futsafori potamashu Dios icano aacai ahuama itiro. Ascafiaquin tsoan Diosin tsain nicasharafafainquin futsafori Diosin tsain shafacafi yosicun nan Upa Diosin icano niaifo patashari itirofoquin.

<sup>20</sup>Ascano nan Fariseofo non Judiofo

aton niaifofo futsafoanri, “Nonfin fasi shara imisiran,” ifianmishishacaquin Diosin yononi cuscan tanacoianfoma. Diosin yononi cuscan huacoinmisifoma. Mancai ato finoanshuma Diosin yononi cuscan man huashuma Upa Diosin icano man nocopacunacama.

—Sinayamacahuun, —ishon

**Jesús ato yosini**

*Lc 12.57-59*

<sup>21</sup>Moisés nocon shunifo yononi cuscan man nicamisi isca huaquin, “Tsoa rutuyamacahuun. Man futsa rutucun niaifofo ano mato iyotiro matori copiquiri namatirofo,” ishon Moisés nocon shunifo yononi. <sup>22</sup>Cayacafi anori yonofianicun un mato tsain futsa cayacafiri yoinon. Oinfain. Tsoa futsaqui sinaiton a niaifo ari iyotiro a onaintimanon. Ascan tsoan futsaqui tsain chaca huaiton isca huaquin, “Mincai ahuama. Min ahua tapiamaran,” ishon yoiaiton niaifofo ari iyotiro a onaintimanonfo. Ascafia tsoan futsa chaca huai isca huaquin, “Minfin mapo chacaquin. Min nisoncoianran,” huaiton Diosin a omitsiscapanacafo muran nan chi muran potatiro anoashu capashononma.

<sup>23-24</sup>Ascacufin man Dios cufiaitian nantianri man shinanquin isca huaquin, “iOhua! Un futsa chaca huaran,” ishon shinancun. Afanan Dios cufitamarocon iquisi nan futsa min chaca huaa ano catahuun. Aqui nocoshon yoisharahuu mia rauhanon. Asca huano afanan min nasotiro Upa Dios cufishquin.

<sup>25</sup>Man futsa nifishon matoqui nocoaiton isca huaquin, “Min ua nifian cuscacai mian inanma. Natian un mia niaifo ano iyoiran,” ishon mia yoicun. Afu caquin niaifo ano nocoataima rufoto aroshararisca huahuun. Asca huaiyamaiton mato niaifo ano iyotiro.



Nocoshon niaifoan ranushumua yoitiro, “Na nocofunun futsa nifian cuscan inanma. Ascan cunu muran iquimatahuun,” huatiro. <sup>26</sup>Un mato icon yoicoín. Mato iquimanano man cainritiroma nifian cuscan atifi inanshuma. Nanscarifi aqui man Dios chaca huamisiquin. Oataima arorisca huahuu mato omitsiscahuapanonma.

**—Maton ahuinma oincaquin  
chotapaiyamacahuun, —Jesús ato huani**

<sup>27</sup>Moisés nocon shunifo yononi cuscan man nicamisi isca huaquin, “Maton ahuinma chotayamacahuun. Ainfofoan maton funuma chotamayamacahuun,” ishon yononi. <sup>28</sup>Aafin iconquin. Ascarifi un mato yoirifi huai. Tsoa ainfo ahuun ahuinma oinquin ahuun nomuran shinain, “Un nan ainfo chotapainonran,” ishon nannori shinanquin a chotacoin shinantsai. <sup>29</sup>Ascan man oinquin man chaca huapaiquin maton furon ocuma futsa shara tscashon potahuu afanan chacanoma. Man mumafiacun omitsiscapanacafo muran mia potacun nancai sharamafinquin. Ascaquimarocon man mumamafiashu Dios icari nocoshon nanno afu ipashanon nan sharacoin. <sup>30</sup>Nanscarifiai min muminorishon min mucuman min ahua min chaca huaiton, min mushtua shara icuana. Man mumafiashu omitsiscapanacafo muran mia potacun nancai sharamafinquin. Ascaquimarocon man mumamafiashu Dios icari nocoshon nanno afu ipashanon nan sharacoin.

**Nocofunu yafi ainfo ununantirofohuunoa  
Jesús ato yosini**

*Mt 19.9; Mr 10.11-12; Lc 16.18*

<sup>31</sup>Nocon shuni Moisés nocon shunifo yonoqui isca huani, “Tsoan ahuun ahuin unushquin iquisi cunushotiro isca

huaquin, ‘Un afanan mia fipaima. Un natian mia unuiran,’ ishon cunushotiro.” <sup>32</sup>Nannori Moisés yonofianicun un mato tsain futsa yoinon. Ratoran futsan ahuun ahuin nocofunu futsa fu iyamafiaiton unuquin chaca huaino. Nan ainfoan nocofunu futsa fu fiananquin fasi chaca huai. Asca huaquin nan funu fu iqui shinantsai. Funumain afi unucun. Ascafia nan funun ahuin unua nan ainfo nocofunun fiiquin aarifi chaca huai. Asca huaquin nan ahuun ahuinma fu iqui shinantsa huai.

**—Man yoitiani cuscan acahuun,  
—ishon Jesús ato yoini**

<sup>33</sup>Nocon shuni Moisés afanan tsain futsa nocon shunifo yoini. Nanri man nicamisi isca huaquin, “Man Diosin yoitiani cuscan acahuun. Man Diosin yoitiani cuscan ayamashu nancai sharamafinquin,” ishon Moisés nocon shunifo yoini. <sup>34</sup>Mato anori yoini. Un afanan mato yosinon nicacahuun. Yora futsafona yopaquin ato yoiquin, “Un mia yoia cuscan un acunma Upa Diosin ua onaintimatiroan,” ishon afanan anori yoiyamacahuun. “Un mia yoia cuscan un acunma nantifi nai muranshon ua nicatiro Upa Diosin ua onaintimatiroan,” ishon afanan anori yoiyamacahuun. Diosin nai muran ica. Ascan anori yoiyamacahuun.

<sup>35</sup>“Un mia yoia cuscan un acunma nuno mai anoa ua onaintimatiroan,” ishon afanan anori yoiyamacahuun. Nantishon mai Upa Diosinna. Ascan anori yoiyamafain, “Un mia acunma nocon pushurasi Jerusalén ano ua copitiroan,” ishon afanan anori yoiyamacahuun. Nan pushurasi Jerusalén nocon niaifocoin Diosina.

<sup>36</sup>“Uhuun mapon un shinain cuscan un mia acunma ua onaintimatiroan,”

ishon yoyamacahuun. Maton shinanhuunshon maton fo fiso iyamarai osho imatiroma. <sup>37</sup>Ascan maton yora ahua ra yoipai ato yoihuu isca huaquin, “Un mia yoia cuscan iconcoin,” iyamarai “Nan iconmaran,” ishon ato yoicahuun. “Un mia acunma ahua ra ua onaintimatiro ra n,” ishon anori yoyamacahuun. Na yoshin chaca Satanasfin chanimisico inquin. Ahuunshon yora anori yoitiro.

**Tsoamain futsa copitiro  
Jesús ato tapimani**

*Lc 6.29-30*

<sup>38</sup>Ascan nocon shuni Moisés afanan tsain futsa nocon shunifo yononi cusca ri man man nicamisi yoiquin isca huanicun, “Futsa mia asca huaiton niaifo ano min iyotiro mia copishonon. Min furo ocuma futsa mia tsucacun copiquiri niaifoan ahuun furo tsucamatiro. Ascan mia sutuquin min shuta fusti tucucun niaifoan copiquiri ahuun shuta fusti tucuntiro ra n,” ishon Moisés yononi. <sup>39</sup>Nocon shunifo nannori yonofianicun un mato tsain futsa yoiaiton ua nicacahuun. Tsoan mato chaca huafia ato copiyamacahuun. Mato tapasaiton ato copitamarocon nanno nishohuun mia ocuma futsari afiaiton tunuhuu.

<sup>40</sup>Futsan mia niaifo ano iyocun min camisa mia fiainton min sahuuti cushtopari inanhuun. <sup>41</sup>Ascano ranushumuaton iyamarai futsan mato yonoquin isca huai, “Uhuun forusa kilometro fusti ua foshocahuun,” ishon mato yonoaiton shinantaquima kilometro rafu foshohuun. <sup>42</sup>Tsoanran mato ahua ra yocaiton ayashon ato inancahuun. Futsan mato yoiquin isca huai, “Ua inanyopun,” mato huaiton inanriscayocahuun. Fishcotama.

**—Mato noicasmafiaifoan atohuun  
noicahuun, —ishon Jesús ato yoini**

*Lc 6.27-28, 32-36*

<sup>43</sup>“Ascashon naan maton yorafohuun noico incahuun. Ascan a mato noicasmaifori copiquirifi ato noicasmacahuun,” ishon nocon shunifoan yoinifo cuscan man man nicamisi. <sup>44</sup>Nannori yoifianifo un mato yoiquin isca huai, Naan mato noicasmafiaifoan atohuun noico incahuun. Tsoan mato omitsisca huairi Dios cufishocahuun. <sup>45</sup>Diosin fari onihuani yora sharafo yafi chacafori chashashonon. Nanscarifi huaquin Diosin oirifi onihuani nan yora sharafo yafi chacafori ato onihuashoni. Diosifin nan tanaifo yafi a chaca huaiforifi ato shara huamisi. Ascacun marifi nanscarifi huacahuun a mato shara huaifo yafi mato chaca huaifori shara huacahuun. Asca huaifin marifi man Diospan facucoinfo shon futsafori man ato ismatiro.

<sup>46</sup>A matohuun noiaifosi copiquirifi man atohuun noia ino cai aacai ahua ma. Yora chacaforifi ascarifiaifoanno. Man ascaino cai Dios mato yoima man shara huaran ishon. <sup>47</sup>Maton yorafo fustisi man tsain shara yoia ino aacai ahua ma. Yora Dios icoinra huaamafori nanscarifiaifoanno. Man ascaino cai Diosin mato yoima “Man shara huaran,” ishon. <sup>48</sup>Ascano maton Upa Diosin nai muranshon nantifi yorafo noia cuscan marifi nansca huacahuun. Upa Diosin shinansharamisi cuscan marifi shinansharacahuun.

**—Ahuomafo atohuun ramapaiquin  
inanhuun, —Jesús ato huani**

**6** <sup>1</sup>Oinfain. Man futsafo shara huaino maton nomuran man shinain isca huaquin, “iAicho! Un ato shara huacun

futsafo ua oincani uqui shinansharanonforan,” ishon anori man shinancai Upa Diosin matoqui unimaima. Mato ahua inainma. <sup>2-4</sup>Nan paramisifo cuscara iyamacahuun. Nanfoan atohuunoo yorafo shinansharamacani isca huaquin, “Nan yora fasi sharacoin. Futsafo shara huashoanran,” ishon nannori futsafo atohuunoo shinanmapai. Nantifi ato ointaifi yora shara huapai ato oinonfo. Ascara chaca. Upa Diosin atoqui unimaima. Futsafoan ato, “Min shararan,” huatirofiaino Upa Diosincai atohuunoo tsain shara yoishquima. Atoqui unimaima. Ascan marifi ato cuscara iyamacahuun. Futsafo ato ointaifi ahuuoma inanpaicahuun mato oinonfo. Ascaquimarocon tsoa futsa oinyamaino man ahuuoma inanquin Upa Diosin oin matoqui unimai mato ashosharatiro.

**Jesús afu rafuafo yosini ahuuscashomain  
Upa Dios cufitirofoquin**

*Lc 11.2-4*

<sup>5</sup>Man Upa Dios cufiaitian nan paramisifoan cufimisifo cuscan huayamacahuun. Nanfoanfin nishon yora ichananfo anoshon yafi ichananti pushu muranshonri ato ointaifi Upa Dios cufipaicani ato nicanonfo. Upa Dios shinancointamarocon nannofo atohuunoo shinansharamapaicani. Ascaifoan oinquin futsafoan atohuunoo shinansharatirofia Diosincai atohuunoo shinansharatiroma. Ascashocai ato ahuashta inansharashquima.

<sup>6</sup>Ascacun marifi ato cuscara iyamacahuun. Man Dios cufiaitian tsoa yamaino Upa cuficahuun. Ascaciacun Upa fustiton mato ointiro. Ascashu matoqui unimacoinquin man yopai cuscan mato inansharashquin. <sup>7</sup>Man cufiaitianri nan tsain fustisi

yoiriamacahuun. Nan icoinra huamafoan cashmancoin cufimisifo cuscan. Ascashon yoimisifo. “Un nan tsain nannorisi yoiriaiton ua Upa Diosin nicatiroran,” ishon shinanmisifo. Asca huafiainfoancai Diosin ascaran tsain nicapaima. <sup>8</sup>Ascacun marifi ato cuscara iyamacahuun. Man Upa Dios yocataima man yopai cuscan man tapiaquin.

<sup>9</sup>Ascashon cufinquin isca huacahuun, “Nocon Upa nai murannoaton min fasi sharacoin.

Nantififain mihuunoo yoisharapainon.

<sup>10</sup>Min apaiyai cuscan min ica nai muranshon samamashta arisca huamisifo.

Nanscarifi nuno manifoti anaoafoan huanonfo cuscan

nanscacoindirifi nuno mai ano anonfo. Manifotiton aton niaifo iishquin mia ifoannonfo.

<sup>11</sup>Shafatifi nocon tushu non yopai cuscan noco inahuun.

<sup>12</sup>Nan noco chaca huaifoan non ato rauhua cuscan huafain nocon chacafori noco rauhushohuun, Upan.

<sup>13</sup>Satanás yoshin chacapan noco chaca huamapaifaiton nocoqui cumatima huahuu. Nansca huaquin,”

ishon cuficahuun ato huani.

<sup>14</sup>Ascacun futsafoan mato chaca huafiacun ato rauhucacahuun. Ascacufin maton Upa Diosin nai muranshon man aqui chaca huacuscari rau huatiroquin. <sup>15</sup>Ascafia futsafoan mato chaca huacuscari man ato rau huayamaiton manrifi chaca huacun Uparicai mato rauhushoima.

**Piqui tunumisifohuunoo Jesús ato yosini**

<sup>16</sup>Ascano tsain futsari un mato yoi man tapinon. Man piqui tunuaitian nan

paramisifoan amisifo cuscan  
 huayamacahuun. Nanfoan aton fuso  
 chocayamafain puusimisifoma piqui  
 tunucani. Dioshuunoo shinantama  
 atohuunooarocon yorafo  
 shinanmapaicani. Yorafoan atohuunoo  
 shinanqui isca huanonfo, “iOincapon!  
 Naton fuso Dios shinanquin piqui tunui  
 puusiquimaran,” ishon. Ascashon  
 atohuunoo shinansharafoanno  
 unimacani. Ascafiafoanno Dioscai  
 atoqui unimaqui ato ahuara inainma.  
 Ascacun marifi ato cuscara  
 iyamacahuun. <sup>17-18</sup>Ascatamarocon man  
 piqui tunuaitian fuchoquimucain foshti  
 isharashon Dios shinancahuun. Man  
 ascaitocai futsafoan mato oinfiaquin  
 tsoan tapitiro ma man piqui tunufiaiton.  
 Ascafia Diosin fustichifin tapitiroquin.  
 Ascashon nan icari man nocoaitian  
 mato ahuara sharashta inanshquin.

—Upa Dios icanoa ahuara  
 sharacoinfo mato mucushotiroan,  
 —ishon Jesús ato yosini  
*Lc 12.33-34*

<sup>19</sup>Ascan nuno mai ano niyoshon mafo  
 ichapa mucuyamacahuun. Nanfo  
 chacanai futsuaino man funotiro.  
 Yomutsori maton pushu muran  
 iquishon nantifi maton mafo onutiro.  
 Ascaino marifi man funocoin.  
<sup>20</sup>Ascatamarocon Dios fu  
 rafufafaincahuun mato amapaiyai  
 cuscan ashquin. Man asca huaiton Dios  
 nan icanoshon mato ahuara sharacoinfo  
 mucushoni. Nanfocai  
 chacanapacunacama. Tsitsa  
 iquiyamacai yomutsoricai iquitiroma  
 maton onunshquin. <sup>21</sup>Ascan man mafo  
 fusti shinanfafainquifin nan fusti man  
 noicain. Ascan man Diosihuunoo fustisi  
 shinanfafainquin nanrifi man  
 yonoshosharatiro ahuun noicoinquin.  
 Ascashu man afu isharapacusharatiro.

**Nocon furo nan lamparina  
 cuscarahuunoo Jesús ato yosini**  
*Lc 11.34-36*

<sup>22</sup>Afanan tsain futsa un mato yoi man  
 tapinon. Nocon furo rafu nocon cayan  
 lamparina cuscara. Nan rafu shara non  
 oinsharatiro. Ascashon nocon caya  
 cushusharatiro non ahuuscanonma.  
 Nanscarifiai mato nomuranshon man  
 shinansharai man isharacointiro.  
<sup>23</sup>Ascafia nocon furo chacanocai non  
 oinsharatiroma. Faquishcoin itiro.  
 Nanscarifiai nocon nomuranshon non  
 shinanchacaicain non isharatiroma.  
 Ascacun oinfain. Man Dios shinain  
 isharafishu chipo Upa Diosin ahuun  
 tsain man cachiquiri huashucái afanan  
 man isharacointiroma. Ascashu nan  
 faquish muran ica shinantsain man  
 funocointiro.

**Dios yafi pui**  
*Lc 16.13*

<sup>24</sup>Ascan oinmatinincái ahuun ifo  
 nanno rafu nantian yonoshotiro ma.  
 Futsa noifain futsa noicasmatiro  
 iyamarai futsa nan yoia cuscacoin  
 huashotiro. Ascashon futsa, “Nacai  
 ahuamaran,” ishon shinantiro. Tapicai  
 huatiroma ratocaimain nicasharaiquin.  
 Nanscarifiai Dios yonoshopaiquicai man  
 pui noitiro ma maton ifo inon.

—Upa Diosin ahuun facufo  
 cushushararan, —ishon Jesús ato yoini  
*Lc 12.22-31*

<sup>25</sup>Afanan un mato yoisharanon. Isca  
 huaqui shinanyamacahuun, “Non ahua  
 pitama nonricai ahua ayaimaran,” ishon  
 shinanchacayamacahuun. Ahuaricai non  
 sahuuimaran iyamacahuun. Non ahuara  
 pifain non sahuuatocai noco  
 imasharatiroma. <sup>26</sup>Shinancapon. Nan  
 puiyafoancai ahua fanayamafain ahua

chintumisifoma ahuaricai fotsuyamafain ahuamafociacun Diosin ato pimamisi. Nanscarifi aquin Diosin mato huun noi quin nan puiyafo aca finonmafain mato cushushara. <sup>27</sup>Ascacun shinanchacayamacahuun. Non shinanchacatocai shafa fusti noco nimayotiroma.

<sup>28</sup>Ascashon shinanquiri isca huayamacahuun, “iOhuashta! Raniamun un sahuuti fii nan sahuushqui,” ishon shinanyamacahuun. iShinacapon! Charofocai yonoyamafain sahuuti icushumisifoma. <sup>29</sup>Ascataka sharamishticoín foaícafo. Nocon shuni niaífo Salomón sahuuti sharashtacoin sahuufiapaonicai nan charo sharashtacoinfo cuscarama. <sup>30</sup>Diosin charo sharashtacoinfo onihua. Foai sharaífa supashon samamashta tsasicun coatirofo. Nanfo finonmafain mato noi quin mato camisa sahuumashquin. Ascafia mancai icoinra huasharacoinnama.

<sup>31</sup>Ascacun shinanquin isca huayamacahuun, “iOhuashta! Unmun ahua piquin uhuun tushuyamaino. ¿Unmun ahua ayaicai? Unricai ahua sahuuimaran,” ishon shinanchacayamacahuun. <sup>32</sup>Ascan nannori nan icoinra huamafoan shinanchacamisifo. Ahuara pifain sahuupaiyaífo fustisi shinanmisifo. Ascan maton Upa Diosifin tapiaquin man yopai cuscan. Ascacun mato inanshquin. <sup>33</sup>Ascacun Diosicairocon shinanchahuun. Mato yonomapaiyai cuscan nan fusti shinanfafaicahuun. A cuscara shara ipaícahuun. Nancái shinanquin tau huafafaincahuun. Man ascaiton ahua futsa man yopai cuscan Upa Diosin mato inanshquin. <sup>34</sup>Ascacun shinanchacaqui isca huayamacahuun. “iOhuashta! Uncái tapiama funamanri ahua chaca finoainno raca un

tunuima,” ishon anori shinantama shinanquirocon isca huafafaincahuun, “Upa Diosin shafatifi ua cushusharamisi cuscan funamanri ua cushusharairan,” ishon shinanfafaicahuun.

### Futsafohuunoa shinanchacayamacahuun

*Lc 6.37-38, 41-42*

**7** <sup>1-2</sup>Futsafohuun shinanchacaqui yoi quin isca huayamacahuun. “Nanton chaca huai cuscan onaintimainonran,” ishon futsafohuunoa yoiyamacahuun. Man ascara yoiáiton Diosin mato onaintimai. <sup>3</sup>¿Ascacun ahuuscaí yora ahua pasnanshta fuostamua man futsupaiyai marifi sapa uhuapa fuostamufiashocai man muíma? Nanscarifai min chaca huairan futsa huafiaquin mancaífin fasi finacaíquin. <sup>4-5</sup>Ascashon man yoiqui isca huai, “Uhuun yorashtan, un min furo murannoa ahua pasnanshta un mia futsunon,” man huamisi. Ascafíashocai man tapiama man sapa fuostamufafainna. Man fuparamitsapaimisi. Ascacun sapa futsucumucahuun. Asca huashon oinsharafain marifi man futsa pasnanshta futsutiro. Nanscarifi aquí futsafoan ato chaca man shatupaífaíquin marifi man chaca huaa. Man fasi paran. Ascacun iquisi maton chaca shatucahuun. Ascashon marifi man futsafo chaca shatumatiro. <sup>6</sup>Tsain futsari un mato yoi man tapinon. Pashna pofu iyamarai yahua pofu non tushu inansharatiroma. Non mucuman tushu inansharapafíaiton nan pitama nocorocon mocitiro. Nanscarifi aquí ratoranfoan man ato tsain shara Dioshuunoa yoípaífaíaiton nicacasmacaquin mato chaca huatirofo. Ascacun ascarafó ato yoiyamacahuun. Man yoisharapafíaiton Diosin tsain potatirofoquin.

**Dios yocafain funafain cunahuu***Lc 11.9-13*

<sup>7</sup>Afanan ahuara futsa un mato yoiai cuscan nicacahuun. Ahuara yopaquin Upa Dios yocacahuun mato ashonon. Man yocain cuscan funaquima manasharacahuun nan Diosin mato ashoaitian. Ascacun Upa Diosin cuffafaincahuun man cufiai cuscan mato inanon. <sup>8</sup>Tsoan Upa Dios yocariai fiishquin. Ascan tsoan ahuara shara fasi fuchipaiyai cuscan Diosin ato fuchimatiro. Ascan tsoan Upa Dios cufiriaton ashoshquin. <sup>9</sup>¿Ascacun maton facun mato yoa yocaiton man toquiri inantiromun? Ma. Mancai maton facu asca huatiroma. <sup>10</sup>¿Maton facuri mato shiman yocaiton man rono inantiromun? Ma. Mancai maton facu asca huatiroma. <sup>11</sup>Ascacun tapicahuun. Man chaca huamisifishon maton facufo man inansharamisi. Man ascaiton maton Upa Diosin nai murannoaton man yocai cuscan finacaia mato inansharashquin. <sup>12</sup>Man futsafo matohuunoa shara huamapaiyai cuscan nanscarifi huaqui futsafori shara huashofaincahuun. Moisés cununi cuscan yafi Diosin tsain yoimisifoanri nannori cununifo man shara huashofainon.

**Caincaiti atsoshta***Lc 13.24*

<sup>13</sup>Ascashon tsain futsari un mato yoinon. Nannofin fai rafaquin. Nan fai tohuaica uhuapaton yorahunrasi ahuunsi fomisifo. Ascafai nan mau fai tanashu ahuun unutaqui omitsiscapanacafo muran iquishceni. Ascacun mau fai uhuapaton catama fai atsoshta tanacahuun. <sup>14</sup>Nan fai tohuaica uhuapama atsoshtacoin. Ascan nanfin fustirasiton fuchitirofo. Nan atsoshta tanafainashu omitsiscatirofofia ahuun

unutaqui Dios ari nocoshceni  
nipasharashcaquin.

**Ihui ahuun fimihuunshon non onantiro***Lc 6.43-44*

<sup>15</sup>Oinfain. Paramisifo matoqui fucashon mato yoiqi isca huacani, “Nonfin Diosin tsain yoimisifoquin,” ishon yoifiacani afoancai Diosin tsain yoimisifoma. Ascan nanfofin nan chashoan cuscarafoshiu ato nomuran nan masharo pofu cuscarafquin. Ascacun ato nicayamacahuun. <sup>16</sup>Un mato tapimaquin isca huai. Fanafoti ahuun fimifohuunshon non onantiro ahuu cuscarafomainquin. Ihui moshayafohuuncai uva foaicun non tuscutiroma. Nanhuafaquisihuunricai shopa foaicun non tuscutiroma. <sup>17</sup>Ascafai ihui sharano ahuun fimiri shara itiro. Ihui chacano ahuun fimiri chaca itiro. <sup>18</sup>Nanscarifiai ihui sharacai ahuun fimi chaca itiro. Ihui chacanocai ahuun fimi shara itiro. <sup>19</sup>Ascacun ihuin ahuun fimi sharamacun ifoan rurashon coatirofo. <sup>20</sup>Ascacun fimi chaca iyamarai sharacun onantirofo ahuu cuscaramain ihuiquin. Nanscarifiai nan tapimamisifoan amisifo cuscan man onantiro yora sharafo iyamaraimain chacafoquin.

**Atificai Upa Dios icano iquitirofoma***Lc 13.25-27*

<sup>21</sup>Ascano atirifiton ua Ifo huafiashucaai uhuun Upa Diosin ato amapaiyai cuscan amisifoma. Nan cuscarafa Upa icari nocotirofoma. Nan uhuun Upa nai ari icaton afi ato amapaiyai cuscan huamisifo nanfo fusti uhuun Upa ari nocotirofo afu nipashcaquin. <sup>22</sup>Ascacun Upa Diosin nantifi icoindra huamafo onaintimaitian nantianri yora ichapaton ua yoiqi isca huashceni, “Ifoshta, shinanhuun. Non min anuhuunshon non

yorafo mihuunoa tapimamisi. Min anuhuunshonri yoshin chacafo non futsafomaquinoa potamisi. Min anuhuunshonri tsoan atiroma cuscan non huapaoni. ¿Iconmamun, Ifon?” ishon yoishquicani. <sup>23</sup>Ascaifoan un ato cayacafi cumaqui isca huashquin, “Mancai uhuun yorafo imisima. Manfin paramisifoquin. Chaca fustisi man huamisi. Ascacun umaquinoashu fotocahuun,” un ato huashquin.

**Futsan pushu mutsisipa huaino futsan pushu mutsisipama huatiro**

*Mr 1.22; Lc 6.47-49*

<sup>24</sup>Ascacun un mato tapimai un mato yoimisi cuscacoin aashucaí man funopacunacama. Nanscarafo nan pushu mutsisipa huamua cuscarafo. Pushu huaquin ahuun quishi mai tuiqui nocoá. <sup>25</sup>Ascano fasi oi ichapa fucain faitahuan pushu naman foannaino fuhuanri nocofiaquicai pushu mutsisipa paon huaquima. Nanscarifiai nan uhuun tsain nicacoianfo nan un yoia cuscan acani. Ascashu ahuara ahuuscarafaiinocai umaqui itirofoma. <sup>26-27</sup>Ascafia pushu futsa mai puhuuqui fuquisishta huaa ahuun quishi mai tuiqui nocoama. Ascano fasi oi ichapa fucain faitahuan pushu naman foannaino fuahuanquiri pushu mutsisipama paon huaqui chacana huatiro. Nanscarifi aqui tsoan uhuun tsain nicafiaquin un ato tapimana cuscacoin aima. Aatocai shinansharama. Ascashu ahuun unutaqui arifi nantifi funoshqui omitsiscairan, —ishon Jesús ato yoini.

<sup>28-29</sup>Jesús tsainqui anaitiano yorahuanrasi anoshon nicacashu yoinannifo, —iAira! ¡Nicacapon! Ahuun tsain sharacoin. ¿Ahuuscashon anori noco yositiromun? Ahuun tsain shara iquina. Nocon tapimamisifoan Moisés cununi cuscan noco yosimisi cuscan

aacai anori noco yositamarocon niaifo tapia cuscan noco yosiaran, —ishon yoinannifo.

**Jesús nocofunu yoratisho rashquishi futsua caya huani**

*Mr 1.40-45; Lc 5.12-16*

**8** <sup>1</sup>Ascatan Jesús ato yoiquin anaititan machi tunanmanri tusuriqui cainaiton yorafoan mufainifo. <sup>2</sup>Jesús caino nocofunun ahuun yoratishon ranimamishti rashquishi futsua Jesusqui nocoshon ratoconun mai chachipacufoan yoini isca huaquin, —Ifon, ua caya huapaiquifin mian cayahuatiroquin, —huaiton. <sup>3</sup>Jesús aqui mupishon yoini, —Icon un mia caya huai. Ascán natianfin min cayaiquin, —huaino a rashquishi futsua cayariscatani. <sup>4</sup>Cayacun Jesús yoini isca huaquin, —Un mia caya huaa cuscan tsoa yoiyamahuu. Nocon caifohuunshon Dios cufimisi ismatahuun. Ascashon Moisés noco yononi cuscan chashoanun facu a inantahuun mia rutushonon. Min chaca soafain min caya cuscan ato ismashquin. Ascano tapitirofo Moisés noco yononi cuscacoin min aiton, —ishon Jesús yoini.

**Romano ranushumua niaifoan ahuun oinmati Jesús caya huani**

*Lc 7.1-10*

<sup>5</sup>Asca huafaini Capernaum ano caní. Ascaino nanno ranushumua niaifo noconi ahuunshon ahuun oinmati caya huamapai. <sup>6</sup>Aqui nocoshon yoiqui isca huani, —Ifon, uhuun oinmati isininqui. Uhuun pushu ano furoiquima raca. Fasi omitsiscairan, —huaiton. <sup>7</sup>Jesús cumani, —Un canonqui cayahuashquin, —ishon yoiaiton. <sup>8</sup>—Ifon, uncai ahuama. Min nocofunu tsoa cuscaramacoin. Uhuun pushu muran capaiyamaquin. Min tsainmansí uhuun

oinmati ua cayahuashohuun. <sup>9</sup>Ascan uarifi uhuun niaifoan ua yonomisi. Ascacun urifi ranushumuafu un yonotiro. Ascan un futsa, “Catahuun,” huaino cariscatiro. Un futsa, “Ohuu,” huaino uqui oriscatiro. Uhuun oinmatiri, “Ua ashohuun,” un huaiton ua ashoriscatiro. Ascan minfin ahuamamishti huatiroquin. Ascacun min tsainmansi yoihuu uhuun oinmati cayanon, —ishon yoini.

<sup>10</sup>Ascaiton nicai Jesús afu foaifo yoini, —iAira! Nicacapon. Israelimafishon naton ua yoiyai cuscacai tsoa futsan ua icoinra huacoinmisima. Israeli anofoanricai ua icoinra huacoinmisifoma. <sup>11</sup>Ascacun un mato shafacafi yoi. Mani futsafori anoshon nan Dios icoinra huafoti nocon shunifo Abraham yafi Isaac non Jacobori Dios icano nai murannoashu atofu ichananshcani Diosin yorafo iishcaquin. <sup>12</sup>Ascacia atirifi nocon caifon Israelifo Diosin ahuun yorafo ato imapaifici tsoan icoinra huafoma. Ascacanasahucai Dios icano nocotirofoma. Ascacun Diosin ato faquish muran potashquin. Nannoashu uaiqui omitsiscapanacaforan, —ishon Jesús ato yoini.

<sup>13</sup>Ascashon Jesús Romanon ranushumua niaifo yoini, —Min ua icoinra huaino min oinmati man caya. Ascan natian min pushu ano catahuun, —ishon yoini. Jesús yoiaitian ahuun oinmati cayariscatani.

**Pedro ahuun raisi yoshafo**

**Jesús caya huani**

*Mr 1.29-31; Lc 4.38-39*

<sup>14</sup>Asca huatan Jesús Pedro pushu ano cani. Nanno caquin oian Pedronun ahuun raisi yoshafo fasi yonacoin oshati camaqui raca ini. <sup>15</sup>Ascaiton Jesús yoshafoan ahuun mucuqui mupiai

ahuun yona matsiriscatanaino funinaca huan nan isinincama ointsacai Jesús pimashquin tushu huani.

**Jesús yora ichapa caya huamani**

*Mr 1.32-34; Lc 4.40-41*

<sup>16</sup>Ascaino man fari caino isinincai futsa futsatapafo yorafo aqui ihuunifo ato cayahuamapacunon. Atirifi yoshin chacafo atohuun nuufafaina Jesús ahuun tsainmansi atomaquinoa potano caya sharanonfo. <sup>17</sup>Jesús nantifi ato caya huani cuscan nannori ahuunoa Diosin tsain yoimisi Isaías inon pacoai cuscan cunuqui isca huani, —Cristofin ahuara isin futsafoan noco isininmai cuscan noco caya huaquin. Nocon isinfori nocomaquinoa potaran, —ishon Isaías cununi cuscan Jesús huani.

**Jesús tanasharapaiyaifo**

*Lc 9.57-62*

<sup>18</sup>Ascashon Jesús oian yorahuanrasi aqui fuaifoan afu rafuafo yoini, —Non ian ocuma futsa fonon focahuun, —ato huaino. <sup>19</sup>Nantianri Moisés yononi cuscan tapimamisi aqui cashon yoiquin isca huani, —Tapimamisiton, min raquiria caino urifi un mifu cahuacacainon, —huaiton. <sup>20</sup>Jesús cumaquin, —Marifi quiniyaquin. Puiyafori naayafofiano uncai pushu yama, —ishon yoini. <sup>21</sup>Ascaiton a tanamisi nocofunu futsan Jesús yoiquin isca huani, —Ifon, natian un mifu capaiyai uhuun pushu ano un cayotanon ua nichiyopun. Nan uhuun upa naitian un mai huayotan un mia tanasharashquinon, —huaiton. <sup>22</sup>—Ascaquima ua tanahuun. Ua ifoamafofin nan yora naa cuscarafokin. Ascashon nanfoan ato yora naacun mai huatirofo. Ascan minfin natian ua tanaicain, —ishon Jesús cumani.



**Jesús fuuhuan yafi ian  
fuchomanhuan nishma huani**

*Mr 4.35-41; Lc 8.22-25*

<sup>23</sup>Asca huatan Jesús shasho naqui nanuano norifi afu rafuafo non afu nanucaini. <sup>24</sup>Ascashu ianmanhuan non pocuaino fuuhuan nocoqui noconi. Nantian Jesús shasho murannoashu osha ini. Ascano ian fuchomanhuanquin shasho muran unu iquimani. <sup>25</sup>Ascaiton non moinni. —Moihuu, Ifon, noco numashqui. Man non asai futsuicai, —ishon non yoini. <sup>26</sup>Ascaino moinacahuan noco yoini —¿Ahuuscai man ratuain? Man ua icoinra huasharashucai man ratucuanama, —ishon noco yoini. Ascatan fuuhuan yafi ian fuchomanhuan yoiqui isca huani, —Fuun nishmahuu, —huafain, —Fuchomanhuan nishmahuu —huaino fuu yafi ian fuchoai nishmafaini. Asacatan ianmanhuan pusiquima racani. <sup>27</sup>Ascaiton oin non yoinanni, —Ahuu cuscara nocofunushonmun nocon Ifoan isca huaiquin. Fuuhuan yafi ian nan yoiyai cuscan man nishma huaquin, —icashu non yoinanni.

**Gadara mai ano nocofunu rafuhuun  
yoshin chaca nuua ini**

*Mr 5.1-20; Lc 8.26-39*

<sup>28</sup>Ascatan ianmanhuan pocufaini Gadara mai ano non nocotan Jesús no fu caino nocofunu rafu yoshin chacafo atohuun nuumisi aqui funifo. Nan rafu fasi musucoin ini. Nantifi yorafo atoqui musumisifo. Ascan nan rafu icafoanno cai tsoan ato finontiro imisima. Ascacun atoqui turocomumisifo. Nan mahua quini muran naafo mai huamisifo ano nan rafu inifo. <sup>29</sup>Jesús fuchicatan oi ashcafinin yoinifo, —Minfin Diospan facuquin. ¿Min noco ahuusca huapai oamun? Min noco omitsisca huaitian

icataiyamafiano min noco omitsisca huai oamun, —ishon Jesús yoinifo.

<sup>30</sup>Ascaino nantianri ato chaimashon yahua inafaoan piinifo. <sup>31</sup>Ascashon yoshin chacafoan Jesús yoicaquin, —Min na nocofunu rafumaquinoa noco potaimancai yahuarasihuan noco nichipun, —huaifoan. <sup>32</sup>Ascaiton —Yahuafohuun fotacahuun, —Jesús ato huaino. Nan nocofunu rafumaquinoashu yoshin chacafo yahuafo muran fonifo. Ascaino yahuaahuanrasi ian muran maocofainni asai futsunifo. <sup>33</sup>Ascaifoan oinfaincani yahua cushumisifo ichonifo pushufoti anofo ato chani huai focani. Ascatan nococashon Jesús nocofunu rafumaquinoa yoshin chacafo potaiton oianfo cuscan futsafo yoifoanfainifo. <sup>34</sup>Nicacani nantifi nan pushufoti ano icafo Jesusqui funifo. Ascashon yoinifo, —Nuno noco mai anoashu catapun, —huanifo.

**Jesús nocofunu funitiroma caya huani**

*Mr 2.1-12; Lc 5.17-26*

**9** <sup>1</sup>Ascatan Jesús shasho naqui nanucaini ian mahuan pocufaini ahuun pushurasi ano noconi. <sup>2</sup>Asca caini pushu muran iquicun rafu non rafuri nocofunufaoan aton caifo isinincai afi raqui caiyamacai afiri ahua huatiroma Jesús shinanmaqui shuhua naratashon ihuunifo a cayahuamanon. Ascaiton Jesús oian nan nocofunu isinincaiton ahuun yorafoan fasi icoinra huaifoan oinquin isinincai yoiqui isca huani, —Uhuun yorashta, ratuyamahuu. Natian mun mia chaca soashona, —huaiton.

<sup>3</sup>Nicacani Moisés cununi cuscan tapimamisifoan aton nomuranшон shinanquin isca huanifo, —Ajaa. Natocai chaca soatiroma. Fasi Dios chaca huai. Diosin fustitofin chaca soatiroquin. Asca noco paraquin. “Un

Diosiran,” noco huamapai, —ishon aton nomuranshon shinanchacanifo.

<sup>4</sup>Ascaifoan onanshon Jesús ato yoiquin isca huani, —¿Ahuuscai maton nomuranshon man amaquiri shinanchacaimun? <sup>5-6</sup>Unfi Cristoquin yorafoan aton chaca un soashotiro. ¿Ascan ahuuscacaimun un huaicai? Un chaca soashoyamaraquin un cayahuai. Ascacun un mato ismai Upa Diosin ua catoan. Ahuunshofin un chaca soafain un yorafo caya huacointiroquin, —ishon ato yoini. Ascatan Jesús nan nocofunu afi raqui cayamacai afiri ahua huatiroma yoini, —Min pushu ano min shuhua ya funicaitahuun, —ishon Jesús yoiano. <sup>7</sup>Funinaca huatan ahuun pushu ano cani. <sup>8</sup>Ascaiton oincani nantifi mustaiaricatan yoinifo, —Ahuuscashomun Diosin isca huaiquin. Diosin fasi sharacoin tsoa cuscarama. Ahuun yonohuunshon na nocofunu isinincal Jesús ahuun tsainmansi caya huafain ahuun chacari soashonaran, —ishon yoinifo.

**Jesús Mateo cunani**

*Mr 2.13-17; Lc 5.27-32*

<sup>9</sup>Nansacaini caaquin Jesús ua oinni. Unfin noco niaifo pui fishofafainmisi iniquin. Ascan uhuun anufin Mateoquin. A muranshon aton pui fianti pushun facu muran un tsoa ini. Ascaiton Jesús ua yoini, —Un fu cahuun ua tanamisi iishquin, —Jesús ua catonquin huani. Ua asca huaino un afu cani.

<sup>10</sup>Ascashon Jesús uhuun pushu muranshon un pimani. Yorafori no fu cani. Niaifo pui fishomisi futsafo non icoinra huamafo futsafoan atohuunoa shinanchacamisifo yafi non afu rafuafori cani. Ascashon nanfoan no futan piinifo. <sup>11</sup>Ascaiton oincaquin Fariseofoan Jesús fu rafumisifo yoini, —¿Ahuuscai maton tapimamisi Jesús nan niaifo pui

fishomisifo non chaca futsafo futan piimun? —huanifo.

<sup>12-13</sup>Ascaifoan nicaquin Jesús ato cumani, —A isinincaifoma cayahuamamitsamisi yopacanima. Ascan nan isinincaifoti fasi cayahuamamitsamisi yopacani. Ascarifi aquin, “Uncai ahua chaca huamisima. Un Numamisi yopaimaran,” icaifocai un aton chaca soashotiroma. Ascan tsoan yoiqui isca huai, “Un fasi chaca huamisi. Un numamisi yopacoinran,” icaifoan un ato chaca soashotiro. Ascacun Diosin tsain cununi cuscan tapitacahuun. Cunuqui isca huani, “Ua man ina fushomisi un mato chaca soashonon. Nan fusticai un fuchipaima. Ascatarocon man futsafohuun ramapaiyai nancaifin un fasi fuchipaiquin,” ishon Diospan tsain cununi. —Jesús ato huani.

**Piqui tunuaihuunoa**

*Mr 2.18-22; Lc 5.33-39*

<sup>14</sup>Ascashon ato yoiano Juan fu rafumisifo aqui fucashon yocanifo. —¿Ahuuscai Fariseofo futan non piqui tunumisifiano mifu rafuafoan piqui tunumisimamun? —ishon Jesús yocaifoan. <sup>15</sup>Ato cumani, —Nocofunu fu ainfo fianainnoricaí unimai fuiscaquin tsoan piqui tunutiroma. Nanno funu anocai ahuun yorafoan piqui tunutirofoma. Ascafia funu amaqui rutuafo non shinancaquin piqui tunutirofo.

<sup>16</sup>Sahuuti shunicoin fashnucun potu funapan icushumufia ustuashu fasi chacanai finatiro. Tsoancai afanan ascara icushpaitiroma. Nanscarifiai un mato tsain funa shara yosia cuscan nicacoinshocai man apaoni cuscan afanan man huatiroma. Tsoan ua tanacoianshu ipaoni cuscan cachiquiri huacointiro. Ascashu funa cuscara shara iishquin.

<sup>17</sup>Nanscarifiai tsoancai fichi tutso shuni muran vino funa nanutiroma. Fichi tutso toshacainaino vino funa chacanai cuyofotiro. Nanscarifiai maton shunicafoan mato yosimisi cuscan yafi un mato yosiai cuscaai nan rafu ositirofoma. Un mato yosiain cuscacoin nannori Diosin tsain shara. Ascafia mato shunifoan mato yosimisifo cuscaai anorima. Nan tanashocai Diosin mato amapaiyai cuscan man huatiroma. Nan rafu osishon nicapaiquicai man shinansharatiroma. Fichi tutso funa muran vino funa nanua sharacoin itiro. Nanscarifiai ratoranfoan apaoni cuscan unucatan un ato tsain funa shara yosiain nan fusti tanasharacun Diosin ato funa shara imai, —ishon Jesús yoini.

**Jairo shotocofacu caya huafain ainfoan  
Jesús sahuuti muunni cayashquin**  
*Mr 5.21-43; Lc 8.40-56*

<sup>18</sup>Ascashu Jesús tsaincai muran Israelifoan ichananti pushu anoa aton niaifo Jesusqui noconi. Nocoshon ratoconun mai chachishon yoiqui isca huani, —Uhuun shotocofacushta man naaquin. Un fu capun. Min mucupan uhuun facu mui caashquin cayatan ninon, —ishon niaifoan Jesús yoini. <sup>19</sup>Asca huaino Jesús niaifo fu caino non acho non afu cani.

<sup>20</sup>Nannori ainfon imi imitiani doce fari man aqui cafiano nusu yamacai. Jesús caiton nan ainfoan acachorishori ahuun sahuuti muunni. <sup>21</sup>Mun ataima ahuun nomuran shinanqui isca huani, —Un ahuun sahuuti muuanshu un cayatiroati, —ishon shinanni. <sup>22</sup>Ascashon muuaiton Jesús ifiacucahuatan ainfo fuchishon yoini —Achishtan, ratuyamahuu. Min ua icoinra huashufin min caya sharaquin, —ishon yoiaino ahuun imi

nusuriscatani. Ascaiton mua man caya sharacoian ini.

<sup>23</sup>Asca huatan Jesús niaifoan pushu muran iquicaiquin nica yorafoan aton shainti manuaifoanno futsafo shorarascacani. Fasi achacoin uaicani. <sup>24</sup>Ascaifoan Jesús ato yoini, —Chifi caintacahuun. Na facuca naama. Oshafinquin, —ato huaiton osanifo. <sup>25</sup>Ato caimatan shotocofacu mutsoinifoannaino samamashta funinaca huani. <sup>26</sup>Ascano Jesús shotocofacu man naafiacun funia nicacani pushufoti chanifoanfainifo.

### **Jesús fusho rafu cayahuani**

<sup>27</sup>Ascano Jesús niaifo pushu anoashu caiton fusho rafutan mufainifo. —Min nocon niaifo ipaoni nan David ahuun funa. Nocoahuun ramapaihuu, —oi ashcafinin cunarianifo. <sup>28</sup>Asca huaifono Jesús pushu futsan muran iquicun fusho rafuri afu iquinifo. Iquiafoan Jesús ato yocani, —¿Un mato caya huanon man icoinra huaimun? —huaiton. —Ai, Ifon, non mia icoinra huai, —huaifoan. <sup>29</sup>Aton furo munquin yoini, —Ua icoinra huashufin man cayaquin, —ato huani. <sup>30</sup>Asca huaino oinsharariscatani. Oinsharaifoan Jesús ato yoisharaquin —Ua nicacaquin. Un mato cayahua tsoa yoiyamacahuun, —ishon yoini. <sup>31</sup>Anori yoifiacun nan rafutan nantifi nanno icafo atoqui chaninifo.

### **Jesús nocofunun tsaintiroma caya huani**

<sup>32</sup>Nan rafu pushu murannoashu foaifono futsafoan nocofunu yoshin chaca ahuun nua ascacai tsaintiroma Jesusqui ihuunifo cayahuamanon. <sup>33</sup>Jesús yoshin chaca amaquinoa potano nocofunu tsainon. Nanno icafo mustairitan yoinannifo, —iAira! ¡Oincapon! Nocon mai nan Israeli anoshon Jesús rama aca cuscan tsoa

oinmisimaran, —icanashu yoinannifo.  
<sup>34</sup>Asca huafiainfoan Fariseofoan yoinifo,  
 —Nanton yoshin chacafo aton  
 niaifoahuunshon yoshin chacafo  
 potatiroran, —ishon yoinifo.

### Jesús yorafohuun ramapai

<sup>35</sup>Ascaiton Jesús pushurasifoti nanno  
 Judiofo icano cahuacacaini. Judiofoan  
 ichananti pushu muranshonfin Jesús ato  
 Diosin tsain shara yoiquin isca huani,  
 —Itisharacahuun. Diosin nuno maton  
 niaifo ipairan, —ishon ato  
 yoifoanfaini. Pau futsa futsatapafo  
 caya huani. <sup>36</sup>Yorahuanrasi aqui  
 fuainfoan oin atohuun ramapaini. Aton  
 nomuran omitsiscaifoan. Ascan Jesús  
 shinanquin isca huani, —Chashohuan  
 cushumisioma nanscarifai na yorafo  
 cushumisiomaforan, —ishon  
 shinanniquin. <sup>37-38</sup>Ascashon non afu  
 rafuafo noco yoini, —Yora ichapafoan  
 uhuunoa nicayamafiano ichapamaton  
 ua yonoshocani uhuunoa ato  
 yoishcaquin nanfu nipashquin.  
 Ascashon fasi Upa Dios cucifahuun  
 ahuun yonoshomisifo catonquin  
 uhuunoa ato yoinonforan, —ishon Jesús  
 ato yoini.

### Jesús doce nocofunufu catonni afu rafunonfo

*Mr 3.13-19; Lc 6.12-16*

**10** <sup>1</sup>Ascatan afu rafuafo noco  
 cunani, —Uqui fucahuun,  
 —noco huaino. Aqui fuaifoan noco  
 yononi ahuuscashomafin yorafo  
 ahuunshon cayahuamafain yorafohuun  
 yoshin chaca nuucun atomaquinoa  
 potatiroquin. Ascashon pau isi futsa  
 futsatapaforimain ahuuscashon caya  
 huatirofoquin. <sup>2-4</sup>Nonfin doce iniquin.  
 Nocon anufo un mato yoi. Futsa  
 Simonfiacun ahuun anu futsa Jesús  
 tuqui huani Pedro. Nanton chipocu

Andrés. Futsafoan aton anu Santiago  
 non Juan. Nan rafu Zebedeopan facu.  
 Futsafoan Felipe non Bartolomé un  
 Mateo non Tomás non Santiago  
 Alfeopan facu non Simón futsari nanton  
 ahuun caifo futsafo futan Romanonfo  
 potapai afanan Israelifo yonononfoma.  
 Futsan ahuun anu Judas Santiago facu  
 futsarifi Judas Iscariote nanton Jesús  
 potashon ato achimani. Nocofosi Jesús  
 noco catonni non ahuun rafumisi inon  
 non ahuunshon tsain tapishquin.

### Jesús afu rafuafo doce nichini Dios niaifo icainomain ahuu cuscara iishquicain ishon ato tapimanonfo

*Mr 6.7-13; Lc 9.1-6*

<sup>5</sup>Noco catonshon Jesús noco yonoquin  
 isca huani, —Nan noco caifomafon  
 aton mai ano foyamacain Samaritanon  
 icafo anorifi foyamacahuun. <sup>6</sup>Ari  
 fotamarocon nocon caifo Israelifo  
 muransi fotacahuun. Nanfofin chashoan  
 funoa cuscarafoquin. <sup>7</sup>Ascano focashon  
 ato yoiqui isca huacahuun, “Nocon Ifo  
 Dios samamashta nocoyoshquin noco  
 niaifo iishqui,” ishon ato yoitacahuun.  
<sup>8</sup>Ascashon isinincaifori uhuun  
 curushhuunshon ato cayahuamafain  
 man yora nafiacun funimafain yora  
 nami rashquishi futsafo ato  
 cayahuamafain yoshin chacafo  
 yorafohuun nuucun nanfori uhuunshon  
 atomaquinoa potacahuun. Diosin mato  
 cashman ahuun curush inan cusca  
 huafain futsaforifi caya huasho ato ahua  
 yocayamacahuun.

<sup>9-10</sup>Ascashon focaquin mato ahua  
 foyamacahuun. Pui foyamafain mato  
 sahuuti yafi sapatori foyamafain forusa  
 yafi poquitiri foyamacahuun. Nan man  
 nuta fustiya fotacahuun. Man  
 uhuunshon uhuun tsain shara ato  
 tapimanaiton arifi man yopai cuscan  
 mato inantirofo.

<sup>11</sup>Ascan nan man pushurasi ano nocoaitian nocofunun Dios tanasharacoian funacahuun nan fuchiashu ahuun pushu muran iyoshon ato yoifoanfafaicahuun nan man caitian. <sup>12</sup>Ascatan ahuun pushu muran icaquin nan pushu ano icafo ato yoiquin isca huacahuun, “¡Aicho! Min pushu muran non oiran,” huacahuun. <sup>13</sup>Ascasho nan pushu ifo futan ahuun yorafoanari mato shara huano ato yoihuu isca huaqui, “Dios mato ointi shinanshara huamashquiran,” ishon. Ascafia mato tanasharayamaifoancai Diosin aton ointi shinanshara huamashquima. Ascano Diosicai mato ointi shinanshara huamaqui unuima.

<sup>14</sup>Ascan rato pushu futsa iyamarai pushurasi anofoanari mato nicacasmaiffoan atomaquinoashu focaquin maton sapato tatashacahuun. Ascaquifin man ato ismatiroquin mato nicacasmaiffoan Diosirifi nicacasmaifo cuscan. <sup>15</sup>Un mato icon yoi. Diosin nantifi nan chaca huamisifo ato yoipacuaitian nan Sodoma yafi Gomorra ano ipaonifori ato onaintimashqui. Ascashon nan mato nicacasmaiffoan natian ato onaintimaquin finacoinshquin.

**Diospan tsain ato yoiaiffoan  
nicacasmacaqui ato omitsisca huanifo**

<sup>16</sup>Chashoanfo masharonun pipaitiro. Nanscarifiai nan icoinra huamafoan mato chaca huapaitirofo. Ascafia nanfo muran un mato nichu. Ascacun nan rono onanya cuscara marifi icahuun. Ruhuincai ahua shinanchacamisima cuscan marifi nanscarifi isharacahuun.

<sup>17</sup>Ascacun oinfain. Nan yora chacafo masharo pofu cuscarafo mato achimatirofo. Ascano achicashon aton niaiffo ano mato iyotirofo. Asca huashon aton ichananti pushu

muranshon mato ihuin futsa coshamatirofo. <sup>18</sup>Ascashori niaiffo ano mato iyocani uhuunshon mato nansca huacani. Ascafia nanfo yafi caifo futsafori nan tsain shara uhuunoa man ato yoitiro. <sup>19</sup>Ascatan mato achifiafo shinanchacamacahuun ahuuscashomain man ato cumasharaicai. Ascashon niaiffoan ointaifi mato yocaifoanno nantianri Upa Diosin mato shinanmani man ato cumasharonon. <sup>20</sup>Man ato yoiaitiancai mafi man ato yoima. Maton Upa Diosifin aficoi yoi cafisca huaiquin ahuun Yoshin Sharapan man ato yoipai cuscan mato huashoi.

<sup>21</sup>Ascano nantianri nocofunfoan ahuun yora afu nanufo achimacani niaiffoan ato rutumanon. Apafoanri aton facufo achimacani ato rutunonfo. Nanscarifi huaquin facufoan aton apa yafi ahua nicacasmacaquin ato achimani niaiffoan ato rutunonfo. <sup>22</sup>Ascasho nantifi yorafoan man ua icoinra huacun uhuunshon mato noicasmacani. Ascan omitsiscaiffoan man ua potama nan man naitian uhuun tsain tanasharashu Upa Dios fu man ipasharaiqui. <sup>23</sup>Ascan pushurasi futsa anoshon mato omitsisca huaiffoanno pushurasi futsa ano ichotacahuun. Ascacun un mato cayacafi yoi. Ua nicasharacahuun. Israel pushurasifo atirifi ari man cataima un afanan matoqui nasoshquin.

<sup>24-25</sup>Ascano ahuunshon tapiafoancai ato tapimamisi finontiro. Oinmatifoanricai ato ifo finontirofoma. Ascashu marifi man ua cuscara iishqui. Ua chaca huamisifo cuscan matorifi nansca huashceni. Nanfoan ua noicasmacaquin ua yoimisifo isca huaquin, “Minfin yoshin chacafoan ato niaiffoquin,” ishon ua yoimisifo. Un mato ifofiacun ua asca huamisifo. Ascan

matocai fin asca huaquin  
finacaicaniquin.

**Tsoaquimain man ratutiroquin**

*Lc 12.2-7*

<sup>26</sup>Ascacun mato omitsisca  
huafiaifoanno atoqui ratuyamacahuun.  
Nanfoan ahuarashta onupaifiamisi  
nantifi Diosin ato puashoshquin.  
Ahuarari fomanpaimisifo nanfori ato  
puashoshquin. <sup>27</sup>Ahuara un mato fusti  
yoimisi nanfo nantifi yorafo cayacafi ato  
yoisharacahuun. <sup>28</sup>Ascasho mato  
rutupaifiaifoanno ratuyamacahuun.  
Mato rutufiatirofocai maton yoshin  
tsoan ahuusca huatiroma. Ascacun  
atoqui ratucaquimarocon Dios fustiqui  
musucahuun. Nantofin noco rutufain  
nocon yoshin omitsiscapanacafo muran  
potatiroquin. <sup>29</sup>Ascano tsitsipio rafu  
inanmitsashon toro fustishtaraca fitiro.  
Ascafia mato Upa Diosin asca  
huapaiyamaquicai fustishta  
namatiroma. <sup>30</sup>Diosin nantifi tapicoian.  
Nocon foori tanan huani. <sup>31</sup>Ascashon  
Upa Diosin tsitsipiofo shinanmisi cuscan  
fasi mimacai mato shinanfainiquin.  
Ascacun ratuyamacahuun. Matocai fin  
tsitsipio aca finonmafain Diosin  
matohuun noiquin. Cushushon mima  
huaquin mato cushusharamisiquin.

**Yorafoan ointaifi, —Jesús  
uhuun Iforan, —huaa**

*Lc 12.8-9*

<sup>32</sup>Ascano yorafoan ointaifi, “Jesús  
uhuun Iforan,” ishon ato yoiafin uhuun  
Upa Dios nai muran icanoshori ahuun  
ointaifi, “Naa fin uhuun yoraquin,” ishon  
un yoishquin. <sup>33</sup>Ascafia tsoan yorafoan  
ointaifi, “Jesús uhuun Ifomaran,” ishon  
yoia. Nantocai ua icoinra huamisima.  
Nanscarifi huaquin uhuun Upa Diosin  
nai muranshon ahuun ointaifiri “Nacai  
uhuun yoramaran,” ishon un yoishqui.

**Jesushuunoacai yorafoan anorisi  
shinanfoma**

*Lc 12.51-53; 14.26-27*

<sup>34</sup>Man shinanmun nantifi manifoti  
anoafo uhuunoashu unimanonfo un oni.  
Ma. Ascaramafiqui. Un mato yoiai  
cuscacai tsoan nannorifosi shinancanima.  
Asca nan ua icoinra huafoan sharafo  
shinainfoanno nan ua icoinra huamafoan  
ahuara chaca futsafosi shinancani.

<sup>35</sup>Ascashon apa ua icoinra huaino  
furumun ua icoinra huashuma apaqui  
sinatiro. Ahuanri ua icoinra huaino  
ainfacun ua icoinra huashuma ahuaqui  
sinatiro. Ahuun yayan ua icoinra huaino  
ahuun raru ua icoinra huashuma ahuun  
yayaqui sinatiro. Un nai murannoashu  
matoqui oyamanicai tsoa ascacuanafoma.

<sup>36</sup>Nanscarifi aquicai tsoan nannorifosi  
uhuunoa shinancanima. Ascano tsoan ua  
icoindra huacun ahuun yoracoinfoan nan  
noicasmatirofo.

<sup>37</sup>Ascan tsoan ua finonmafain apa yafi  
ahua noiashucai uhuun yora itiro. Ma.  
Nanscarifi tsoan furu yafi ainfacu ua  
finonmafain noiashucai uhuun yora  
itiro. <sup>38</sup>Ascan unfin mato ihui coyan  
iquinanquin nashoshquicain. Ascafia  
tsoan yoiqui isca huaima, “Natian un  
Jesús tana. Ascacun nai omitsiscafiaquicai  
un shinanchacaimaran,” ishon tsoan anori  
yoicasmaicai uhuun yora itiro. Ma.

<sup>39</sup>Ascashon tsoan shinanqui isca huai,  
“Un Jesús tanaiton raca ua omitsisca  
huacanicati,” ishon shinanqui uhuun tsain  
cachiquiri huashu nanscara yorafo  
omitsiscapanacafo. Asca tsoa uhuunoashu  
omitsiscafiaqui ua potama nanscara  
yorafori naashu ufu isharapacunacafo.

**Ahuara shara noco Diosin inain cuscan**  
*Mr 9.41*

<sup>40</sup>Ascano ratoranfoan mato nicafain  
mato shara huaifo. Nanfoanfin nan

uacoin shara huai cafisca mato huacanicuin. Nanscarifi aquin tsoan nan un yoiái cuscan nicacoin yafi nan ua nichini uhuun Upa Dios nicacoin cafisca huaiquin. <sup>41</sup>Ascashon tsoanri Diosin tsain yoimisi ahuun tsain nicacoinfain shara huacun Diosin nanrifi nan ahuun tsain yoimisi inanshara cuscan huaquin nan shara huari inansharashquin. Ascashon nan Dios tanamisi yora shara futsan ahuun tsain nicasharafain shara huacun, Diosin nan a tanamisi inanshara cuscan huaqui nan shara huarifi inansharashqui. <sup>42</sup>Ascano tsoan ua rama icoinra huashon ua tanaiton futsan a shara huaqui unu matsi ayamacun. Ascacun Diosin arifi a futsa shara huaa. Ahuara shara inanshquain cuscaí funotromaran, —ishon Jesús noco yoini.

**Nan Juanpan ato unu muran  
iquimapacumisitón a tanamisifo  
Jesusqui nichini**

*Lc 7.18-35*

**11** <sup>1</sup>Ascatan non afu rafumisifo doce noco yoiqui anaititan pushurasi futsafo ano Jesús noco iyoni. Nannoafori ato yosifain ato tapimaicai ahuuscashumain non Dios fu ipatiroquin. <sup>2-3</sup>Ascano nantianri Juanpan nan unu muran ato iquimapacuni ranushumufoan cunu muran iquimanifo. Nan muranshon Jesús acái cuscan nicaquin ahuunoa fasi tapisharapaiqui. Nan cunu muranshon a tanamisifo nichini Jesús yocanonfo. Ascano nan Juanpan ato yonoo cuscan focashon Jesús yocaquin isca huanifo, —¿Iconmun nan minmun nan non manamisi iyamarai futsa raca non manaicai? —ishon Jesús yocanifo.

<sup>4</sup>Ascaiton Jesús ato cumaquin isca huani, —Nan man nica cuscan yafi man oian cuscari Juan tapimatacahuun.

<sup>5</sup>Yora fushocoinfo un ato cayahua afanan oinsharanonfo. Nipaiqui ranainfori un ato cayahua nisharanonfo. Ato yoratiso coyo cuscara tocoi futsuafori un ato caya huaa afanan imisi cuscan ato nami shara inonfo. Pastocoinfori un ato cayahua nicasharanonfo. Man yora naacoinnafori un afanan ato funimana. Ascashon ahuuomafori tsain shara un ato yoifafainmisi ahuuscashumain Dios fu ipatirofoquin. <sup>6</sup>Ascan tsoan ua icoinra huacoinshon ahuara futsa shinainma. Nan cuscara yorafofin unimacointiroquin. Nannori ua Juan yoishotacahuun, —ishon Jesús ato yoini.

<sup>7</sup>Ascatan man foafono Juanhuunoo Jesús nanno niafo ato yoini, —¿Ahuuscai tsoa istaipama ano Juan oin focani fonifomun? Juancai nan faca tahua pui ninhuun focufocu acái cuscarama. Nanscarifiái man man tapia Juancai nocofunu ointi ranainyama. <sup>8</sup>¿Ascacun ahuuscai Juan oinpai man fonimun? ¿Man shinanmun a nocofunun sahuuti sharacapa sahuucun oin foi man foni? Ma. Juanpacai sahuuti sharacapacoin sahuumisima. Niaiffoanfin aton pushu muranshon sahuuti sharashtacoin sahuutirofoquin. <sup>9</sup>¿Ascán ahuuscai oinpai man fonimun? Man shinanraca Diosin tsain yoimisi Juan oincai man cani. Ascafia nan icon. Juanpan Diosin tsain yoimisifia nanton yoimisi cuscaí tsoa futsafoan anori yoimisima. <sup>10</sup>Ascacun nanhuunoo Diosin tsain cununi isca huaquin, “Min nai ariashu mai ano fotoataima iquisi uhuun tsain yoimisi un nichiqui tau huai. Mihunoo ato yoiaino itisharashon mia nicanonfo,”

ishon cununi. <sup>11</sup>Un mato icon yoi. Tsoashtacai Juan finoanma. Ascashon

Juanpan tsain yoimisi cuscaricai tsoan ascara yoiyomisima. Ascafia Dios niaifo icanoafoan yoisharatirofo cuscacai Juanpan nicayamafain nanfoan oianfo cuscaricai Juanpan oinyomisima. Ascashon nantifi Dios icanoafoan Juan finoanfo. <sup>12</sup>Nan Juanpan ato unu muran iquimapaunitian natianri yorafo Dios icano fasi iquipaicoincani. Ascashon shinanqui isca huafo, “Diosin niaifoan ahuun yora urifi un ipai afu nipashquin. Ascacucái ahuashataton ua nitun huatiroma un ahuun yora icaiton,” ishon shinancani. <sup>13</sup>Diosin tsain yoishomisifo futan Moisés cununi cuscan yoiquin isca huanifo, “Nan nocon numamisi noco niaifo oshqiran,” ishon yoinifo. Ascan natian Juanrifi man matoqui noco ahuunoari mato yoishquin. <sup>14</sup>Nanfoan cununifo cuscan icoinra huashon man tapitiro Juan arifi Diosin tsain yoimisi nan Elías cuscara. Ascacun Diosin tsain yoimisifoan cunuqui isca huanifo, “Un matoqui Elías nichishqiran,” ishon Diosin yoini. Ascan nanfin Juanquin. <sup>15</sup>Manmain ua nicatiroquin ua nicacahuun. Uhuun tsain maton nomuran nanushcaquin. <sup>16</sup>Ascashon natian niyoafo ahuu cuscarafomainquin un mato yoi man tapinon. Nanfofin nan facu cashumisifo cuscarafuquin. Facufo cashucaquin afu facu futsafo oi ashcafinin cunatirofo. Nanscarifiai nanfofin nanscarafuquin. <sup>17</sup>Nan facu cashumisifoan yoitirofo isca huaquin, “Man non shainti manufiainocai monopaicanima. Fanainca omitsiscati cuscara non fanaifiainocai man uaipamaran,” ishon nan facu cashumisifoan yoitirofo. <sup>18-19</sup>Nanscarifi aquin nanfoanri Juan yafi uqui tsain chipufafaini. Ascafia Juanpacai piqui tunufain fimi unu pau ayamisima. Ascacun ahuunoa yoiqui

man isca huamisi, “Juan nisocoin. Yoshin chaca ahuun nuaran,” ishon yoimisifo. Asca finin pii sharafain un aya sharamisiquin. Ascafia uhuunoari yoiqui isca huamisifo, “iCuu! Jesús pitsicoin fasi ichapari ayatiroran huafain Roma anoa niaifo puifishomisifo yafi yora chacafo furi rafuiran,” ishon uhuunoa chaca yoimisifo. Ascafia nanfoanri yoiqui isca huamisifo, “Tsoamain shinansharafain icaquin non onantiro. Nan yorafin isharacoianquin shinansharamain huaifin,” ishon nannori yoimisifo. Nannori yoifiaquicai uhuunoa ascara yoipaimisifoma. Ascatarocon uqui tsain chaca fusti huamisiforan, —ishon Jesús ato yoini.

**Pushurasi anoafo nicayosmashunifo**  
*Lc 10.13-15*

<sup>20-21</sup>Ascano ato yoiqui anaititan Jesús nan pushurasi anoafo ato yoiqui isca huani, —iOhua! Man Corazín anoafo yafi Betsaida anoafoan man chipo fasi omitsiscái. Tsoan oinyomisima cuscara shara un mato ismafiano mancai chaca shatupaima. Ascan nan Tiro anoafo yafi Sidón anofori un mato isma cuscan un ato ismaiton nanfoan aton chaca shatucanafo. Ascasho yoicunafo isca huaqui “iOhua! Non fasi chaca huamisi. Ascacun natian Diosiqui nasoshon non nicasharanoncahuun,” ishon yoicunafo. <sup>22</sup>Ascafia Diosin nantifi icoinra huamafo onaintimaitian nan Tiro anoafo yafi Sidón anoafori onaintimafiaquicai mato onaintimaquin finai cuscan ato huaima. <sup>23</sup>¿Ascan man Capernaum anoafoan man shinanmun man nai muran Dios ari foicai? Ma. Omitsiscapanacafo muranrocon mato potai. Tsoan oiyomisima cuscara shara un mato ismafaiatocai maton chaca man shatupaima. Ascan nan un mato isma



cuscan Sodoma anoafo un ato ismaiton aton chaca shatu cuanifo. Tsoaricai cuyocuanama. Nantianri aton pushurasi icuana. <sup>24</sup>Un mato yoi. Diosin nantifi icoinra huamafo onaintimaitian nan Sodoma anoafori onaintimafiaquicai mato onaintimaquin finai cuscan, —ishon Jesús noco yoini.

**Uqui fucahuun. Un mato ointi fiananan huashonon man afanan shinanchacanoma**  
*Lc 10.21-22*

<sup>25</sup>Ascano ato yoiqui asca huatan Jesús apa cufini, —Upa Diosin, min fasi sharacoin. Nantifi nai murannoafo futan mai anoafoan aton Ifofin minquin. Ascano nan mapo sharayafo yafi cunu tapiafocai min tsain shara min ato tapimanama. Ascfia nan cunu tapiamafishon un ato isma cuscan un ato yoiai cuscan ua icoinra huafo. Nanfofin min ato tapimanaquin. <sup>26</sup>Icon, Upan, minfin nanscara fuchipaiquai, —ishon apa yoini.

<sup>27</sup>Ascashon Jesús afanan ato yoiquin isca huani, —Upa Diosin tapia cuscan uarifi nantifi tapimani. Unfin Diospan facuquin. Diosin fustitofin ua onancoianquin. Nanscarifi aqui urus fusti Upa Diosin un onancoian. Nanscarifi aqui urifi un futsafo Upa Diosihuunua onanmanai cuscan nanfoanri Upa Diosin onantirofoquin.

<sup>28-29</sup>Ascacun uqui fucahuun ua tapishashcaquin. Unmain ahuu cuscaraquin un mato tapimai. Unfin yorafohuun ramapaimisiquin. Uhuun nomuranricai un ahuashta shinanchacayamafain un isharacoin fustimisi. Ascashon un mato yonomapayai cuscaai curushma. Nanricai ahua ihuuma. Ascacun maton nomuran ihuucuin mui uqui fucahuun un maton ointi fiananan huashonon

man afanan shinanchacanoma.

<sup>30</sup>Ascano uqui oshon man mutiro un mato curush yonomaima.

Ascatarocon ua tanasharacoinyashu mato ointi fiananan huashon man isharacointiroran, —ishon Jesús ato yoini.

**Jesús fu rafumisifoan tunutitian trigo fimi mutusnifo**  
*Mr 2.23-28; Lc 6.1-5*

**12** <sup>1</sup>Ascatan Israelifoan aton tunutitian Jesús yafi afu rafumisifo mau mamaqui focaquin trigo mutuscashon fonaincoinaquin piyaifoan. <sup>2</sup>Oincaquin Fariseofoan Jesús yoinifo, —¿Ahuuscai nocon shuni Moisés yononi cuscaai minhuunshon tapimisifoan nicapaicanimamun? Tunutitian trigo mutuscaniran, —huaifoan.

<sup>3</sup>Jesús ato cumaquin isca huani, —¿Davidhuunua cununi cuscan man oinmismun? ¿Fonainquin nocon shuni David ahuun yorafo futan ani cuscan man man nicamismun? <sup>4</sup>Dios fu tsainti pushu muran iquicaishon amurannoa misifo ato piquini fasi fonicoquin. Ano tushu futsa yamaino. A misifofin nan Diosin tsain yoimisinafosi iniquin. Tsoa futsacai a misi pitiro inima. Nannori yonofianifo fasi fonicoquin David afu rafuafo futan pini.

<sup>5</sup>¿Ascashon Moisés cununi cuscari man man oinmismun? Cunuqui isca huani, “Dios fu tsainti pushu muranshon tunutitian ahuun tsain yoimisifoan yonotirofo. Nanfoan yonofiaquicai ahua chaca huacanamaran,” ishon Moisés cununi. <sup>6</sup>Ascatan un mato yoi. Dios fu tsainti pushu fasi sharashtafia uncaifin fasi shara finaciaquin. <sup>7</sup>Upa Diosin yoini cuscan cununi isca huaquin, “Man ua inafa rutushomisi un maton chaca

soashonon. Nan sharafia man futsafohuun ramapaiquin man ato shara huai. Nancaifin fasi shara finaciaiaquin. Nan fusti un fasi fuchipairan,” ishon yoini. Ascacun nan tapicoinshocai man ufu rafumisifohuunoa yoicuanama, “Nanfoan chaca huaforan,” ishon. Afoantsi ahua chaca huacun. <sup>8</sup>Uafin uhuun Upa Diosin catonniquin. Ascacufin urusu fusti un yoitiro ahuamain tunutitian man huatiroquin, —ishon Jesús ato yoini.

**Nocofunu mucu musufiquia**

*Mr 3.1-6; Lc 6.6-11*

<sup>9-10</sup>Ascatan Jesús Israelifoan aton ichananti pushu muran iquini. Nanno iquishon ato yosiaino nantianri nocofunu musufiquiaton arifi nicani. Ascano nan Fariseofoan Jesushuunoa ahua chaca yoipaicaquin nan yocanifo. —¿Nocon shuni Moisés yononi cuscacun tunutitian non yora caya huatiro yamarai non caya huamatiromanmun? —ishon yocaifoan. <sup>11</sup>Jesús ato cumani, —¿Man chashoan ayano tunutitian quini muran pacucun man ihuiriscatiromamun? Ma. Ascataka manrocon ihuiriscatiro. <sup>12</sup>Nanscarifi huaquin fasi noicoquin nocofunuhuunoa tunutitianfiacun non shinantiro. Moiséscai noco yononima tunutitian non yora cayahuanoma, —ishon ato cumani.

<sup>13</sup>Ascashon nan nocofunu musufiquia yoiqui isca huani, —Mushahuun, —huaino. Mushatanaino nantian ahuun mucu muma sharacoin iriscatani. Nan ahuun mucu ocuma futsa cuscara shara ini. <sup>14</sup>Ascaiton oincanashu Fariseofo focashon shinannifo —¿Ahuuscashomun non Jesús achitiroquin rutushquin? —icashu yoinannifo.

**Upa Diosin ahuun facucuin catonni ahuun oinmati cuscara inon**

<sup>15</sup>Jesús tapitan a rutupaiyaifoanno anoashu cani. Yorahuanrasiton

mufainifo. Ratomain isinincai nanfo cayahuamani. <sup>16</sup>Ato cayahuatan ato yoini, —Uhuunoa tosa yoyimahuu, —ato huani. <sup>17</sup>Nannori ato yoi Isafas cununi cuscan icocoin inon. <sup>18</sup>Isaiasin Diosin tsain cununi isca huaquin, “¡Oincapon! Naqian uhuun oinmati cuscara un catonni. Un fasi ahuun noi. Un aqui unimacoin. Uhuun Yoshin Shara un afu rafumamisi. Nan manifoti uhuun tsain nicasharacun atorifi aton chaca yama huashotiro uhuun yora inonfo. <sup>19</sup>Acai yora futsa fu fochishmanantanainma. Tsain isininpaton yoishquima. <sup>20</sup>Nan yora omitsiscaifan afanan tunutirofoma ato potaima ato cushusharai tunumashquin. Tsoan icoinra huapai ato yoisharashquin icoinra huacoinonfo. Ascan huaino afanan mai ano oaitian nantifi chacafoti unumashquin ahuunshon nantifi ishara fustisinonfo. <sup>21</sup>Nantifi manifoti ahuunoa nicaquin isca huacani shinanshaquin, ‘Nan fustiton noco numatiro non ahuunoashu Upa Dios fu nipanon,’ ishon yoishquicaniran,” Isafas cununiquin.

**—Satanashuunshon Jesús yoshin chacafo potairan, —ishon yoinifo**  
*Mr 3.20-30; Lc 11.14-23; 12.10*

<sup>22</sup>Ascatan nocofunu fusho icain tsaintiroma. Ahuun nuushon yoshin chacanun tsainmapaonima nan Jesúsqui ihuunifo caya huanon. Ascacun Jesús nan nocofunu afanan oinmasharafain tsainmani. <sup>23</sup>Ascaiton oincani mustaiaricatan afiranan yoinancaquin yoinifo, —Jesús ahuamamishti shara huatiro. Asca nan naraca David ahuun funa. Nan Upa Diosin catonni, —ishon yoinifo.

<sup>24</sup>Ascaifoan nicaquin Fariseofoan yoinifo, —Ma. Atocai Upa Dioshuunshon yoshin chaca potama. Yoshin chacafoan aton niaifo Satanashuunshon yoshin chaca yorafohuunoa potatiroran, —ishon yoinifo. <sup>25</sup>Ascano nan shinainfo cuscan onanshon Jesús ato yoini, —Mani futsafo afi ranan rutunain cuyotirofo. Nanscarifiai pushurasi anoa icafo iyamarai pushu fusti muran icafo afi ranan chaca huatananfaincaini pashcanantirofo afanancai tsoa anosi itiroma. <sup>26</sup>Nanscarifiai Satanás niaifoan afu yoshin chacafo potaquin ahuun yono chacana huatiro. Asca huaquin ahuun yono cuyocointiro afu yoshinfocai afanan afu itirofoma. <sup>27</sup>Ascafia manfin yoimisiqui Satanás curushhuunshon yoshin chaca potaran ishon man yoimisiquin. ¿Un asca huaino tsohuunshon mato yorafoan yoshin chacafo atomaquinoari potafoman? Ascacun nanfohuunshon man tapitiro man uhuunoa amaquri shinanchacai cuscan. <sup>28</sup>Un Diospan Yoshin Sharahuunshon yoshin chacafo atomaquino potaino maton Numamisi Diosin catonni cuscan matoqui nocoa. <sup>29</sup>Afanan mato yoi nicasharacahuun. Ahuuscashomain yorafoan nocofunu mutsisipaton ahuun pushu cushu ano ahuun mafo onutiroma. Ascafiafaino finoncaia aqui nocoshon achifain munushquin ahuun mafofo cuyonfiatocai ahuusca huatiroma. <sup>30</sup>Tsoan unfu rafupaiquima ua nicacasmai. Tsoan uhuun tsain nicacasmaifin ua noicasmaiquin. <sup>31</sup>Ascano un mato icon yoiquin. Ratoran ahuara chaca huai Diosquiri Upa Diosin rau huashotiro. Ascanfia ratoranton yoia isca huaquin, “Nanton aca cuscan Satanashuunshon acaran,” huafiashu Diospan Yoshin Sharahuunshon aca.

Nanton Diospan Yoshin Sharahuunoa tsain chaca huaa. Asca huacun Upa Diosin ahuun chaca rau huanacama. Ahuun chaca ahuun nuupacunaca. <sup>32</sup>Tsoan ua chaca huafin un ahuun chaca rau huashotiroquin. Ascan tsoan Upa Diospan Yoshin Sharaqui tsain chaca huacai Upa Diosin rauhuanacama. Ahuun chaca ahuun nuupacunaca. Natian naitianri ahuun chaca ahuun nuupacunaca.

**Fimi fana ahuun fimihuunshon non onantiro**

*Lc 6.43-45*

<sup>33</sup>Ascano shinancapon. Fimi fana naman non orosharaino fana foaisharatiro. Ascashu ahuun fimirifi sharacoin itiro. Ascan non fana naman oroamacai fana foaisharatiroma. Ascashu ahuun fimiri chacacoin itiro. Fimi fana ahuun fimihuunshon non onantiro ahuu cuscaramainquin. <sup>34-35</sup>Nanscarifiai nocofunu sharapan ahuun nomuranshon ahuara sharafosi shinain cuscan ahuun tsainrifi sharacoin itiro. Nanscarifiai nocofunu chacapan ahuun nomuranshon ahuara chacafosi shinain cuscan ahuun tsainri chacacoin itiro. Ascano nocon ointi muranshon non shinain cuscan nannoricoin non yoitiro. Ascan manfin nan rono paupaton facu cuscarafuquin. Ascacun ahuuscashotsi chacacoinfiashon man ahuara shara yoitiro. <sup>36</sup>Ascacun un mato yoi. Ratoran shafatan Diosin nantifi yorafo ichanan huaitian ato yoipacushqui ratotonmain icoinra huamisi iyamarai icoinra huamisimaquin. Nantianri ahuashta shinantama yoimisifo cuscan ato puashoshquin. <sup>37</sup>Ascashon man niyoano nantifi man yoimisi cuscan Upa Diosin mato nicamashquin. Ascan mato tsainhuunshon man afu ipatiro iyamarai

mato omitsiscapanacafo muran mato potairan, —ishon Jesús ato yoini.

—Tsoan atiroma cuscan noco ismahuu non mia icoinra huanon, —ishon yora chacafoan Jesús yoinifo

*Mr 8.12; Lc 11.29-32*

<sup>38</sup>Ascaiton Fariseofo futan Moisés cununi cuscan tapimamisifoan yoinifo, —Tapimamisiton, tsoan atiroma cuscan noco ismahuu min Dios ariashu oa non mia icoinra huanon, —ishon yoiainifo.

<sup>39</sup>Jesús ato cumani, —Manfin chaca shinanfain Dios cachiquiri huamisiquin. Ascacun tsoan atiroma cuscan noco ismahuu ishon man ua yoia. Ascafia nan Diosin tsain yoimisi mato shuni Jonás ani cuscaicoi un chipo mato ismaiton nan fusti man oinshquin. <sup>40</sup>Jonás shimanoan shaqui muran osha rafu non fusti iyoni cuscan. Nanscarifiai un Diospan Facu mai muran osha rafu non fusti un iyoshqui. <sup>41</sup>Ratoran shafatan Diosin nantifi yorafo ichanan huaitian ato yoipacushquin ratotonmain icoinra huamisi iyamarai icoinra huamisimaquin. Ascaino nantianri Nínive ano ipaonifoan matohuunoo yoishcani isca huacaquin, “Jonás noco Diosin tsain yoini cuscan non nicacoinshon nocon chaca shatucoishon non Dios icoinra huani. Asca man manfin Diospan furucoi nicafiashocai maton chaca man shatumisimaran,” ishon mato yoishquin. Nan icon un Jonás finonfiacucai man ua nicapaimisima.

<sup>42</sup>Nanscarifiai Diosin nantifi yorafo ichanan huaitian ato yoipacushquin ratofomain afu ipatiro iyamarai omitsiscapanacafo muran foshquicaniqui. Ascaino nantianri nan ainfo Sabafoan ato niaifo ipaoniton matohuunoo yoiquin isca huashquin, “Salomón tapicoian cuscacai tsoan

futsan tapipaonima. Ascacun ahuun tsain nicapaicoi un aqui chaicunoashu cani. Ascan mancai nan Diospan Furun nicapaima. Ascatamarocon man nicascamapaoniran,” ishon matohuunoo yoishquin. Nan icon Salomón tapicoian ipaonifia uncaifin fasi Salomón finoncoinfacucai mancai ua nicapaima.

**Yoshin chaca afanan yoraqui nasotiro**

*Lc 11.24-26*

<sup>43-44</sup>Yoshin chaca nocofunumaquinoashu cai tsoan istaipama ano cani shara futsa funai cai anoshon tunushquin. Ascafia fuchiamacaiqui yoshin chacanun afanan shinanqui isca huani, “Unfin nan nocofunuuun ipaoniquin. Ascacun un afanan aqui nasoiran,” ishon shinanni. Ascatan aqui nocoshon oian tsoa futsacai afu rafua inima. <sup>45</sup>Ascacun nan yoshin chacanun afu yoshin chacafo siete ato ihuuni nan fasi chaca finacai fo. Ascashon ato yoiqui isca huani, “Nocofunu un mato ismai non ahuun nomuran iquitiroran,” ishon ato yoini. Ascatan aqui focanashu iquicainai foanno nan nocofunu fasi mimacai chacacoin ini. Manmain aqui rananri focun. Nanscarifiai maton shunifoan chaca huafiapaonifo mancaifin fasi chaca huquin finacoianquin, —ishon Jesús ato yoini.

**Jesús ahua yafi ahuun ushtofo**

*Mr 3.31-35; Lc 8.19-21*

<sup>46</sup>Ascatan Jesús yorahuanrasi yoi tsaincai muran ahua yafi chipocufu noconi. Ascano aqui iquishon ahuara yoipaifiaquin chifishon mananifo.

<sup>47</sup>Ascaiton futsan yoini, —Min uhua futan ushto rananun chifi nishon mia ahuara yoipai fuaforan, —ishon yoiainito.

<sup>48</sup>Jesús cumani, —Un mato tapimai ratofomain uhuun uhuafo yafi uhuun

ushtofoquin, —ishon yoini. <sup>49</sup>A tanamisifo oinyacuquin ato yoini, —Nafofin uhuun uhua cuscarafu yafi uhuun ushto cuscarafuquin. <sup>50</sup>Nan uhuun Upa Dios nai ari icaton ato amapaiyai cuscan huaifo nanfofin uhuun ushtofo yafi uhuun chicofo non uhuun uhuafuquin, —ishon Jesús ato yoini.

**Fimi ushu saacaihuunooa cuscara  
ato Jesús yosini tapinonfo**

*Mr 4.1-9; Lc 8.4-8*

**13** <sup>1</sup>Ascatan nan shafatari Jesús pushu murannoashu cai ian cusumun tsaoni. <sup>2</sup>Ascaino aqai yorahunrasi funifo ahuun tsain nicapai cani. Ascaino shasho muran nanuinacahuan ahuun cusha camaqui tsaoshon ato yoini. <sup>3</sup>Ascashon ahuara futsahuunooa cuscara ato yoini ato tapimashquin. Yoini isca huani, —Nocofunun ahuun noshati murannooa fimi ushu fishon ahuun mau mamaqui saani. <sup>4</sup>Saacano ushufo fai nushmancayan pacua puiyafuon piinifo. <sup>5</sup>Ascaino ushu ranan toquiri camaqui pacua mai ichapamashta anoashu samamashta ushu foaica. <sup>6</sup>Fari tsacaqui yositimahuaino man naa. Ahuun taporicai chai foama ini. Ascashu fanafo nai cuyoa. <sup>7</sup>Ascaino ushu rananri tasha murannoashu foaifishucai ushu futsa foaisharanima. <sup>8</sup>Ushu rananri mai shara ano saaca nan mai sharanoashu nantifi foaisharashu fimi ichapayacoin ini. Futsa cien fimiya icaino futsa sesenta aya icaino futsari treinta fimiya ini. <sup>9</sup>Ascaino manmain ua nicatiroquin ua nicacahuun uhuun tsainri maton nomuran nanucoincahuun, —ato huani.

**Ahuuscaquimun futsafo yoifiashon Jesús  
afu rafuafosi shafacafi ato tapimaniquin**

*Mr 4.10-12; Lc 8.9-10*

<sup>10</sup>Ascaino non afu rafua aqai fucashon yocanon, —¿Ahuuscái shafacafi ato

yoitama ahuahuunooa cuscara min yorafo ato tapimashquinmun? —ishon non yocani. <sup>11</sup>Jesús ato cumani, —Ahuuscashomai Upa Diosin ahuun yorafo iquiniquin mato fusti tapimai. Ascaino nafocai ato tapimaima. <sup>12</sup>Ascaino tsoan Diosin tsain nicasharafain ahuun nomuran nanucoian naanfin Upa Diosin paratamari tapimashquin. Ascaino tsoan ichapama tapifiashon Diosin nicasharayamafain nan yoiya cuscan aima nanfin funoshquiquin. <sup>13</sup>Ascaino nan yorafo un ahuara futsahuunooa cuscara un ato tapimashquin oinfiacashon tapinonfoma. Nicafiaquiri tapinonfoma. <sup>14</sup>Nannori Isaías nan Diosin tsain yoimisi ipaoniton atohuunooa inon pacocai yoiqui isca huani,

“Man nicafafaiquiaicai Diosin ato yoiyai cuscan tapinacafoma. <sup>15</sup>Nan yorafoan aton ointi curushcoinyashu nicayosmashunifo. Diosin tsain man nicamisifiashu nan nicama cuscarafu. Uhuun yonoshara oinfiacani nan futsoi cafiscaafu. Ascaino un ato isma cuscan oianfoma. Ascayamacanashu uqui fucuanafu un ato chaca soashonon uhuun yora sharafo iishcaqui,”

ishon Diosin yoini cuscan Isaiasin cununi.

<sup>16</sup>Ascaino nannori Isaías cunufiani mancai ascarama. Ascaino mancon un mato oinmana cuscan man icoinra huafain un mato yoiya cuscan man nicacoinmisi. Ascaino maton nomuran man unimacoinna. <sup>17</sup>Un mato icon yoi. Man oian cuscaicai uhuun Upa Diosin ahuun tsain yoimisifo futan a tanamisi futsafoanri fasi oinpaifiaquiaicai tsoan oinpaonima. Un mato yoimisi cuscan fasi nicapaifiaquiaicai tsoan nicapaonima.

**Fimi ushu saamisihuunooa yoifiashon shafacafi afu rafuafo tapimani**

*Mr 4.13-20; Lc 8.11-15*

<sup>18</sup>Nan fimi ushu saamisihuunooa un ato yoia cuscan natian shafacafi un mato tapimai. Ascacun ua nicasharacahuun tapisharashquin. <sup>19</sup>Ascan nan Dios ahuun yorafo iquinai cuscan nicafiashon tapiama. Nanfofin nan ushufo fai ano pacua cuscarafuquin. Diosin tsain ato nomuran man nanufiafo nan yoshin chaca Satanás atoqui oshon nicafo cuscan ato fiantiro afanan afohuunooa shinanonfoma. <sup>20-21</sup>Ascano futsafoanri Diosin tsain nicaquin tau huai unimacoinyofiahuu samamashta ahuun tsain cachiquiri huua. Ascan nanfofin nan ushufo toquiri camaqui pacua cuscarafuquin. Nanfori nan ushufo toquiri camaquinoashu foaifia ahuun tapo chai foama. Samamashta nai cuyotiro. Nanscarifiai nanfoancai Diospan tsain aton nomuran nanu sharafoama. Ascashon ahuara chaca finonyamarai futsafoan ato omitsisca huaino samamashta Dios cachiquiri huatirofo. <sup>22</sup>Ascan ushu futsafo moshafu muran pacuashu foaisharatiroma. Nanscarifiai futsafoan Diospan tsain nicafiashon ahuara nan acai cuscan fustisi shinain. Ascashon pui ichapa yafi mafo ichapa noi afi paramuquicai afanan Dioshuunooa shinantiroma. Ascaquicai Diosin ato amapayai cuscan futsafo shara huatiroma. <sup>23</sup>Ascafiuquin ushu futsa mai shara ano saacano foaiquin yosiashu fimi ya itiro. Nanscarifiai futsafo Diospan tsain nicafain tapicanashu nan yoia cuscan aafu. Ascashon nanfoanfin futsafori Diospan tsain yoiquin icoinra huamatirofoquin. Futsan treinta iyamarai sesenta iyamarai cien yorafo icoinra huamatirofan, —ishon Jesús ato yoini.

<sup>24</sup>Afanan Jesús ato tsain futsa yoini tapinonfo. Isca huaqui, —Diosin nantifi iquinano nanscarifi aquin nocofunun ushu sharafo fana. <sup>25</sup>Fana sharafiashu ahuun noicasmamisiton yamu ahuun mau ano caa. Mau ifo ahuun oinmatifo oshano noicasmamisiton tashafori mau ano fana. Fanatan mau anoashu caa. <sup>26</sup>Chipofin nan ushu shara foaicano tashafori foaini. <sup>27</sup>Ascano aqi fucashon mau ifo ahuun oinmatifoan yoinifo, “¿Ifon, min ushu shara min mau ano fanamamun? ¿Ahuuscaimun natian tashafori foaicaquin?” ishon yocanifo.

<sup>28</sup>“Noco noicasmamisiton acaran,” huaiton. “¿Ascan nan tashafo non tsucai fotiromun?” huaifoan. <sup>29</sup>“Ma. Man tasha tsucaino nan fana sharafori tsucapayamafiaquin man afori tsucatiro. <sup>30</sup>Nanscanonquin. Chitunmisitian tashafo yafi fana sharafori foaitiro. Nantian un mau yonomisifo yoishquin isca huaquin, ‘Iquisi nan tashafo tsucacahuun. Nantifi nushasharahuu coashquinon. Asca huatanfin nan fanasharafori uhuun tapasi muran ua fushotacahuun,’” mau ifoan yoianan, —ishon Jesús ato yoini.

**Mostaza ushuunooa Jesús ato yoini**

*Mr 4.30-32; Lc 13.18-19*

<sup>31-32</sup>Ascasho Jesús mostaza ushuunooa ato yoini ahuara futsa ato tapimashquin. Ato yoiqui isca huani, —Nocofunun ahuun mau ano mostaza ushu fanani. Rato fimi ushu futsacai mostaza ahuun ushu uhuapamashtatioma. Ascafia foaica fasi cuya itiro. Rato pushu umainti fimi charo fanacai mostazatioma. Ihui noconan rafutiro. Ascatan yosiano puiyafu ahuun tushpahuu tsaotiro. Nanscarifiai Diosin ahuun yorafo iquisi fustirasi ifiahuu chipo paratama caitioran, —ishon ato yoini.

**Jesús misi farashatihuunoo ato yoini  
nanhuunshon Diosin nantifi yorafo  
iquinai cuscan tapinonfo**

*Lc 13.20-21*

<sup>33</sup>Ascan Jesús ahuara futsa ato yoini Diosin nantifi yorafo iquinai cuscan tapinonfo. Afanan ato yoiqui isca huani, —Diosinmain ahuun yorafo ahuusca huatiroquin un mato tapimai. Diosin ahuun yorafo nantifi ato iquifain ato yonotiro. Ainfoan farashati ichapamashta harinaya oshon camisonano farashitiro. Nanscarifiai Diospan yorafoan nan icoinra huamafo muranshon nantifi ato shara huatiro, —ishon ato yoini.

**Jesús ato yoiyai cuscan  
ahuara futsa tapinonfo**

*Mr 4.33-34*

<sup>34</sup>Ascatan ahuarahuunooa yoiqui Jesús ato yoini tapinonfo. <sup>35</sup>Nannori Diosin tsain yoisiton nan Jesús yoinon pacoai cuscan cunuqui isca huani,

“Un ato ahuara futsahuunooa ato yoi ato tapimashquin. Upa Diosin nantifi onihuani chain tsoan ascara nicayomisima cuscarafa un ato yoishquiran,”

ishon yoini cuscacoin man aa.

**Trigo yafi faasi foaitirohuunooa Jesús  
shafacafi ato tapimani**

<sup>36</sup>Ascatan yorahuanrasi anoashu cai pushu muran iquini. Ascano non afu rafuafo aqui caashon non yocani, —Ifon, min trigo muran faasi foaitirohuunooa yoia cuscacai non tapiama. Shafacafi noco yoihuu non tapisharanon, —ishon non yocani.

<sup>37</sup>Ascaiton noco cumani, —Diosifi ua nichiniquin. Un nan ushu fanamisi shara cuscara inon. <sup>38</sup>Nan maufin nantifi manifotihuunooaqui. Ascan nan

ushu sharafodin Diospan yorafohuunooaquin. Ascan faasifin icoinra huamafona nan yoshin chaca ahuun yorafoquin. <sup>39</sup>Ascan nan mau ifo noicasmamisi nanfin Satanasquin. Ascan nan fana fiaifotianhuunooafi nan manifoti cuyotirohuunooaquin. Nan fana fimisfodin Diospan oinmatifo afu nai muran icafo.

<sup>40</sup>Nan faasi mushashon coafo cuscan huakin. Nan manifoti cuyoaitian. <sup>41</sup>Uhuun oinmatifo ufu nai muran icafo un nichishquin nantifi futsa chaca huamamisifo yafi nan chaca huafafainaifo uhuun yorafomaqui ato pashcashceni. <sup>42</sup>Ascashon nan omitsiscapanacafo chi urumanhuan muran ato potano nannoashu fasi uaicani omitsiscacoinshceni. <sup>43</sup>Ascaino nantianri Diospan yora shara icoinra huafoti aton Upa Dios icanoashu fari chasha cuscarafa. Ascacun manmain ua nicatiroquin ua nicacahuun. Uhuun tsain maton nomuran nanucoincahuun.

**Ahuara sharashta onuahuunooa  
cuscarafin ato yoini**

<sup>44</sup>Nocofunu mai futsa ano caa. Nannooa ahuara sharashta paratama ahuun pui nuua fuchia. Ascan fuchishon nannori afanan onua. Ascashu fasi unimacoinquin nan aya cuscati inanmitsashon nannooa mai fia nan ahuarashta paratama ahuun pui nuuari ahuuna inon. Nanscarifiai Diospan yorafo nantifi aya cuscan afiri inanmutiro Dios fu ipashcaquin.

**Perla funoahuunooa Jesús ato  
ahuaro futsa tapimani**

<sup>45-46</sup>Diosin ahuun yorafo ahuu cuscaramainquin afanan un mato yoiqui isca huai. Mafo inanmitsamisi cahuancacaini macush cuscara perla oshopa sharashtafo funafoanfainni.

Ascashon man futsa anoa fuchia ahuun pui paratama nuua fuchishon nan aya cuscati inanmitsashon ahuun rafanan nan perla fii ahuunacoin inon. Nanscarifiai Diospan yorafo nantifi aya cuscan afiri inanmutiro Dios fu ipashcaquin.

**Nushutihuunoa Jesús ato yoini ahuara futsa ato tapimashquin**

<sup>47-48</sup>Ascano nushumisiton ahuun nushuti uhuapa pochishon shiman futsa futsatapafa fiini. Ahuun nushutininhuan shiman fospiano unuhuan cusumun cashon nini funi. Ascashon nan shiman chacafo nushuti murannoa tsucashon potani. Ascanshon nan piti sharafosi shihuati muran nanuni. <sup>49</sup>Nanscarifiai manifoti cuyoaitian Diospan oinmatifo afu nai muran icafo nococashon nan chacafo yafi sharafo pashcanan huashcani.

<sup>50</sup>Ascashon nan chacafoti chi urumanhuan muran ato potashquin nannoashu uaiqui fasi omitsiscapashanonfo, —ishon Jesús ato yoini.

<sup>51</sup>Ascatan afu rafuafonon Jesús noco yocaiton, —¿Un mato yoia cuscan nantifi man man tapiamun? —ishon noco yocaiton. —Ai. Min noco yoiai cuscan nantifi man non tapiaran, —non huaiton.

<sup>52</sup>—Ratoran futsafoan Moisés yononi cuscan tapimamisifo nan Diosin ahuun yorafo iquinai cuscan tapiafo. Ascan nanfofin nan mafo inanmitsamisi cuscarafuquin. Mafo inanmitsamisiton yorafo nan yopaifo cuscan inantiro. Ahuara shunifo iyamarai funa ato inantiro. Nanscarifiai tsoan Moisés cununi cuscan yafi un mato rama Diospan yorafohuunoa tapimanai cuscan huafain marifi man futsafo tapimatiroman, —ishon noco yoini.

**Jesús afanan Nazaret ano cani**

*Mr 6.1-6; Lc 4.16-30*

<sup>53-54</sup>Ascano noco yoia cuscan ahuara futsa tapinonfo anaititan Jesús nan

pushconi pushurasi ano nasoni. Ascatan Israelifoan aton ichananti pushu muran iquishon ato yoiaiton ahuun tsain nicacani mustairicatan yoinifo, —¿Ahuuscai na nocofunun fasi tapi sharacoianmun? Tsoan atiroma cuscan huapauquifin atiroquin. ¿Tsoanco Jesús ascara tapimanamun? <sup>55</sup>Nanfin ihui sapa yonomisiton ahuun facuquin. Ahuun ahuan Maria. Ahuun ushtofori Santiago yafi José non Simón non Judas. <sup>56</sup>Ahuun poifori no fu imisifo. Man nonfin Jesús onanquin. Aacai ahuama. ¿Ascan ahuuscashomun ahuamamishti huatiroquin? —icachu yoinannifo. <sup>57</sup>Ascashon nannori ahuunoa shinanchacaquicai tsoan icoinra huapainima.

Ascaiton Jesús ato yoiqui isca huani, —Nantifi mai anoshon Diosin tsain yoimisiton yoiai cuscan nicapaitirofo. Ascafia nan cainni anoshon fusticai tsoan nicapaitiroman, —ishon ato yoini.

<sup>58</sup>Ascano nannoshon icoinra huaiyamaifoan tsoan atiroma cuscan fustirasi huani.

**Juanpan yorafo unu muran iquimacutan nani cuscan**

*Mr 6.14-29; Lc 9.7-9*

**14** <sup>1-2</sup>Ascano nantian Herodes nan Galilea mai anoa ato niaifoan Jesushuunoa nicaquin ahuun oinmatifo yoini isca huaquin, —Nanfin Juanqui. Un tushtumayamua afanan man funia. Ascashofin Diospan curushuunshon tsoan atiroma cuscan huafafainiquin, —ishon ato yoini.

<sup>3-4</sup>Herodes Juan rutumanataima yoiqui isca huani, —Niaifo Herodes, min ushto Felipe ahuun ahui min fia. Ascaquicai min shara huama. Nocon shuni Moisés Diosin tsain cunuqui isca huani, “Futsan ahui min fitiroman,”



ishon Moisés cununiran, —ishon Juanpan Herodes yoini. Ascaiton nicai Herodes fasi sinacoinquin ahuun ranushumuafo yononi Juan achishon cunu muran iquimanonfo. <sup>5</sup>Ascashon Herodes Juan ruturiscapaifiaquicai funa rutunima yorafoanmain Juan fuchipaiyaifoanfin. Ascashon nanfoanri yoinifo, —Juanfin Diospan tsain yoisiquin, —ishon ahuunoa yoinifo. Ascacun Herodes shinanquin isca huani, —Un Juan rutucun ua yorafoan asca huatiroran, —ishon shinanni. Yorafoqui ratuquin Herodes Juan cunu muran iquimafiahocai funa rutunima.

<sup>6-7</sup>Ascano Herodes cainnitian yorafo ichananni fuusishcaquin. Ascashu ichananfoanno Herodías ahuun facu shomaya arusu aton ointaifi mononi. Nan Herodías Herodes ahuun ushto ahuin ini. Ascashu shomaya monoaino Herodes fasi unimacoinquin yoini, —iAicho! Min monoai cuscan un fasi miqiu unimai. Ahuarashta fipaiquin ua yoihuu un mia inanon. Diosin tapia un mia icon yoiaiton min fipaiyai cuscan un mia inantiroran, —ishon yoini.

<sup>8</sup>Ascashon cashon shomayaton ahua yoini. Ascacun nan ahuan yoia cuscan nasocura niaifo Herodes yoini, —Juan nan yorafo unu muran iquimapacumisi tushtuhuu. Purato naratashon ahuun mapo ua inanhuun, —huaino. <sup>9</sup>Niaifon Herodes puusinima. Puusitama ahuun nomuran shinanqui isca huani, —iOhua! Un Juan tushtumapaima. Ascafia yorafoan un shomaya yoia cuscan man nicafo. Ascacun un asca huapayamafiaqui un aquicairan, —ishon shinanni. <sup>10</sup>Ascashon niaifoan ahuun ranushumua yononi, —Juan tushtushon ahuun mapo ua fushotahuun, —huani. <sup>11</sup>Ascaino cashon ranushumuaton Juan tushtushon ahuun mapo purato naratashon funi. Fushon

niaifo inancun nan niaifoanri shomaya inanni. Ascano shomayaton arifi ahua inanni. <sup>12</sup>Ascashon afu rafumisifoan Juan nicacani focashon ahuun caya mai huanifo. Ascatan focanashu Jesusqui chaninifo.

**Jesús cinco mil nocofunufo pimani**

*Mr 6.30-44; Lc 9.10-17; Jn 6.1-14*

<sup>13</sup>Ascashon Herodes Juan tushtuma nicai Jesús shashon tsoa icama ano cani. Jesús caa nicacani pushufoti anoashu yorahuanrasiton naman mufainifo.

<sup>14</sup>Ascashu nocoquin Jesús oian yorahuanrasi oin atohuun ramapaini. Nannoshori isinincai futsafo ato cayahuapacuni.

<sup>15</sup>Ascano man fari caino non afu rafuafu aqui cashon non yoini, —Yorafo nichihuun. Man fari caiquin. Fonaincaniquin. Pushurasi ano yafi a chaima icafoanno ato nichihuun anoshon tushu huanonfo, —ishon non yoini.

<sup>16</sup>Ascaiton noco cumani, —Ma. Noncai ato nichima. Mafirocon ato piimacahuun, —noco huaiton.

<sup>17</sup>—Nonfin nuno misi siete yafi shiman rafu ayaquin, —ishon non yoini.

<sup>18</sup>Ascaiton, —Ua fishotacahuun, —noco huani. <sup>19</sup>Ascashon yorahuanrasi yoini, —Nanno faasi camaqui tsaocahuun, —ato huani. Ascatan shiman rafu yafi misi mucu fustiti tsomashon nai ari foisinifoantan Apa Dios cufinquin, —iAicho! Upan, mihuunshon un ato pimai. Min fasi sharacoincun, —huatan. Misi torupacutan shiman rafu ya osishon noco inanni non ato pashcanan huapanon. <sup>20</sup>Ascashon picani mayancoinnifo. A picaquin tushu huafu non afu rafumisifoan doce shihuati fospai huani. <sup>21</sup>Nan piaifo cinco mil nocofunufoosi ini. Ainforo yafi facufocai non tanan huanima. Asca nanfoanri ato futan piinifo.

**Jesús unu fumancayan cani***Mr 6.45-52; Jn 6.16-21*

<sup>22</sup>Ascashon ato pimaquin anaititan Jesús noco yoiquin isca huani, —Shashon rufofo oquiri pocui focahuun. Un na yorafo ato nichiyonon, —ishon noco yoini.

<sup>23</sup>Ascashon man ato nichiqui anaititan arus fusti machi ano caashon Apa Dios fu tsainni. Man fari caino arus fusti ini.

<sup>24</sup>Ascatan afu rafuafo shasho caino ian nushmancayan nocoqui fuuhuan noconi. Ascashu ian fuchoquin noco catima huani.

<sup>25</sup>Ascashu man faquishiaino non oian Jesús ian fumancayan nocoqui ofiaitocai non onannima. <sup>26</sup>Onanshma ratucoin non fiisini. “Yoshiran,” icashu non fiiscaiton. <sup>27</sup>—Unqui. Ratuyamacahuun, —ishon Jesús noco yoini.

<sup>28</sup>Ascaiton Pedronun yoini, —Ifon, minmainquin uarifi mia ano cunahuu. Urifi un ian fumancayan canon, —huaiton. <sup>29-30</sup>—Ohuu, —Jesús huaino Pedro shasho naquinoashu fotopacukahuan ian fumancayan Jesús ari caafiain oian fuunhuaquin ian fuchoaiton oin ratui iquipacukahuanqui yoini, —Ifon, ua ari mutsoinifoanhuun, —Pedronun huani. <sup>31</sup>Ascaiton Jesús samamashta mutsoinifoanquin yoini, —Miancai ua icoinra huacoinnama. Ahuuscaquimun mian icoinra huamaquin, —ishon Jesús yoini.

<sup>32</sup>Ascantan nan rafu shasho muran nanuinifoanafono fuu nishmapacufoanni. <sup>33</sup>Ascano non shasho murannofo fasi aqui unimacoinquin non yoini, —Iconfinquin min Diospan Facu, —ishon non yoini.

**Genesaret anoshon Jesús isinincaifo  
ato caya huapacuni***Mr 6.53-56*

<sup>34</sup>Ascatan ian pocufaini Genesaret ano non noconi. <sup>35</sup>Ascashu non nocoaiton

nannoafoan samamashta Jesús onancashon a chaima icafori ato tapimanaino nicafuracani fucaquin aton yora isinincaifo Jesusqui ihuunifo.

<sup>36</sup>Ascano fucashon Jesús yoinifo, —Noco yora isinincaifo min sahuuti cupanan fusti ato muumahuu cayanonfo, —ishon yoinifo. Ascatan ahuu sahuuti muuncanashu cayapacunifo.

**Nocofunun ahudara chaca huatiro cuscan***Mr 7.1-23*

**15** <sup>1</sup>Ascano Fariseofo yafi Moisés cununi cuscan tapimamisifori Jerusalén anoashu Jesusqui funifo.

<sup>2</sup>Fucashon yoinifo, —¿Ahuuscaimun nocon shunifoan piataifoma muchoquimupaonifo cuscacai mifu rafuafoan asca huapaicanimaran? —ishon yoiiafoan. <sup>3</sup>Jesús arifi ato yocani, —Ascan ahuuscai marifi maton fuyamisi fustisi man tanapaiyain.

Ascashofin Diosin yononi cuscan huatamarocon nan maton shunifoan amaquiri yosimisifo cuscan marifi man nansca huamisiquin. <sup>4</sup>Ascacun Upa Diosin yonoqui isca huani, “Maton upa yafi uhua nicasharafain ato shara huacahuun. Ascan tsoan apa iyamarai ahuaqui tsain chaca huacun ato rutumacahuun,” ishon yononi.

<sup>5-6</sup>Nannori yononifianicun manfin noco yorafo yoiquin isca huamisiquin, “Maton upa iyamarai mato uhua man yoiqui isca huatiro, ‘Nantifi uhuun pui un aya cuscan mun Dios inan. Ascacun un mia ahudara inanpaifiaquicai un mia inainmaran,’” ishon yoiquicai mato upa yafi uhua man afanan ahua inantiromaran, ishon man fasi ato amaquiri yoimisi. Anori yoiquicai Diosin yononi cuscacoin man aimá. Ascaquifin nan mato fuyamisi fusti man tanaqui. <sup>7</sup>Ascashufin man

paramitsamisifoquin. Nan Diosin tsain yoimisi Isaías inon pacoai cuscan icocoinquin matohuunoa yoiqui isca huani,

<sup>8</sup> “Nan yorafoan uhuunoa yoisharamisifiashocai aton nomuranshon ua shinancoianfoma. <sup>9</sup>Ipaitsi ichananshu fanaincai ua cuficani. Yorafo tapimamisifo cuscacai Diosin tsaincoinma. Nanfoan aton nomuran shinainfo cuscan futsafori yosimisiforan,” —ishon Isaías cununi.

<sup>10</sup>Ascashon nannori Fariseofo yafi Moisés cununi cuscan tapimamisifo ato yoitan Jesús yorahuanrasi cunaquin isca huani, —Uqui fucahuun un mato yoinon. Ua nicafain un mato yoiai cuscan tapisharashcaquin. <sup>11</sup>Ahuarafo non piatocai noco ointi chaca huatiroma. Nocofununfin ahuun nomuranshon nan shinain cuscan yafi nan yoia cuscan chaca huatiroquin, —ishon ato yoini.

<sup>12</sup>Ascaino non afu rafuafo aqui cashon non yocani; —¿Ifon, man min tapiamun nan rama min Fariseofo yoiai cuscan nicacani sinacanian? —ishon non yoini. <sup>13</sup>Ascaiton noco yoiqui isca huani, —Mau ifoancai ahua chacafo fanatiroma. Ascatama afin foaicun tsucashon potatiro. Nanscarifi aqui uhuun Upa Dios nai muran icatocai nan Fariseofo yonoama futsafo ahuun tsain tapimanon. Ascacun nanfo chipo omitsiscapanacafo muran ato potashquin. <sup>14</sup>Ascacun nanfo shinanyamacahuun. Fushocai afu fusho raqui iyotiro. Iyopai afu shato muran pacutiro. Nanscarifiai Fariseofoancai Diosin tsain tapishoma futsafo yositiroma atofu funotiro. Ascashu Dios ari tsoa nocopacunacafomaran, —ishon ato yoini.

<sup>15</sup>Ascaiton Pedronun yoini, —Min ato yoia cuscan shafacafi noco tapimahuun, —ishon yoini.

<sup>16</sup>Ascaiton Jesús noco yoiqui isca huani, —¿Ascan marifimun man nicasharama? <sup>17</sup>¿Man tapiamamun ahua man piacai mato shaqui muran nituima? Ascatama manrocon aya poitiro. Ascan nantocai mato chaca huamatiroma. <sup>18</sup>Ascashon mato nomuran man shinanchacai cuscan huafain yoia shuri man chacacoin itiro. <sup>19</sup>Ascano aton nomuranshon ahua chaca shinainfo cuscan nanscacoin huatirofo. Shinanchacafain rutumitsamisi icain aton ahuinma fu nocofunufu icaifoanno ainfofori nanscarifiaifoanno. Ascashon ahuarari onufain futsahuunoa ahua chaca yoiqui parafain roanmitsamisi itirofo. <sup>20</sup>Nan chacafoanfin yorafo chaca imatiroquin. Ascan nan noco shunifoan apaonifo cuscan muchoquimushoma non piatocai nocon nomuran noco shinanchacamatiromaran, —ishon Jesús noco yoini.

**Ainfoan patasharinoaton Cananea anoaton Jesús icoinra huani**

*Mr 7.24-30*

<sup>21</sup>Ascaini Jesús nocofu anoashu cai nan pushurasi Tiro ano yafi Sidón ano cani. <sup>22</sup>Nannoashu Cananea ano ainfo Jesusqui noconi. Nocoshon yoini, —Ifon, minfin David ahuun funaquin. Uhuun ramapaihuu. Uhuun facu ainfo shota fasi omitsisca. Yoshin chaca ahuun nuushon omitsisca huamisi. Uhuun facu ua caya huashopun, —ishon yoiriani. <sup>23</sup>Ascaiton nicafiaquicai Jesús cumanima. Ascaiton non afu rafuafoan yoini, —Ifon, na ainfoan mia yocariaquin noco fucash huaiquin nichihuun, —ishon non yoini. <sup>24</sup>Ascashon Jesús ainfo yoini, —Uhuun

Upa Diosin ua Israel ano fusti nichini. Nanfomain nan chashoanun facu funoa cuscarafocun. Ascan uacai caifo futsa ano nichinima, —huaiton.

<sup>25</sup>Nicaiyainfo Jesús naman ratoconun mai chachipacufoan yoini, —Ifon, uhuun facushta ua cayahuashopun, —huani.

<sup>26</sup>Ascaiton Jesús afanan cumani, —Apacai ahuun facufoan tushu pashnafo inantiroma. Ascaracai sharama.

Nanscarifi aqui Upa Diosin ua yonoa cuscan un Israelifo fusti un shara huashonon. Ascacucui un caifo futsa ano catiroma ato shara huashoshquin. Un asca huaino nan Israelifo funotiro, —ishon yoiaiton. <sup>27</sup>Ainfoanri yoini. —Icon, Ifon. Ascafia ahuara piqui tushu huafo sapa camaquinoashu potomishiti pacuaiton pashnafoan pitirofo. Nanscarifi aquin Upa Diosin mia Israelifo ano nichini min ato shara huashonon. Ascafia mani futsafori miqui nocoaifoan nanfori min ato caya huatiro. Ascashon min ato shara huashoinocai Israelifori funotirromaran, —ishon yoiaiton. <sup>28</sup>—Min ua fasi icoinra huacoinna. Ascacun min ua yoca cuscan un mia ashoiran, —ishon Jesús nan ainfo yoini. Asca huatanaino ainfo ahuun facu cayariscatani.

**Jesús yora ichapa isinincaifo  
ato caya huapacuni**

<sup>29</sup>Asca huatan anoashu Jesús no fu cai Galilea ian cusumunri cani. Nannoashu cai machi ano inashu tsaoni. <sup>30</sup>Ascano yorahuanrasi aqui funifo. Fucaquin isinincaifo ihuunifo Jesús ato caya huanon. Isinincai futsa futsatapafo. Futsafo nipaiqui ranainfo ihuufain fushofo ihuufain ahuun caya mumamafo ihuufain tsaintiromafo ihuufain isinincai futsafori Jesusqui ihuunifo. Ascacun nantifi Jesús ato cayapacuni. <sup>31</sup>Ascashon ato caya huaa oincani mustairicatan yorafo afi ranan yoinancaquin yoinifo,

—Noncai iscara oinyomisima. Tsaintiromafo natian tsaincani. Ahuun caya mumamafori natian man niisharafo. Nipaiqui ranainfori natian niisharatirofo. Jesusfin ahuamamishti huatiroquin. Israelifoan nocon Dios fasi sharacoinran, —ishon yoinifo.

**Jesús cuatro mil nocofunufo pimani**

*Mr 8.1-10*

<sup>32</sup>Ascatan non afu rafuafo noco cunashon Jesús noco yoiqui isca huani, —Un na yorafohuun ramapai. Ufu rafu non fusti oshatan icafo. Afanan tsoa tushu ayama. Ahuashtacai picanima. Ascacun uncai ato tushuoma nichipaima. Fasi fonaincani shaca fuatiroforan, —ishon noco yoini.

<sup>33</sup>Ascaiton non cumani, —Nuno tsoa icamanocai non tushu fuchitiroma na yorahuanrasi pimashquin, —ishon non yoiaiton. <sup>34</sup>Noco yocani, —¿Ahuuti misi man ayamun? —noco huaiton. —Siete non shiman rananri non ayaran, —ishon non yoini.

<sup>35</sup>Ascaiton Jesús yorafo yoiqui isca huani, —Nanno tsaocahuun, —ato huani. <sup>36</sup>Ascatan ato yoia cuscan tsaofafoanno Jesús misi siete non shiman rananri finifoantan Apa Dios cufini, —iAicho! Upan, mihuunshon un ato pimai. Min fasi sharacoinquin, —huatan. Misi yafi shiman torupacutan non afu rafuafo noco inanni. Ascacun yorahuanrasi norifi non ato pashcashopacuni. <sup>37</sup>Ascashon nantifiton picaní mayancoinnifo. Ascano man piqui tushu huafo siete shihuati non fospi huani. <sup>38</sup>Ascán nan piaifo cuatro mil nocofunufoosi ini. Ainfofo yafi facufocai non tanan huanima. Ascafia nanfoanri ato futan piinifo. <sup>39</sup>Ascatan Jesús nantifi yorahuanrasi nichitan. Noco nanuquifaini cai mai futsa ahuun anu Magadán ano no cani.

**Fariseofo futan Saduceofoan Jesús yocanifo, —Tsoan atiroma cuscan noco ismahuu, —huanifo**

*Mr 8.11-13; Lc 12.54-56*

**16**<sup>1</sup>Ascashu Magadán ano man non nocoano Fariseofo yafi Saduceofofi Jesusqui funifo. Ascano fucashon yocanifo. —Minmain Diospan facuoinquin nan Diosin nai aria icahuunshon tsoa atiroma cuscan noco ismahuu non mia icoinra huanon, —ishon yoinifo. Ahuunoa ahudara chaca ato niaifofo yoipaicaquin. <sup>2</sup>Ascaifoan Jesús ato cumani, —Manfin yoiquin isca huamisiquin, “Man fari caino imi poshnan. Ascan funamanrifi nai shara itiroquin,” ishon man yoimisi. <sup>3</sup>Ascashon shafaino nai choshtacun man yoimisi, “Nai choshtapan fupoa. Ascan natian oi fuiran,” man huamisi. Ascashon nai foisitiro man tapitiro oi fuyamaraimain ahuuscaiquin. Ascan ahuuscaquitsi Diosin mato yoiái cuscan man icoinra huapaima. Natian ahudara ahuuscarai cuscaí man tapiama. <sup>4</sup>Man ua icoinra huayamafain chacafashon man ua yocai. Ascafia tsoan atiroma cuscan un Diosihuunshon huatirofiacai un mato ismaíma. Man oinpaífiatón. Nan Diosin Jonás ani cuscan nan fusti man chipo oinshquiran, —ishon Jesús ato yoini. Ascatan atomaquinoashu cani.

**Fariseofoan yositirofo cuscahuunoa**  
*Mr 8.14-21*

<sup>5</sup>Ascano man ian pocufaini cashon non shinanni, —Non tushu ointiaquimacuranaran, —ishon non yoini. <sup>6</sup>Non ascaiton onanshon Jesús noco yoini, —Oinfain. Fariseofo futan Saduceofoan aton misi farashati cuscara fiyamacahuun, —ishon noco yoiatón. <sup>7</sup>Nicai nofi ranan non yoinanni,

—¿Ahuuscaimun Jesús noco yoiqui isca huaiquin, “Fariseofo futan Saduceofoan aton misi farashati fiyamacahuun,” noco huai? Non tushu fucuma racan noco isca huaiquin, —icashu non yoinanni.

<sup>8</sup>Ascano nan non yoiái cuscan onanshon Jesús noco yoini, —¿Ahuuscaquimun tushuhuunooasi man yoiái? Mancai ua icoinra huaa sharacoiantaima. <sup>9</sup>Ascashon mancai tapisharataíma. ¿Un mucu fustiti misihuunshon cinco mil nocofunufu un pimaita nan man shinainmamun? ¿Ahuuti shihuati fospia tushuita man ointiaquimamun? <sup>10</sup>¿Nan siete misihuunshori un cuatro mil yorafo pimaita nanri man man ointiaquimanamun? ¿Ahuuti shihuati fospia tushuitamun man ointiaquimamun? <sup>11</sup>¿Ascan ahuuscai un mato tushucoínhuunoa yoiyamafiaiton man tapimamun? Unfi tushuhuunoa yoi cafisca huaquin nan Fariseofo futan Saduceofoan yosiaífo cuscahuunoa un mato yoiqui, —ishon noco yoini. <sup>12</sup>Ascashon Jesús noco yoiái cuscan nicaquin non tapini tushucoínhuunoa yoitama naan Fariseofo futan Saduceofoan noco amaquiri tapimapaiyai cuscan Jesús noco yoini.

**Pedronun, —Jesús Diospan facuran, —huani**

*Mr 8.27-30; Lc 9.18-21*

<sup>13</sup>Ascatan Jesús no fu mai futsari cani. Nan mai ahuun anu Cesarea Filipo. Nanno nocoshon Jesús noco yoini, —Unfin Diospan Facufiashu un nocofunucóinquin, —ishon yoitán afanan noco yocani, —¿Yorafoan shinamun un tsoaquin? —ishon noco yocaitón. <sup>14</sup>Non cumaquin isca huani, —Futsafoan yoiáfin min Juanquin. Nan yorafo unu muran iquimapacumisi, ishon yoiáifoanno futsafoanri yoiquifin

min Eliasquin. Ascano futsafoanri yoiäfo minfin Jeremiasqui. Ascan futsafoanri yoiäfo minfin nocon shunicaifo Diosin tsain yomisi futsa afanan funiaquin, —ishon noco yoiäiton. <sup>15</sup>Afanan noco yocani, —¿Asca marifi man shinanmun un tsoaquin? —noco huaiton.

<sup>16</sup>Ascaiton Pedronun cumani, —Minfin Cristoquin. Nan Diosin nipanacaton mia catonni min ahuun facuran, —ishon yoaiton. <sup>17</sup>Ascaiton Jesús cumani, —Simón, minfin Jonás ahuun facuquin. Diosin mia noiquin mia shara huaa. Rato nocofununciä mia tapimanama un Diospan facu. Uhuun Upa Diosin nan nai muran icaton mia tapimana.

<sup>18</sup>Un mia afanan yoi. Minfin Pedroquin, —ishon Jesús yoini. Ascan Pedrofin Israeli tsainman toquirininhuan. Tsoan putsiquitiroma. Ascasho Jesús afanan yoiqui isca huani, —Min yoiä cuscahuunshon futsafoan aarifi icoinra huashquicani. Ascaifoan uhuun yorafo an ato imashquin. Yoshin chacafoan aaton curush huahuunshon ato namapaifiaquicai ato shatuyamafain aato finontiro. <sup>19</sup>Tsoan shafi ya fupoti fuputiro yorafo pushu muran iquimashquin. Nanscarifi aquin un mia yonoi uhuunshon min yorafo uhuunoo yoitiro uhuun yorafo inonfo. Ascashu uhuun Upa icano iquitirofo. Min yorafo yosiai cuscan tsoa nicacasmai uhuun yora itiro. Upa Dios fu ipashcaquin. Nannori Diosin yoini. Ascan min yorafo yosiai cuscan tsoa icoinra huai uhuun yora itiro. Upa Dios fu ipashquin. Nannori Upa Diosin yoini. Ascacun un mia yonoi min futsafo tapimatiro. Upa Dios icano iquinonfo. Un mia shafi inain cafisca huai min ato fupushotiro iquiashu afu ipanonfo. Ascashon tsoan min yoiä cuscan icoinra huayamashocai iquitiro. Afu ipashquin. Ascan tsoan min yoiä cuscan icoinra huacoinnashu

afu ipashquin, —ishon Jesús Pedro yoini. <sup>20</sup>Ascatan non afu rafuafo futsafori noco yoiqui isca huani, —Unfin Cristoquin tsoa yoiyamacahuun, —noco huani.

—Unfin chipo naashquicai,  
—ishon Jesús ato yoini  
*Mr 8.31-9.1; Lc 9.22-27*

<sup>21</sup>Ascatan nantian yafi nan achiaifotian Jesús noco shafacafi yoiqui isca huayofafainpaoni, —Un Jerusalén ano cai. Nannoshon nocon niaifofoan ua omitsisca huafain ua ato rutumafiafo osha rafu non fustitan un afanan funishquiran, —ishon noco yoini.

<sup>22</sup>Ascaiton Pedronun Jesús mutsofaitan yoini, —Ifon, ascayamahuu. Miacai tsoan rutupacunacama, —huaiton.

<sup>23</sup>Jesús ifiacucahuan Pedro yoini, —Satanás catahuun. Min ua amaquri shinanchacamapai. Upa Diosin shinain cuscaai shinantama nan nocofunfoan shinainfo cuscan min shinanran, —ishon Jesús yoini.

<sup>24</sup>Ascatan non afu rafua futsafori noco yoiqui isca huani, —Tsoan ua tanapaisharaquicai afi apaiyai cuscan huatiroma. Ascata. Nan un yoiä cuscaoin huatiro. Ascashon shinanqui isca huatiro, “Ua omitsisca huafiaifoanno uncai uhuun Ifo potapacunacama. Ahuunshon ua rutufiaifoanno un tanaqui unupacunacamaran,” ishon man shinantiro. <sup>25</sup>Ascan tsoan shinanqui isca huai, “¡Ohua! Un Jesús tanaiton raca ua omitsisca huacanicati,” ishon shinanqui uhuun tsain cachiquiri huaa. Nanscara yorafo naashu omitsiscapanacafu. Ascan tsoa uhuunoashu omitsiscacai naa. Nanscara yorafin nacanashu ufu isharapacunacafuquin. <sup>26</sup>Ascan ratoran futsa nantifi manifoti anoäfo ahuara fia

ahuunacoin ifiashu amaqui naino nantifi ahuunafo funotiro. Ascashu nantifi ahuuna iyopaonifia omitsiscapanacafo muran cainocai afanan ahuashta itiroma. Ahuaracai Dios inantiroma afu ipashqui.

<sup>27</sup>Ascatan un chipo nai murannoashu mai ano fotoaino nan uhuun Upa cuscaracoin iishqui. Ascashu un chasha curanaino uhuun oinmatifo ufu nai muran icafo ufu fotoshcani. Nantianri un nantifi yorafoan aton niaifocoin iishquin. Ascashu nan yorafoan acafo cuscan un ato inanpacushquin. Nan shara huamisifo un ato inansharafain un ato unimamashquin. Ascan nan chaca huamisiforicaí un ato ahua inansharashquima. <sup>28</sup>Ascacun icon un mato yoi. Man futsa nuno ufu niaton naataishoma un maton niaifo Upa Dios cuscaracoin un icaiton man oinshquiran, —ishon Jesús noco yoini.

**Jesús fianananriscatani**

*Mr 9.2-13; Lc 9.28-36*

**17** <sup>1</sup>Ascano man seis osha finontan Jesús Pedro non Juan non Santiagori machi cuya pochininshon ato yoni. <sup>2</sup>Ascan nannoashu aton ointaifi Jesús ahuun yora mumacoin fianananriscatanaino ahuun fusori fasi chashacointani. Nan fari chashai ointsa. Ahuun sahuutiri oshopacoin nan yoa rama furoa ointsa ini. <sup>3</sup>Ascaino nantianri Moisés yafi Elías aqui niriscatanifo. Ascashu nan rafu Jesús fu tsaincaiton oinnifo. <sup>4</sup>Ascaiton Pedronun yoini, —Ifon, nuno non icashara itiro. Man ascapaiyaiton un mato tapasi rafu non fusti huashotiro. Mina futsa non Moisésna futsa non Eliasna futsa un mato ashotiroran, —ishon yoini.

<sup>5</sup>Ascashu Jesús fu tsaincaino coin osho sharacoin atoqui cuyopacuni. Ascaino coin murannoa oi nicanifo

yoiqui isca huaiton, —Nanfin uhuun Facuquin. Un fasi ahuun noi. Nanfin un catoanquin. Un aqui unimacoin.

Ascacun a nicacoincahuun, —ishon Upa Diosin yoini. <sup>6</sup>Ascaiton nicacani fasi ratucoincani fuopacufoannifo.

<sup>7</sup>Ascaifoa Jesús ato pumanqui yoini, —Funicahuun. Ratucaquima, —ishon ato yoini. <sup>8</sup>Ascaiton foisinifoanquin oianfo Jesús fusti nia ini.

<sup>9</sup>Ascatan machi pochininnoashu fotoshon Jesús ato yoiqui isca huani, —Nan man rama oian cuscan tsoashta yoiyoyamacahuun. Nan un naashu afanan funiano man rama oian cuscan man yorafo yoitiroran, —ishon ato yoini.

<sup>10</sup>Ascaiton nicacaquin afu rafuafo yocanifo, —¿Ascan ahuuscaquimun Moisés cununi cuscan tapimamisifoan noco yoimisifo isca huaquin, “Nocon Numamisi Cristo nan Diosin catoan nocoqui oataima rufofo Elías oshquiran,” ishon noco yoimisiforan? —huaifoan. <sup>11</sup>Jesús ato yoini, —Icon. Elías rucun oitautiro. Oshon nantifi ato imasharapai aton chaca shatunonfo. <sup>12</sup>Ascan man ofiacucaí tsoan onannima. Nan chaca huapaiyaifo cuscan fusti nan chaca huanifo. Nanscarifi aquin ua omitsisca huashcaniran, —ishon Jesús ato yoini. <sup>13</sup>Ascaiton nicacani afu rafuafoan shinantani nan Juan yorafo unu muran iquimapacumisihuunoa ato yoiái cuscan tapinifo.

**Jesús furonanfacahuunoa yoshin chaca nuua caya huani**

*Mr 9.14-29; Lc 9.37-43*

<sup>14</sup>Ascatan machi anoashu fotocuranaino yorahuanrasi aqui noconifo. Ascaino nannoshon nocofunun ratoconun mai chachipacufoan Jesús yoini, <sup>15</sup>—Ifon, uhuun facahuun ramapaihuu. Yoshin

chaca ahuun nuushon fasi omitsiscamai. Chii muran potafain unu muranri potatiro. <sup>16</sup>Uhuun facu mifu rafuafo ano un iyofiacai tsoan caya huama, —ishon yoiaiton. <sup>17</sup>Ascaiton Jesús non afu rafuafo noco yoini, —iOhua! Mancai ua icoinra huacoinnama. Man fasi amaquiri shinanmisi. ¿Ahuutia un matofu icamun man ua nicayamacaiyai? —ishon noco yoini. Ascatan facun ahuun apa yoini, —Min facu ua ihuushonhuun, —huani. <sup>18</sup>Ascaiton furun ihuushocun Jesús yoini, —Minfin yoshin fasi chacacoinquin. Na facumaquinoashu catahuun, —ishon Jesús curushcain yoiaino cayariscatani.

<sup>19</sup>Ascatan non afu rafuafofosi Jesús fu tsaintan non yocani, —¿Ahuuscaimun norifi non yoshin chaca facumaquino potamaquin? —ishon non yocaiton. <sup>20</sup>Noco afanan yoini. —Manfin ichapama ua icoinra huaaquin. Ascacun un mato icon yoinon. Nan mostaza ushu uhuapamashtacoinfia foaicashu yosia uhuapacoin itiro. Nanscarifiai man ua ichapama icoinra huaquin tau huatiro. Ascan chipo uhuun tsain maton nomuran nanucoinshon man ua fasi icoinra huaqui finacointiro. Ascashon man machi yoitiro shucucaitahuun man huaino shucucaini futsa ano catio. Ascaino ua icoinra huacoinshon nan man apaiyai cuscacoin man huatiroquin. <sup>21</sup>Ascan man Upa Dios cufiyanan piqui tunuyamashocai nan na cuscara yoshin chaca man potatiromaran, —ishon Jesús noco yoini.

**Jesús nashquiai cuscan afanan yoi futsani**  
*Mr 9.30-32; Lc 9.43-45*

<sup>22-23</sup>Ascatan Galilea ano nocofu caquin afanan Jesús noco yoiquin isca huani, —Un mato yoimisi cuscan afanan un mato yoi. Futsan ua ato achimashquin ua rutunonfo. Ascafia

osha rafu non fustitan un afanan mai murannoashu funishquiran, —ishon Jesús noco yoini. Ascaiton nicaquin non fasi shinancoinni nocon nomuran noconi.

**Israelifoan pui inantiro cuscan Dios fu tsainti pushu cushusharanonfo**

<sup>24</sup>Ascatan nannoashu non cai Capernaum pushurasi ano non noconi. Nanno non nococun nan Dios fu tsainti pushu murannoa pui fimisifoan Pedro yocanifo. —Man min tapia nocon caifoan faritifi pui inanfo Dios fu tsainti pushu muran yonoafoan nan yopaifo cuscan ahuun finonfo. ¿Ascán mato Ifo Jesús arifi man inanmisimun? —ishon Pedro yocaifoan.

<sup>25</sup>Pedronun ato cumani, —Aifain. Naanfin inanmisiquin, —ishon ato yoini. Ascashu Jesús man pushu muran iquiano Pedro arifi iquini. Ascaiton Jesús Pedro yoini. —¿Maifoti anoa niaiffoanmun ahuun caifocoin pui fiapai iyamarai mai futsa ariafo yocaiqui? ¿Pedro, asca min raquiri shinainmun? —ishon Jesús Pedro yocaiton. <sup>26</sup>—Mai futsa ariafo fiantiroran, —ishon Pedronun cumani. <sup>27</sup>Ascaiton yoini, —Min ua cuma cuscan iconfia non na pui fimisifo nocoqui shinanchacamapaima. Ascacun ian ano catahuun shuamaquin shiman fiishquin. Ascashon ahuun shaqui murannoa toro fuchishon min fitiro uhuuna yafi mina nan Dios fu tsainti pushu murannoa pui fimisifo nocohuunshon ato inanshquin, —ishon Jesús yoini.

**Ratotocaimun Dios icari fasi finoncoianquin**

*Mr 9.33-37; Lc 9.46-48*

**18** <sup>1</sup>Ascaiton non Jesús yocani. —¿Ifon, ratotocaimun Dios icari fasi finoncoianquin? —ishon non yocaiton.



<sup>2</sup>Jesús facu cunani, —Facushta, nuri ohuu, —huaino ocun ato nastui nimani.

<sup>3</sup>Ascashon ato yoini, —Un mato icon yoi. Man shinan futsayamashu nan facu cuscara man iqui. Man ascayamacai Dios icari man noconacama. <sup>4</sup>Ascacun na facu apa yafi ahua nicafain icoinra huatiro cuscan ratoran futsan ua icoinra huacoinnashu nanfin uhuun Upa Dios icariashu fasi finoncoian iishquiquin. <sup>5</sup>Asca ratoran futsan uhuunshon facufo shara huafin nan uari shara huai cafisca huai.

**Futsafoan noco chaca huaquinaino  
fasi musucoin**

*Mr 9.42-48; Lc 17.1-2*

<sup>6</sup>Ascafia ratoranfoan ua icoinra huafuna futsan chaca huamai nancaifin fasi onaintimaquin finacoinquin. Chaca huamataima toquiriya tunushushon unu noacoin muran potafin shara icuanaquin. <sup>7</sup>Ascano nan icoinra huamafoan futsafo chaca huamamisi. Ascafia nanfocafin fasi omitsiscacoinshcaniquin. Ascashon mato chaca huamapaifafainceni. Ascafia nan futsa chaca huamafocafin fasi omitsiscai finacoinshcaniquin. <sup>8</sup>Ascano mato mucuman man chaca huacun mushatumushon potacahuun afanan chaca huashquima. Man raquiria caquin chaca huashon mato tau shatuhuu potashquin afanan chaca huashquima. Man mumamafiashu Dios icano caafin sharacaiqui. Mumafiashu man omitsiscapanacafo muran cacuana. Nanno chii urumanhuan matsinacama. <sup>9</sup>Nanscarifiai ahua oinquin chaca huashon mato furo tsucahuu potashcaquin afanan chaca huashquima. Niyoashu furo fustiya man Dios icano caafin sharacaiqui. Ascan niyoashu furo rafuya man omitsiscapanacafo muran cacai sharama. Nanno chii urumanhuan matsinacama.

**Chashoan fusti funoahuunoo Jesús ato  
ahuara futsa tapimani**

*Lc 15.3-7*

<sup>10</sup>Facufohuunoo isca huaqui shinanyamacahuun, “Na facucaí ahuamaran,” ishon atohuunoo shinanyamacahuun. Un mato cayacafi yoi Upa Diosin ahuun oinmatifoan facufo cushusharafafainmisifo. Nan oinmatifori Upa Dios fu ifafainceni.

<sup>11</sup>Ascacun nantifi yora funoafu numayoifin un oquin. Ascashon un aton chaca soashona isharapacushanonfo un oni.

<sup>12</sup>Ascano un mato yoinon. Ratoran futsa cien chashoan ayafiano fustishta amaqui funoano atirifi nan noventa y nueve faasi fununun potayofaintio a fusti funoa funayoicaquin nan fuchiaitian. ¿Ascan man ahua cuscara shinantiromun? <sup>13</sup>Ascashu noventa y nueve ahuun chashoanfoqui unimafiaicai nan funoa fusti fuchiaiquicaifin fasi unimai finacoinquin. <sup>14</sup>Nanscarifiai maton Upa Dios nan nai muran icatocai nan ua rama icoinra huafo fustishta funopaima.

**—Ahuuscashumain Diospan yora rafu  
raunantirofoquin, —ishon Jesús ato yoini**

*Lc 17.3*

<sup>15</sup>Ascacun tsain futsari un mato yoi. Ua icoinra huaa futsan mia chaca huacun aqui cashion mia chaca huaa cuscan nan fusti yoihuu. Min yoiái cuscan nicashquin yoinon, “Ai. Mian yoiái cuscan icon. Un mia chaca huaa. Ascacun ua rau huapun,” ishon yoitiro. Ascaquifin mihuunoashu afanan Diosqui nasoaquin afanan mifu rafushquin.

<sup>16</sup>Asca min yoiái cuscan mia nicacasmaiton icoinra huaa fusti iyamarai rafu iyohuu nan nocofunun yoiái cuscan nicaquin arifi icoinra

huanonfo. <sup>17</sup>Ascacia nan rafuri nicapayamaiton icoinra huafo ichanainfotian nannoshon nantifi tapimahuu. Asca nan ichananfori nicacasmaiton nanfoan yoitirofo, “Acaai afanan Diospan yoracoin cuscaramaran,” ishon.

<sup>18</sup>Ascacun un mato icon yoi. Ahuara man nunoshon yoia cuscan arifi Dios nan icanoshon nannori yoi. Nanscarifiai man ahudara nunoshon yoiyamaino arifi Dios nan icarishon yoitirofo. <sup>19</sup>Afanan un mato yoi. Man rafu nuno mai ano ichananshon nannori rafu shinanqui man ahudara yocaiton nan uhuun Upa Dios nai muran icaton mato ashoshqui. <sup>20</sup>Ascashu rafu iyamarai rafu non fusti yora ua icoinra huashu ichanainfoanno urifi un atofu ichanainran, —ishon Jesús noco yoini.

<sup>21</sup>Ascaiton Pedronun yocani —¿Ifon, futsa ua chaca huafafainaitomun un rau huaquin ahuuti huatiroquin? ¿Siete un rau huaquin huatiromun? —huaiton. <sup>22</sup>Jesús cumani, —Ma. Siete huaquima. Nan mia chaca huafafainaiti min rau huatirofan, —ishon yoini.

#### **Oinmatinin futsa rau huapainimahuunshon ato yoini**

<sup>23</sup>—Ascacun un mato yoiai cuscan nanfohuunshon man tapitiro ahuu cuscaramain Diosin ahuun yorafo iquifain ato yonotiroquin. Isca huaquin mato tapimai. Niaifoan ahuun oinmatifo cunani nan niaifo cuscan inanonfo. <sup>24</sup>Ascano nan oinmati futsan ahuun niaifo fasi ichapacoin millones nificun aqui ihuunifo. <sup>25</sup>Nan nifian cuscaai ahua inantiro inima. Ascacun ahuun niaifoan yoiqui isca huani, “Min ua ahua inantirofo. Ascacun un mia niaifo futsa inain min ahuun yonomati inon. Nanton mihuun rafanan ua pui inanon. Ascacun un mia inanfain min ahuin yafi

min facufo non min mafofori nantifi min aya cuscan un inanmitsai ahuun rafanan min ua nifian cuscan fiishquin,” ishon niaifoan yoiaiton. <sup>26</sup>Nicaquin oinmatinin ahuun ratoconun mai chachishon yoiqui isca huani, “Ifon, uhuun ramapaihuu. Funayamapun. Un mia nifian cuscafin un mia chipo nantifi inainqui,” ishon yoini. <sup>27</sup>Asca huaiton nicaai niaifo ahuun ramapaiquin yoini, “Afanan ratuyamahuu. Natian min ua nifian cuscan un afanan shinainma. Min ua inanyamafaiton nantifi un soai min ua afanan nifinonma. Ascacun casharatahuun,” huani.

<sup>28-29</sup>Ascano niaifoan ahuun pushu murannoashu caqui afu oinmati futsa fuchini. Nantori nan ichapamashta nifian ini. Shafa fusti yonona nifian ini. Ascaciafai aqui nocoshon tumosfain achishon yoini. “Mian nifian cuscan ua inanriscahuu,” huaiton ratoconun mai chachishon yoini, “Funayamapun. Un mia inanon,” huani. <sup>30</sup>Asca huafaitocai futsa manapainima. Ascatama futsanrocon cunu muran iquimani nan nifian cuscan inaintian amuran iyonon. <sup>31</sup>Ascaiton oincani oinmati futsafo fasi ahuun ramapaicoinnifo. Ascano focashon nan acaiton oian cuscan niaifoqui chaninifo. <sup>32</sup>Ascano focashon yoiaifoan nicaquin niaifoan ahuun oinmati cunashon yoini, “Minfin fasi chacacoinquin. Mian fasi ichapacoin nifiifashon min yoiqui isca huua, ‘Ifon, manayopun. Un mia nifian cuscan un mia inanon,’ ishon mian yoiaiton un mia nantifi soashona. <sup>33</sup>Ascacun un mihuun ramapaia cuscan nanscarifi aqui mifu oinmati futsa min ahuun ramapaia shara icuana. Ascatamarocon min ahuun ramapaimaran,” ishon niaifoan yoini. <sup>34</sup>Ascashu fasi sinacoinquin niaifoan oinmati cunu muran iquimafain fasi onaintimashqui.

Ascashon ahuun oinmatifo yonoqui isca huani, “Nan ua nifian cuscan nantifi ua inanyamaiton cunu muranshon cainmayamacahuun,” ishon nan yora omitsisca huamisifo ato huani.

<sup>35</sup>Nanscarifi huaquin ratoran futsan mato chaca huafiacun man ato rau huayamaino niaifoan ahuun oinmati chaca onaintimana cuscan huafain nanscarifi aquin nan uhuun Upa Diosin nai muran icaton matori onaintimashquiran, —ishon Jesús noco yoini.

**Nocofunu yafi ainfo ununantirofohuuonoa**

**Jesús ato yosini**

*Mr 10.1-12; Lc 16.18*

**19**<sup>1</sup>Ascano tsainqui anaititan Jesús nocofu Galilea anoashu Judea mai unu Jordán ocuma futsa cani.

<sup>2</sup>Ascaiton yorahuanrasiton mufaincun nannoshon nan isinincaifoti ato caya huani.

<sup>3</sup>Ascaino Fariseofo Jesusqui funifo. Amaquiri cumamapai fucani. Ascacun yocanifo, —¿Moisés cununi cuscan nocofunon ahuin unupaiquin unutiromun? ¿Nocofunon ahuin ahuuscarashta aiton unutiromun? —ishon yocaifoan.

<sup>4</sup>Jesús ato cumani, —¿Man Moisés cununi cuscan oinmisimamun? Diosin nantifi onihuani. Tau huaquin nocofunu yafi ainfo onihuani. <sup>5-6</sup>Ascano Diosin yoiqui isca huani, “Ascacun nocofunon ainfo fiaino apa yafi ahuamaqui pashcashi ahuin fu itiro. Ascashu nan fusti shinantsa ashcaquin,” ishon cununiquin. Ascacun Diosin ato fianan huaa cuscan afanan tsoa pashcanantiromaran, —ishon ato yoiaiton.

<sup>7</sup>Yocanifo, —¿Nan iconfiacun asca ahuuscaquimun Moisés yonoquin isca huaniquin? “Tsoan ahuin unupaiquin

iquisi cunushoquin isca huatiro, ‘Un afanan mia fipaima. Mun mia unuiran,’” ishon Moisés cununiran, —huaifoan.

<sup>8</sup>Afanan ato cumani, —Manfin nan maton shunifo cuscaraquin. Nanfoanri Dios nicacasmapaonifo. Nanscarifi huaqui marifi man nicacasmai. Ascacun rama man yoia cuscan nannori Moisés cununi. Ascafiacai Diosin tau huaqui anori yononima. <sup>9</sup>Ascacun un mato cayacafi yoi. Ratoran futsan ahuun ahuin nocofunu futsa fu iyamafiacun ahuin unui futsa fiishquin. Asca huaquifin nanton chaca huaiquin. Nan ahuun ahuinma fu iquin cafiscairan, —ishon Jesús ato yoini. <sup>10</sup>Ascaiton nicaquin non afu rafuafoan yoini, —Nanscaracun nocofunu yafi ahuin fiananfoma shara icuanaran, —non huaiton.

<sup>11</sup>Jesús noco cumani, —Un yoiyai cuscacai atirifi yorafoan tapitirofoma. Nan Diosin ato shinanmanafoansifin tapitirofoquin. <sup>12</sup>Ascano atirifi nocofunufocaiyainfo fu fianantirofoma. Atirifi nan cainni cuscan ainfo fu itiroma. Ascan futsafoan atirifi chaca huatiro ainfo fu inonfoma. Ascaino atirificaiyainfo fu fiananfoma Dios yonosharashoshcaquin. Ascacun tsoa ahuionma itiromainquin nan un mato yoiyai cuscan nicacahuun, —ishon Jesús ato yoini.

**Jesús apa Dioshuunshon  
facufo shara huani**

*Mr 10.13-16; Lc 18.15-17*

<sup>13</sup>Ascaino yorafoan aton facumishiti Jesusqui ihuunifo ato manmanpacuquin Apa Dios cufishonon. Asca huafiaifoan non afu rafuafoan ato yoini, —Maton facufo ihuutan nocon Ifo fucash huayamacahuun, —ishon non ato yoiaiton. <sup>14</sup>Jesús noco yoini, —Ato nitun huayamacahuun uqui funonofu.

Uhuun Upa Dios niaifo icariafofin nan facumishti cuscaraforiquin, —ishon yoini. <sup>15</sup>Ascashon facufo manmanpacutan Jesús cani.

**Pushcohuai mafo ichapaya  
Jesús fu tsainni**

*Mr 10.17-31; Lc 18.18-30*

<sup>16</sup>Ascano pushcohuai Jesusqui caashon yocani, —Tapimamisiton minfin sharacoinquin, ¿Unmun ahua shara huatiroquin Dios fu ipashashquin? —ishon yocaiton. <sup>17</sup>Jesús cumani, —¿Ahuuscaquimun mian yocaiquin ahua sharahuunoa? Nannofin fustiquin shara. Naanfin Diosiquin. Ascan min Dios fu ipapaiquin nan noco yononi cuscan nicacoinfain nan yoia cuscacoin min huatiroiran, —huaiton. <sup>18</sup>—¿Rato noco yononicaimun un nicacoinfain nan yoia cuscan huaiiqui? —ishon yocaiton. Jesús yoini, —Futsa rutuyamahuu. Min ahuinma fu iyamahuu. Ahua onuyamahuu. Chaniri yoiyamahuu. <sup>19</sup>Upa yafi uhua nicasharafain ato shara huahuu. Nan mifiri min noiai cuscan futsafohuunri noihuu, —ishon yoaiton. <sup>20</sup>—Nantifi min ua yoiai cuscan mun nanscacin huaa. ¿Ascan ahua futsamun un ahuusca huatiroquin ahuunoashu isharashquin? —huaiton.

<sup>21</sup>Afanan yoini, —Min Dios cuscara shara ipaiqui nantifi min aya cuscan inanmitsashon ahun rafanan pui fiihuu ahuuomafo ato inanshquin. Min ascaitofin Upa Diosin nai muranshon mia ahua sharacoin mucushoniquin. Asca huatan ua tanasharahuu, —ishon Jesús yoini.

<sup>22</sup>Asca huaiton nicai nan pushcohuai puusinima. Mafo ichapayashu ahun mafofo inanmitsacasmai. Ascatan Jesusmaquinoashu cani. <sup>23</sup>Ascashu man caano Jesús noco yoiqui isca huani,

—Un mato icon yoi. Yora mafo ichapaya fustirasi uhuun Upa Dios niaifo ari nocopaifiacani nocotirofoma. Nanfoan aton mafo ichapa shinanquicai tsoan Dios shinantiroma. <sup>24</sup>Ascacun afanan un mato yoi. Nan ina camellocai acoya shoi muran finontiroma. Mimacaifi nocofunu mafo ichapaya Diosin niaifo ari nocotiromaquin, —ishon noco yoini.

<sup>25</sup>Asciton nicacaquin non afu rafuafo mustairitan non yoini. —¿Ascan tsoa Dios fu nipatiromun? —ishon non yocaiton. <sup>26</sup>Jesús nocoqui fusoacucahuan noco cumani, —Nocofunucai afiri numatiroma. Diosin fustitofin yorafo numatiroquin. Nantofin ahumamishti huatiroquin. Nocofunfoan atiroma cuscan nan Diosin huatiroiran, —ishon noco yoaiton. <sup>27</sup>Pedronun yoini, —Ifon, nonfin nocon ahuafo nantifi yafi nocon yorafo non pota furani mifu oquin. ¿Ascan Diosimun noco ahua inainquin? —ishon yocaiton.

<sup>28</sup>Afanan Jesús noco yoiqui isca huani, —Un mato icon yoi. Un chipo nantifi manifoti iquinaitian nantifiton ua oinshquicani uhuun Upa Dios cuscara sharacoin icaiton. Nantianri marifi nan ua tanamisi nocon caifo doce shoco Israelifo marifi man ato iquishquin. <sup>29</sup>Ascata tsoan uhuunshon ahun pushu yafi ahun yorafo potafain apa potafain ahua potafain ahun facufo yafi ahun mairi potashon ua tanapaisharai. Nanscara yorafin uqui nocoaitian fasi paratama fiishquiquin. Ascashu ufu ipanaca. <sup>30</sup>Ascafia yora ichaparasi niyoashu nan niaifo cuscarafu. Ascan naashucai afanan tsoa ahua ishquima. Nanscarifiai atirifi niyoashu nan ahua shinantsafo. Ascafia naashu u futan futsafori iquishcani.

**Mau yonomisifohuunoo ahuara futsa  
Jesús ato tapimani**

**20**<sup>1</sup>Ascano ahuu cuscaramain Upa Diosin ahuun yorafo iquinai cuscaraquin afanan un mato tapimai isca huai. Mau ifoan funamanrishta nocofunufu funai cani ahuun mau uhuapa ano yonoi fononfo. <sup>2</sup>Ascano ato fuchishon yoiqui isca huani, “Uhuun mau ano yonoi focahuun. Nan man shafa fusti yonoa cuscan un mato inain. ¿Ascán sharamun?” ato huaiton. “Ai. Sharafinquin,” huanifo. Ascashon ahuun mau ari ato nichini.

<sup>3</sup>Ascatan man fari cuyainano mau ifoan caaquin oian plaza ano nocofunufu nia ini tsoa yonoima.

<sup>4</sup>Ascaiton mau ifoan ato yoini, “Uhuun mau ano yonotacahuun un mato ahuun rafan inansharanon,” ato huaiton. Nicacani fonifo yonoi focani. <sup>5</sup>Ascano mau ifo afanan fari masafinin racano caaquin oian atirifi nocofunufoan ahuushta huatama niafo oinquin. Ato yoini, “Uhuun mau ari fotacahuun,” ato huaino man foafono. Afanan man fari cushca cainnaino macushcamuano atirifi fuchishon nanscarifi huaquin ato nichini. <sup>6</sup>Ascatan man yatai fari nii manaon caano mau ifoan afanan caaquin atirifi fuchini yonocanima niafoan. Ascaiton ato yocani, “¿Ahuuscaimun nan shafatisho yonotama man niaquin?” ishon ato yocaiton. <sup>7</sup>Cumanifo, “Tsoan ahuashta noco yonoamaran,” huaifoan. “Ascacun marifi uhuun mau ari ua yonoshotacahuun,” ato huani.

<sup>8</sup>Ascashon man yamuaino mau ifoan yonona niaifo patashari yononi, “Ua yonoshonaifo cunahuu nan yonoafo rafanan ato inanshquin. Ascashu ato inanqui tau huahuu nan ahuun unutaqui foafo yafi nan foi tauafo,”

ishon yononi. <sup>9</sup>Ascaino man fari nii manaon caano foafo. Nanfo ato inanni naan shafa fusti yonoa shinantsa huaquin. <sup>10</sup>Ascano nan funamanrishta yonoi tauafoan oincaquin yoinifo, “Mau ifoan ato inanshara. Ascán nonfin paratama yonoaquin. Ascacun noco fasi paratamacoin inainran,” ishon shinannifo. Ascafia nan chipo iquiafo ato inan cuscaro ato inanqui huani.

<sup>11</sup>Ascashon ato yonohuunshon ato inainton fiicani mau ifoqui tsain chaca huacani afo ranan yoinancaquin yoinifo.

<sup>12</sup>“Ascán nonfin nan shafatishon yonoaquin. Fari isicoín muran. Ascán man fari caino chipo fuafo min ato inan cuscan huaquin nocorifi min inainran,” ishon yoiaino. <sup>13</sup>Mau ifoan futsa cumaqui isca huani, “Uhuun yorashta. Uncai mia inanqui chaca huama. ¿Ascán manmun u futan shara huama man shafa fusti yonoaihuunoo? Man manfin ‘Shararan’ huaaquin. <sup>14</sup>Ascán naquin min pui fiilhuu min pushu ano catashquin. Ascán nan fari man nii manaon caano yonoafo nan un mia inain cuscan nanfari un ato inansharapai. <sup>15</sup>Nan un ato inanpaiyai cuscan un ato inantiro. Nanmain uhuun puicufin. ¿Ascán ahuuscaquin nan faricaino yonoafo yafi man uqui shinain chacaimun? Unfin futsafori shara huapaiquin,” ishon mau ifoan ato yoini.

<sup>16</sup>Ascán nanscarifiai Upa Diosin nan icoinra huaqui tau huafo ato shara huac cuscan huaquin nan chipo icoinra huafori nanscarifi ato shara huairan, —ishon Jesús ato yoini.

**Naashquiai cuscahuunoo  
afanan Jesús yoi futsani  
Mr 10.32-34; Lc 18.31-34**

<sup>17</sup>Ascashu Jesús Jerusalén ano caquin doce non afu rafuafo noco fusti futsano iyoni nannonshon noco yoiquin isca

huani, <sup>18</sup>—Non Jerusalén ano canon. Nannoshon futsan ua ato achimai nan nocon niaifofo futan Moisés tsain tapimamisifoanri ua chaca huacaquin yoicani isca huacaquin, “Jesús rutucahuun,” ishon yoifocani.

<sup>19</sup>Ascashon caifo futsafori ua inancani nanfoan ua cashu mutsama huafain fichi cunoqui tuchiaton ua coshacani. Ascatan ihui coyan iquinanqui ua mastacani un nanon. Ua asca huafiafo osha rafu non fustitan Upa Diosin afanan ua funimairan, —ishon noco yoini.

**Juan futan Santiago ahuan yocani cuscan**  
*Mr 10.35-45*

<sup>20</sup>Ascano Zebedeo ahuan facu rafu Juan yafi Santiago ahuan ato Jesusqui iyoni. Ascatan aqiu nocoshon ahuan Jesús ratoconun mai chachishoni. Ahuara futsa yocapaiquin. <sup>21</sup>Ascaiton Jesús yocani, —¿Min ahua yoipaimun un mia ashonon? —huaiton. —Ifon, Upa Dios icari nantififain min aton niaifo icaitian uhuun facu rafu mifu niaifo patashari ato imahuu. Ascatan niaifoan ahuan tsaoti ano min tsaoitian uhuun facu rafutan mia naqui huashu tsaononfo, —ishon yoiaiton. <sup>22</sup>—Man ua yocai cuscacai man tapiama. ¿Un omitsiscashquiain cuscan man ufu omitsiscatiromun? —ishon Jesús ato yocaiton. Cumanifo, —Ai. Non mifu itiroran, —huaifoan. <sup>23</sup>Ato cumani, —Icon marifi man omitsiscacai. Ascafia uncai yoitiroma tsoanmain ua naqui huashu tsaocai. Uhuun Upa Diosin fustitofin tapiquin. Nan catoanfosi ufu nanno tsaotiroran, —ishon ato yoini.

<sup>24</sup>Ascaiton nicai non afu rafafo atirifi mucu rafuti nan nanu rafuqui non fasi sinacoinni Jesús naqui huashu tsaopaiyaifoan nicai. <sup>25</sup>Non ascaiton tapishon Jesús noco cunashon yoiqui isca huani, —Uqui fucahuun un mato yoinon. Nan icoinra huafoma niaifofoan

ato curushcain yonofafainmisifo. Aton niaifo patasharifoanri ato yoiqui isca huamisifo, “Nonfin mato ifoquin. Ascacun non mato yoia cuscan man noco ashorisca huatiroran,” ishon curushcain ato yoimisifo. <sup>26</sup>Ascafiaifoanno ato cuscara iyamacahuun. Man ratoran futsan niaifo ipaiqui maton oinmati man shara huafafainmisi itiro. <sup>27</sup>Ascatan man futsan futsafori finonpaiyaino ahuan yononmati man itiro. <sup>28</sup>Nanscarifiai futsa ua ashononcai un oama. Ascatamarocon un futsafo ashoyoi ua oa. Ascatari un atohuunoashu naashquin un oni afanan Satanás ato ifon inonma, —ishon noco yoini.

**Jesús fusho rafu caya huani**  
*Mr 10.46-52; Lc 18.35-43*

<sup>29</sup>Ascatan non Jericó anoashu caiton yorahuanrasifain noco mufainifo. <sup>30</sup>Ascaino nannori fai cuseumun fusho rafu tsaofa ini. Jesús fain caiton nicaquin nan rafutan cunanifo isca huaquin, —Ifon, minfin David ahuan funaquin. Nocoahuun ramapaipun, —ishon cunanifo. <sup>31</sup>Ascaifoan yorahuanrasifain ato asca huanifo afanan tsainonfoma. Ato asca huafiainfoanno oi ashcafinin afanan cunanifo, —Ifon, minfin David ahuan funaquin. Nocoahuun ramapaipun, —huariaifoanno. <sup>32</sup>Jesús nituacucahuan ato cunashon yocani, —¿Un mato ahua ahuusca huashotirokun? —ishon ato yocaiton. <sup>33</sup>—Ifon, non fasi oinpaicoin, —huaifoan. <sup>34</sup>Jesús atohuun ramapaipun aton furo muainno cayariscatan oinsharanifo. Ascashon nan rafutari Jesús mufainifo.

**Jesús Jerusalén ano cani**  
*Mr 11.1-11; Lc 19.28-40; Jn 12.12-19*

**21** <sup>1</sup>Ascatan non Jesús fu cai Jerusalén chaima non noconi. Nan chaimari pushurasi futsa ahuan

anu Betfagé machi Olivo tunanman ini. Nanno nocoti chaima Jesús afu rafuafo rafu pushurasi Betfagé ano ato nichini. <sup>2</sup>Ato nichiataima ato yoiqui isca huani, —Nan pushurasi ano fotocahuun. Nanno nocoshon man oian burro facuya nushua man fuchicai. Nan tupushon nuri ua ihuushotacahuun. <sup>3</sup>Futsan mato yocaiton ato yoicahuun, “Nocon Ifo yopaiton non iyoshoni cai. Ascafia non mato nasorisca huairan,” ishon ato yoitacahuun, —Jesús ato huani.

<sup>4</sup>Jesús acai cuscan huaquin nannori ahuunoa Diosin tsain yoimisiton cununi.

<sup>5</sup>Ascano cunuquin isca huani, “Jerusalén anoafo yoihuu isca huaquin, ‘Oincapon. Mato niaifocoin matoqui oi. Nan burropan facu camaqui tsoashu matoqui oi. Nancai nocofunu ahuaton curafiapaitama shara fustisi oitsii huafain fusti yoitiroran,’”

ishon Diosin tsain yoimisiton ahuunoa cununi.

<sup>6</sup>Ascatan nan rafutan Jesús ato yoia cuscacoin huashonifo. <sup>7</sup>Ascashon burro yafi ahuun facu Jesús iyoshonifo. Iyoshocata burropan facu camaqui ato camisa fucashonafoanno acamaqui Jesús tsainacahuani. <sup>8</sup>Ascatan caiton yorahuanrasifoan fai naman cayan afufori aton camisafo fucashonifo. Ascaino atirifiton shupa shatushon nan caifufori nichinifo. <sup>9</sup>Ascano nan yorahuanrasi afufori foaifo futan achachi foaifoan nantififain oi ashcafinin yoinifo.

*iAicho! David nocon niaifo ipaoniton ahuun funa nocoqui oi. Nanfin Dioshuunoashu nocoqui oiquin. Ascacun Upa Diosin nan shara huahuu,*  
ishon yoinifo.

<sup>10</sup>Ascashu Jesús Jerusalén ano caiton nicacani nantifi yorafo mustairicatan afi

ranan yocanonannifo, —¿Tsoamun naaquin? —icashu.

<sup>11</sup>Ascaifoan nan Jesús fu foafoan yoinifo, —Nanfin Jesusquin. Diosin tsain yoimisi. Nanrifi pushurasi Nazaret nan Galilea anoaquin, —ishon yoinifo.

**Jesús Dios fu tsainti pushu muranshon ahuara chacafo potani**

*Mr 11.15-19; Lc 19.45-48; Jn 2.13-22*

<sup>12</sup>Asca huatan Jesús Israelifoan Dios fu tsainti pushu muran iquitoshiquin oian amurannoashu ahuara inanmitsashon pui fiaifoan oinquin nan sapa acamaquishon pui fiaifo finifoan arasaquin futsani. Ascashon nan ruhui inanmitsaifoan aton tsaotiri finifoan potaquin futsani.

<sup>13</sup>Ascashon Jesús ato yoini, —Diospan tsain cunuquin isca huani, “U fu tsainti pushu muranshon man ua fusti cufitiroran,” ishon cunufiani nan yomutsofoan ichananti cuscara man huapairan, —ishon ato yoini.

<sup>14</sup>Ascaino fushofo yafi nipaiqui ranainfo Dios fu tsainti pushu muran Jesusqui funifo. Ascacun ato caya huani.

<sup>15</sup>Ascaiton nan Dios fu tsainti pushu muranshon unimacaquin facufoan oi ashcafinin yoinifo, —iAicho! Nan David ahuun funa Jesús fasi shara. Ascacun nan shara huahuun, Upa Diosin, —ishon yoinifo. Tsoan atiroma cuscan huaquin Jesús ato shara huashomisi ascaifoan nicai Israelifoan niaifofo yafi Moisés tsain tapimamisifo sinacoinnifo.

<sup>16</sup>Ascashon nanfoan Jesús yoinifo, —¿Nan facufoan yoiafo cuscan min nicaimamun? —ishon yocaifoan ato cumani, —Aifain. Munfin nicaiquin. ¿Ascaino marifi nan Diosin tsain cununi cuscan man man nicamisimun? Cunuquin isca huani,

“Mihuunshon facufoan mihuunoa tsain shara yoicaniran,”  
—ishon cununi.

<sup>17</sup>Anori ato yoitan atomaquinoashu no fu cai pushurasi ahuun anu Betania ano cani. Nanno osha fustiyoni.

**Fana higuera fimiymacaiyaiton Jesús ahuun tsainmansi namani**

*Mr 11.12-14, 20-26*

<sup>18</sup>Iyoconaino Jesús Jerusalén ano cai fonaincoinni. <sup>19</sup>Ascashu caquin oian fai cusumunri fana higuera fuchini. Ahuun fimi pipaifia ahuun puifosi ini. Ascacun nan fana Jesús yoiqui isca huani, —Afanancai min fiminacamaran, —ishon yoini. Yoiquin asca huaino fana tsasisiriscatani.

<sup>20</sup>Ascaiton oin non afu rafuafo non mustairini. Ascashon non yoini, —¿Ahuuscashumun nan fana tsasisiriscacuin? —ishon non Jesús yocaiton.

<sup>21</sup>Noco yoini, —Un mato icon yoinon. “Un icoinra huai iyamarai un icoinra huaimaran,” ishon shinantama man icoinra huacoinshon un fana tsasi huaa cuscan marifi man nanscarifi huaitiro. Ascashon machiri man yoitiro, “Tsucuca. Unuhuan muran pacuhuu,” man huaino unuhuan muran pacuriscatiro. <sup>22</sup>Ascacun man icoinra huacoinshon ahuarashta man Upa Dios yocaiton mato ashotiroran, —ishon Jesús noco yoini.

**Jesús noco yonotiro**

*Mr 11.27-33; Lc 20.1-8*

<sup>23</sup>Asca huatan Jesús Israelifoa aton Dios fu tsainti pushu muran iquishon ato yoiaino Israelifoa aton niaifofo aquí funifo. Aquí fucashon yocanifo, —¿Min acai cuscan tsoan mia yonoamun? —ishon yocai foan.

<sup>24-25</sup>Jesús ato cumani, —Urifi un mato yocai. ¿Juanpan yorafo unu muran iquimacuni tsoan yonoa asca huanimun? ¿Diosin iyamarai

nocofunufoa yononifomun? Man ua cumasharaiton urifi un mato cumatiroran, —ishon ato yoiatton. Nicacani afiranan yoinannifo —Diosin Juan nichiniran non huaiton Jesús noco yoitiro, “¿Ascan ahuuscaquin man Juan icoinra huamamun?” noco huaitiro. <sup>26</sup>Ascan Juan nocofunufoa nichiniran non huaino yorafo nocoqui sinatirofo. Nantifi yorafoanmain yoisimiso “Juanpan Diosin tsain yoisimisan,” ishon. Ascacun noco asca huatiroforan, —icashu niaifofo yoinannifo atoqui musucani. <sup>27</sup>Ascashon Jesús yoinifo, —Noncai tapiama tsoanmain Juan yonoaquin, —ishon yoiaino. Jesús afiri ato yoini, —Urificai un mato yoiama tsoanmain ua yonoa un ahuarafa huaiton, —ishon Jesús ato yoini.

**Pushco rafuhuunoa ahua futsa ato yoini**

<sup>28</sup>Asca huatan ato yocani, —¿Man raquiri shinainmun? Nocofunu facu pushcohuai rafuya ini. Ascashon furu iyoa apan yoini, “Upashta, nocon mau ano yonotahuun,” huaiton.

<sup>29-30</sup>Furumun cumani, “Ma, upa, un yonoicaimara,” huafiashu chipo shinan futsashu cani. Ascashon furu chipocuri yoini, “Upashta, nocon mau ano yonotahuun,” huaiton. “Ai, upa. Mun yonoicairan,” huafiashucai canima.

<sup>31</sup>¿Ascan rato ahuun facu rafu nan apa yoiama cuscaquin animun? —ishon Jesús ato yocaiton. —Nan iyoaran, —ishon cumaifoan. Afanan ato yoini, —Un mato icon yoi. Nan yora chacafo niaifo pui fishomiso yafi ainfo furomafonan ua icoinra huacanashu nanfo Diosin nantifi iquinai ano iqui tautirofo. Ascan manca ari iquitiro. <sup>32</sup>Juanpan mato yoisharapaoni isca huaquin, “Man chaca huamisi cuscan shatufain natian Dios shinacahuun,” ishon mato yoiapani. Ascafiacai man icoinra huanima. Nan



niaifo pui fishomisifo futan ainfo furomafoanri icoinra huaifoan oinfiaquicai maton chaca shatuyamafain man icoinra huamisisaran, —ishon Jesús ato yoini.

**Mau yonomisi chacafohuunoo  
ahuara futsa ato yoini**

*Mr 12.1-12; Lc 20.9-19*

<sup>33</sup>—Nicacahuun un afanan ahuara futsahuunoo un mato yoi mato tapimashquin. Mau ifoan ahuun mau ano fimi ahuun anu uva fanani. Ascashon ahuun fimi ica cuscan toquiri cunuacuni ahuun fimi fana ahuaton chaca huanonma. Asca huatan mai quini huashon amuran uva huashon ahuun tau puama puama anifo ahuun fimi unu fiishcaquin. Ascashon toquiri cuyacoin masoni anoshon ahuun yonomatini cushushonon. Asca huaquin anaitishon futsafo yoini ahuun mau cushushononfo. Asca huafaini mau ifo mai futsa ano cayoni. <sup>34</sup>Ascashu man fimi ano mau ifoan ahuun oinmati futsafo mau ano nichini ahuun fimi fishononfo. <sup>35</sup>Ascano nocofoan fimi cushumisifoan ato achicashon futsa sutufain futsa rutucoinfain futsari toquirinin tsacaqui futsanifo. <sup>36</sup>Ascano mau ifoan ahuun oinmati ichapama nichiqui tau huani. Ascashon afanan acachori fasi paratama nichini. Ascafia nanfori ato chaca huanifo. <sup>37</sup>Ascashon mau ifoan shinanni, “Uhuun facucuin un nichicuraca nicatirofoati,” ishon ahuun unutaqui furucuin nichini. <sup>38</sup>Ascashon apa nichian caiton oincani nan fimi cushumisifo ahuun yoinancaquin yoinifo, “iOincapon! Mau ifoan ahuun facu oi. Na maufin apanaquin. Ascafia apa chipo ahuun facu inanshquin. Ascacun non rutunoncahuun nocona mau inon,” icashu yoinannifo. <sup>39</sup>Ascatan furu

iquicuranaiton achicashon mau tsisumun sharafoshon rutunifo.

<sup>40</sup>¿Ascán mau ifo oshon nan fimi cushumisifo ato ahuusca huashquimun? —ishon ato yocaiton. <sup>41</sup>Cumanifo, —Nan yora chacafu rutui atohuun ramapaitama nanonfo. Ascashon ahuun mau futsafo cushumani cushusharashononfo. Nanfoan man fimicun cashcu futsa mau ifo inanonfo, —ishon yoiaifoan.

<sup>42</sup>Jesús afanan ato yoiqui isca huani, —¿Diosin tsain cununi cuscan man man oinmisisamun? Isca huaquin cununi, “Pushu yonomisifoan pushu quishi shara potanifo. ‘Nan sharamaran’ ishon potafiafo pushu ifoan afanan fini nanhuunoashu pushu mutsisipa inon.” Nanscarifiai niaifofoan Diospan facuhuunoo isca huaqui yoishquicani, “Nacai ahuama. Sharamaran,” ishon yoiqui potashceni. Ascafia Upa Diosin ahuun facu catoan ahuunoashu nantifi ahuun yorafo nipanonfo. Ascacun non yoitiro “Diosin Furunhuunshon aca cuscan fasi shararan,” ishon cununi.

<sup>43</sup>Ascacun Diosin maton niaifocoin ipai ahuun yorafo ato iquifai ato iquipacushquin. Ascafia man Dios nicacasmaiton futsafo catonshquin a fu ipanonfo. <sup>44</sup>Unfin nan pushu quishi cuscarauqui. Futsafoan uhuunoo cayacafi tapimana cuscan icoinra huayamashu funocoinsheani. Un atoqui sinaqui omitsiscapanacafo muran un ato potashquin, —ishon Jesús ato yoini.

<sup>45</sup>Ascaiton nicacani Israelifoan aton niaifofo futan Fariseofoan tapinifo atohuunoo Jesús yoiaiton. Nanfoan icoinra huafomahuunoo ato yoini.

<sup>46</sup>Ascano ahuun yoinannifo, —¿Ahuuscashomain non Jesús ato achimanan ranushumuatun rutunon?

—ishon shafatifi shinannifo. Ascafiaifoanno yorafoan yoinifo Jesús Diospan tsain yoimisiran ishon ahuuonoa yoinifo. Ascacun na yorafoan yoiainfo cuscan tapinifo niaifofu yafi Fariseofoan yorafoqui musucaquin Jesús achimatái inifoma.

**Nocofunu yafi ainfo fianantirohuuonoa ahuara futsa ato yoini**

*Lc 14.15-24*

**22**<sup>1-2</sup>Afanan Jesús ato yoiqui ahuara futsa ato tapimanon isca huani, —Upa Diosin niaifoan ahuun yorafo iquinainmain ahuu cuscaraquin un mato yoinon. Ua nicacahuun. Niaifoan ahuun facu ainfo fiaino ato chanihuani ichananshon ato futan pifain atofu fasi unimashquin. <sup>3</sup>Ascano man itisharashon ahuun oinmatifo nichini nan ato chani huaifo ato ihuitanonfo. Ascafiacai toan opainima. Fucasmarocon anifo. <sup>4</sup>Ascatan afanan oinmatí futsafori nichiqui yoini, “Ato yoitacahuun. ‘Uhuun facu ainfo fiaino mun tushu itishara huaaquin. Moi rafu rutufain yoina shoa sharari un rutuaqui pii funonfo.’ Nannori ato yoitacahuun,” ato huani.

<sup>5</sup>Ascano focashon ato yoifiafo afanan fucasmanifo. Atirifi aton mau ari fonifo, pashaifocani. Atirifiri ato inanmitsati ari fonifo. <sup>6</sup>Ascán atiri nanno nituafoan niaifoan ahuun oinmatifo achicashon ato sutufain atirifi ato rutucoinnifo. <sup>7</sup>Ascano ahuun oinmatifohuuonoa nicai niaifo fasi sinacoinqin ahuun ranushumuafu nichini a rutumitsamisifo ato rutuqui cuyofain aton pushufo coanonfo.

<sup>8</sup>Asca huatan niaifoan ahuun oinmatí futsafo yoini, “Uhuun facu ainfo fiaino un tushu ichapa itishara huaa ato futan piishquin. Ascafia futamarocon fasi chaca huafo. Asca huashucai afanan

futirofoma. <sup>9</sup>Ascacun nan fai uhuapafo nanno nan yora ichapa fotirofo ano fotacahuun. Ratoran futsafo fuchicashon ato yoiacahuun Funonfo,” ishon yoini. <sup>10</sup>Ato asca huaino focashon nan fai uhuapafo anoa ratoran futsafo fuchicashon ato ihuunifo. Yora sharafo ihuufain yora chacafori ihuunifo. Ascano nan niaifoan ahuun facun ainfo fiaí pushu muran yorahuanrasi fospicoinnifo.

<sup>11</sup>Ascatan niaifo pushu muran iquini nantifi fuafo ato oinpai. Ascashon oian nantififain sahuuti shara sahuuafu ini. Niaifoan ahuun facu ainfo fiaino sahuuti funa sharacoin ato sahuumani. Ascafiaquin oian nocofunu futsan sahuuti shuni sahuua niaifoan fuchini. <sup>12</sup>Fuchishon yoiqui isca huani, “Ahuuscai sahuuti sharacoin un ato sahuumana cuscan min sahuuamamun. ¿Ahuuscai ascara min iquiamun?” ishon yocafianocai nan nocofunu pusinima. <sup>13</sup>Ascaiton niaifoan ahuun oinmatifo yononi, “Nan nocofunu munushfain onushushon faquish muran potacahuun. Nannoashu uaicaifoanno omitsiscapashanon,” ishon ato yoini.

<sup>14</sup>Nanscarifiai Upa Diosin yora ichapa cuna a icano funonfo. Nan ahuun facu noiaifosi afu ipanacafo. Ascafia Upa Diosin fustirasi ato catoin nan icoinra huafosi afu ipashanonfo, —ishon Jesús ato yoini.

**Niaifofoan aton caifofo pui yocamisifohuuonoa**

*Mr 12.13-17; Lc 20.20-26*

<sup>15</sup>Ascatan Jesús ato yoiái cuscan nicacani Fariseofo Dios fu tsainti pushu murannoashu chifi focanashu yoinannifo, —Non Jesús ahuara yocanon. Noco amaqiri cumaquin chaca huaiton non cunu muran iquimanon, —icashu ahuun yoinannifo.

<sup>16</sup>Ascashon Herodes ahuun tanamisifo yafi atohuunshon tapimisifori Jesusqui nichinifo cucun huaquin yocatanonfo. Ascano focashon yocaqui isca huanifo, —Tapimamisiton, man non tapian min icocoin fusti noco yoifafainmisi. Upa Diosin noco amapaiyai cuscan nannoricoin min noco cayacafi yoimisi. Mincai ahuara yoipai ranomisimari. Nan min noco yoiai cuscan cayacafi min yoimisi. Ahuaricai min fomamisima. Yora ahuaton cunama min yoimisi cuscan huaquin niaifofori min yoitiro.

<sup>17</sup>Ascacufin min shinain cuscari noco tapimahuu. ¿Nan Romanonfoan aton niaifo Cesari pui inanfo cuscan norifi non inantirromun? —huaifoan. <sup>18</sup>Nan fuparamitsamisifoan cucun huaquin yoiaifo cuscan onanshon Jesús ato yoini, —Fuparamitsamisifoan manfin ua amaquiri cumamapaiquin ranushumuafoan ua achicashon ua cunu muran iquimanonfo, —ishon ato yoitán.

<sup>19</sup>—Toro ua ismacahuun. Nan man ahuunshon niaifo inanmisi, —ato huaiton. Toro fushonifo. <sup>20</sup>Ascashon Jesús ato yocani, —¿Tsoa ointsa torohuun nuamun? ¿Tsoan ahuun anuri nuamun? —ishon ato yocaiton.

<sup>21</sup>—Niaifo Cesarinnaran, —huaifoan. —Ascan Cesarinacun nan inancahuun. Ascan Diosinacun Diosiri inancahuun, —ishon ato yoiaiton.

<sup>22</sup>Nicacani fasi mustairicatan yoinifo, —Jesús yoiai cuscaai tsoan tafitromaran, —icashu afi ranan yoinannifo. Ascatan amaquinoashu pashcafaini fonifo.

**Yora naashu afanan  
funitirofohuunua yocanifo**

*Mr 12.18-27; Lc 20.27-40*

<sup>23</sup>Ascano nan shafatari Saduceofo Jesusqui funifo. Nanfoan shinanquin isca huamisifo, —Yora naashucaí afanan

funinacamaran, —ishon yoinifo.

<sup>24</sup>Ascan nanfo Jesusqui fucashon yocanifo, —Tapimamisiton, noco shuni Moisés noco cunushoqui isca huani,

“Nan ratoran futsa ahuin futan facu acashma naano afu nanua futsan ahuun facahua fitiro a futan facu aashqui,”

ishon cununi. <sup>25</sup>Un mia yoinon. Siete nanupacuafohuunua. Nanfo nocofu iyoponifo. Aton iyoacoin ahuinyain tauni. Ascafiashon a futan facu acashma nani. Ascano chipocuton ahuun facahua fiini. <sup>26</sup>Ascashu arifi a futan facu acashma naani. Ascano chipocu futsari fiini. Arifi a futan facu acashma naani. Nanscasiai. Ascapacutan amaqui nai cuyonifo. AQUI facu ayamacaicani.

<sup>27</sup>Ascatan ahuun unutani ainfori naani. Facu nanuyamacai. <sup>28</sup>¿Ascan ratotocaimun nai muranshon nan yorafo naashu funiaifotian fiishquiquin nan fusti fipashquin amaqui nai cuyoafo? —ishon yocaifoan.

<sup>29</sup>Jesús ato cumani, —Man man funoa. Mancai Diosin tsain tapiamafain ahuun yonoricai man tapiama. Ascashofin amaquiri man ua yoiiquin. <sup>30</sup>Naacanashu funiafocai Dios icari nocotan afanan fianannacafoma. Nantifi Diospan oinmatifo afu nai muran icafo cuscara iishquicani. <sup>31</sup>¿Ascacun yora naashu funishquiaifohuunua Diosicoinin mato cunushoni cuscan man man oinmismun?

<sup>32</sup>Isca huaquin Diosin yoini, “Unfin Abraham non Isaac non Jacob afoan aton Diosiquin,” ishon yoini. ¿Yora naashu afanan funiyamaino ahuuscashumun Dios fu itiroquin? Ascafia ascarama. Yora man naafianishaquin afanan nia nanfofin Dios fu itirofoquin. Ascacun Upa Diosifin aton Diosiquin, —ishon Jesús ato yoini.

<sup>33</sup>Jesús Saduceofo yoiai cuscan nicacani mustairicatan yoinifo,

—¿Ahuuscashomun iscara tsain noco yoiquin? Tsain sharacoin iquinaran, —ishon yoinifo.

**Diosin yononi cuscan nantifi sharafiashu nan fusti shara finaciai**

*Mr 12.28-34*

<sup>34</sup>Ascano Jesús Saduceofo tsain shatumana nicacani Fariseofo afanan aqui funifo yocai fucani. <sup>35</sup>Ascacun Moisés yononi cuscan tapicoian futsan Jesús amaquiri cumamapaiquin yocani, <sup>36</sup>—¿Tapimamisiton, Moisés Diosin yonoo cuscan cununi. Ascan nan ratocaimun fasi shara finaciai quin? —ishon yocai foan. <sup>37</sup>Jesús cumaqui isca huani,

“Nocon Ifo Dios noi qui fasi mato ointi muranshon noifain fasi mato nomuranshori noifain mato shinanfo yashon fasi noi huu,”

ishon Moisés cununi. <sup>38</sup>—Nan yononicaifi fasi shara finaciai quin. <sup>39</sup>Futsari nanscaracuana yonoqui isca huani,

“Nan mifiri min musu huamuai cuscarifi aquin mia chaima icafori noi huu.”

<sup>40</sup>Nantifi Moisés yononi cuscan yafi Diosin tsain yoimisifoan yosipaonifo nan Diosin yononi rafuhuunoo cununifo. Dios yafi futsafo noicoinquifin nantifi Diosin yononi cuscacoin man ai quin, —ishon Jesús ato yoini.

**Tsoancaimun Cristo ahuun shuni ipaoniquin**

*Mr 12.35-37; Lc 20.41-44*

<sup>41</sup>Ascashu Fariseofo afu ichananfoan Jesús ato yocani, <sup>42</sup>—¿Nan Diosin catonni Cristohuunoo ahuu cuscara man shinanmun? ¿Tsoan funacaimun? —ishon ato yocaiton. —David ahuun funaran, —huai foan. <sup>43</sup>Ato yoini —¿Asca ahuuscai David Diospan Yoshin

Sharahuunshon nan Diosin catonni yoi qui isca huanimun?

<sup>44</sup>“Upa Diosin uhuun Ifo Cristo yoini isca huaquin, ‘Minfin ufu niaifocoinquin. Mia noicasmaifoan min ato finoncoian. Un ato shatumashquin mia afanan ahuusca huatiroma. Min ato iquinaran,’”

ishon Diosin yoini cuscan David cununi. <sup>45</sup>¿Criston David Ifoan ahuuscashuun ahuun funa itiomun? —ishon Jesús ato yoi aiton. <sup>46</sup>Nicaquicai tsoan ahuashta cumatiro inima. Ascashu nantifi puusinifoma. Ascan anantiancai tsoan afanan Jesús ahuashta yocanima. Ato cayacafi cumaiton nicacanashu aqui ranonifo.

**Fariseofo futan Moisés cununi cuscan tapimamisifoan chaca huamisifo cuscan Jesús yoini**

*Mr 12.38-40; Lc 11.37-54; 20.45-47*

**23** <sup>1</sup>Asca huatan Jesús afu rafuafo yafi nanno niafo yoini,

<sup>2</sup>—Moisés cununi cuscan tapimamisifo futan Fariseofoan Moisés yononi cuscan mato tapimacani. <sup>3</sup>Ascan mato tapimanaifo cuscan huacahuun.

Ascafiashon nanfoan acai cuscan huayamacahuun. Nanfoan Moisés cununi cuscan mato tapimafiaquicai Moisés yononi cuscacoin acanima.

<sup>4</sup>Mato ahuara ihuucoin papimafiashocai aton mucuman ahuashta mupaicanima.

Nanscarifiai Moisés yononi cuscan nantifi huacahuun. “Fustishta finonmayamacahuun,” ishon mato yonoafo. Moisés yononi cuscan fasi

finonmafain mato huamacani. Ascano marifi apaifiaquicai man atiroma. Ascashu maton nomuran man omitsiscafiaitocai mato huun ramapaicanima. Mato yonomisifo cuscacai aafi acanima. <sup>5</sup>Ascashon nanfoan acaifo cuscan futsafoan yoi qui

isca huacani, “Nanfofin sharaquin,” ato huamapaicani. Diosin tsain fichiqui cunushon fumananqui nutafain ato sahuuti poyan ocuma rafu nutafain sahuuti chainipari sahuuafu. <sup>6</sup>Ascatan picani ichananshu nan niaifan ahuun tsaoti ano tsaofu nantififain ato oinonfo. Nanscarifiai aton ichananti pushu anori shafacafi tsaotiofo. <sup>7</sup>Ascashu nan yora ichaparasi anori fopaicani atohuunua yoisharanonfo. Nanscafin apaicaniqui. “Tapimamisiton,” ato huaifan nicapaicani.

<sup>8</sup>Ascacun “Tapimamisiton,” ato huayamacahuun. Nocon tapimamisifin fustiquin. Naan nocon Ifo Dios. Ascashufin man nantifi yorahuantananquin. <sup>9</sup>Ascashori tsoa nuno mai anoa Upa huayamacahuun. Nan nocon Upacoinfi nai ari icaquin. Nan fusti non upa huatiro. <sup>10</sup>Ascatan “Iforan” ato huayamacahuun. Nocon ifofin fustiquin. Nan nocon Upa Dios. Nan man Iforan huatiro. <sup>11</sup>Ascatari nan man ratoran futsa niaifo ipaiyai nantifiton ato oinmati itiroquin <sup>12</sup>Tsoan nantifi finonpaifafaini naanfin Diosin ismashquiquin aacai ahuama. Ascan tsoa futsafoan aton oinmati cuscarashon ato shara huafafainai nanfin Upa Diosin chipo niaifocoin imashquiquin, —ishon Jesús ato yoini.

<sup>13</sup>Ato asca huatan Jesús Moisés cununi cuscan tapimamisifo yafi Fariseofori yoiqui isca huani, —iOhua! Moisés cununi cuscan tapimamisifo futan Fariseofoan ua nicasharacahuun. Manfin fuparamitamisicoinfoquin. Upa Dios icano man yorafo iquimapaifiaquicai man ato iquimatiroma. Ascashu marificai man iquitiroma. Iquipaifiafoan man ato catima huua. Ascacun Diosin mato fasi onaintimaquin finacoinshquin.

<sup>14</sup>Ascashon man futsafo matohuunua shinansharamapaifiai man fasi chacacoinfo. Ainfo tatuomafori parashon man pushu ato fian. Ascatan fasi chaicoinri man cufiriatiro matohuunua shinansharanonfo. Ascafia manfin fasi fuparamitamisicoinfoquin.

<sup>15</sup>Ascashu man foanfafaitsia man shinain cuscan yorafori shinanmashquin. Ascaqui fusti fuchishon man icoinra huua cuscan nanrifi man icoinra huama mato cuscara inon. Ascashon man futsa mato cuscara imano fasi chaca finacai iiquin. Manfin fasi chacacoinfoquin. iOhuashta! Nanrifi matofu omitsiscapanacafo muran cai.

<sup>16</sup>iOhua! Ascacun Diosin mato fasi onaintimai. Manfin nan fusho cuscarafoshon man futsafo tapimapaquicai ahuuscashomain Dios tanatirofoquin. Ascan ato tapimapaifiaquicai marifi man tapiama. Ascashon futsafo man yoiqui isca huamisi, “Tsoan yoiqui isca huai, ‘Dios fu tsainti pushu ahuun anuhuunshon un mia yoia cuscan un mia ashonon,’ huafishon chipo man shinan futsashon man yoi ‘Nanscanonquin,’ ishon. Ascafia nan Dios fu tsainti pushu murannoa orohuunshon un mia ashoiran futsa huashon. Nanscacoïn huashohuun. Ascan nan non yoia cuscan huashoyamaino ahuara chaca finontiroran,” ishon man yoimisi. <sup>17</sup>Asca nan icon. Manfin nan fushon futsa iyopaiyai cuscarafuquin. Maton mapo curushcain. Mancai ahua tapiama. ¿Ascan rato shara finacaiamun Dios fu tsainti pushu murannoa oro iyamarai Dios fu tsainti pushucoïn? Nan Dios fu tsainti pushuanofin Dios itiroquin. Ascan nancaifin shara finacaiquin.

<sup>18</sup>Ascashon marifi man yoiqui isca huamisi, “Tsoan yoiqui isca huai, ‘Nan

cufiti camaqui ahuara  
 coamisifohuunshon un mia yoia cuscan  
 un mia ashonon,' huafiashton chipo man  
 shinan futsashon man yoi  
 nanscanonquin ishon. Ascafia, 'Nan  
 cufiti camaqui un Dios ahuara  
 inanhuunshon un mia yoia cuscan un  
 mia ashoiran,' futsa huashon nanscacoïn  
 huashocahuun. Ascan nan min yoia  
 cuscan huashoyamaino ahuara chaca  
 finontiroran," ishon man yoimisi.

<sup>19</sup>Manfin nan fusho cuscarafuquin.  
 Mancai cayacafi shinantiroma. ¿Ascan  
 ratocaimun shara finacaiquin? Nan  
 cufiti camaqui ahuara man inan  
 iyamarai nan cufiticoïn. Man  
 cufiahuunshon ina man coashonaino  
 Diosin matoqui unimatiro. Ascafia nan  
 cufiticaïfin fasi shara finacaiquin.

<sup>20</sup>Ascashon Dios fu tsainti pushu  
 murannoa cufitihuunshon futsa man  
 yoiquifin nan cufiti camaqui ahuara  
 man inan nancoïn yoi cafisca man  
 huaiquin. <sup>21</sup>Nanscarafi aqui tsoan Dios  
 fu tsainti pushuhuushon futsa ahuara  
 yoiquifin nan Diosicoïn yoi cafisca  
 huaiquin. Nan muranmain Diosicun.  
<sup>22</sup>Nanscarifi aqui tsoan Dios ica  
 muranhuunshon futsa ahuara yoiquifin  
 nan Diospan tsaotihuunshon yafi nan  
 Dioscoïnhuunshon man yoi cafisca  
 huaiquin.

<sup>23</sup>¡Ohua! Moisés yononi cuscan  
 tapimamisifo futan Fariseofoan manfin  
 fuparamitsamisicoïnfoquin. Ascacun  
 Upa Diosin mato fasi onaintimashqui.  
 Moisés yononi cuscan nantifi mato  
 fanafo atirifi man Dios inanmisi. Man  
 asca huafiaquicai ahuara shara finacai  
 man huamisima. Ascashucaï man  
 futsafuhoon ramapayamacain atori  
 man shara huacoïanmisima. Mato  
 yorafoan ahuara chaca finonfiacun man  
 ato shara huatamarocon man ato  
 potamisi. Ascan man futsafuhoon

ramapaicai ato shara huafain ahuara  
 ahuuscarafiaino man ato potayamaino  
 Diosin matoqui unimatiro. Ahuara  
 futsafo Moisés yononi cuscan man  
 huamisi cuscan man shara. Ascafia  
 ahuara shara finacaiarocon huacahuun.  
<sup>24</sup>Ascafia manfin nan fusho  
 cuscarafuquin. Fushocai oïnsharatiroma  
 yora iyoshqui. Nanscarifiï marificai  
 man cayacafi shinantiroma yorafo  
 tapimashquin. Motsa muran napun  
 pacucun man nushfitiro aya  
 shuashquima. Ascafia man nan ina  
 uhuapa camello shuai cafisca huai. Asca  
 huauquifin ahuarafoan yora  
 imasharatiroma man shinanfainiquin.  
 Ascafiashon yorafo ahuara yopacoïainfo  
 cuscaï man ato ashomisima.

<sup>25</sup>¡Ohua! Ascashufin man  
 fuparamitsamisicoïnfoquin. Maton  
 cucho yafi purato fumancayan choca  
 sharafiaquicai ocumuran man  
 chocamisima fasi choshtacoïn.  
 Nanscarifiï man yorafo shinanmapai  
 yorasharatoran mato huanonfo. Ascafia  
 maton nomuranshocai man  
 shinansharamisima. Man shinanchaca  
 fustimisi. Ahuara fipaiqui futsa chaca  
 huashon man fianmisi. Futsafo yopai  
 cuscan atohuunoa shinantamarocon  
 mafi man fipaiyai cuscan fusti man  
 shinanfaini. <sup>26</sup>Fariseofoan mancai  
 cayacafi shinansharamisima. Ascacun  
 iquisi mato nomuran cayacafi  
 shinansharacahuun isharashcaquin. Man  
 ascaiton nantifiton oïntirofo man yora  
 sharacun.

<sup>27</sup>¡Ohuashta! Ascashufin man  
 fuparamitsamisicoïnfoquin. Mahua  
 quini muran yorafo nacun mai  
 huamisifo. Amuran yorafoan shao  
 suyacoïnfo. Nan ahuun fupoti  
 toquirininhuan raishamisifo oshopa  
 sharashta inon. <sup>28</sup>Nanscarifiï futsafoan  
 mato oïnqui shinantirofo man yora

shara ointsa man sharayamafiacun. Manfin fuparamitsamisicoinfoquin. Mato nomuranshon ahuaara chacacoinfo man shinanmisi. <sup>29</sup>¡Ohua! Moisés yononi cuscan tapimamisifo futan Fariseofoan. Manfin fasi fuparamitsamisicoinfoquin. Ascacufin Diosin mato onaintimaquin finacoinquin. Ascashon manfin mato shuni Dios tsain yoimisifo mai huanifo ano man ahuaara toquiri onihuamisi qui ato shinanshquin. Ascashori maiafo manaon man charofo huamisi.

<sup>30</sup>Ascashon man yoimisi isca huaquin, “Nocon shunifoan Diosin tsain yoimisifo rutunifo cuscan nantian norifi niyoshocai non ato rutu cuanimaran,” ishon man yoimisi. <sup>31</sup>Ascan nan man yoia cuscan icon. Maton shunifo rutumistsamisifoan. Marifi man ato cuscaracoin. <sup>32</sup>Nanfoan ato chaca huafafainqui ato rutunifo. Ascan marifi man ato cuscaracoin na Diosin matoqui nichiarifi man rutushquin.

<sup>33</sup>Ascashu manfin rono cuscarafocoin. Rono paupaton facu cuscarofo. Diosin yoini cuscan nan omitsiscapanacafo muran marifi man iquishecani. Tsoancai mato nitun huatiroma. Marifi nanno man catio. <sup>34</sup>Ascacun un afanan Diosin tsain yoimisifo yafi Diosin tsainhuunshon cayacafi shinansharamisifo non ahuan tsain tapimamisifori un matoqui nichishqui. Nanforifi man ato rutushquin. Futsan ihui coyan iquinanqui man mastashquin nanon. Ascashon atirifi maton ichananti pushu muranshon man fichi cunoqui tuchiaton man coshshquin. Ascaquin man ato omitsisca huai nan pushufoti cafoquin man ato omitsisca huafoicaiquin. <sup>35</sup>Ascashofin nantifi Dios icoinra huafo rutunifoqui. Nan Abel shara rutuqui tau huafain ahuan unutaqui nan Zacarías Berequiaspan

facu rutunifo. Nanfin Dios fu tsainti pushu muranshon. Anoshon cufiti chaimashon man rutunifo. Ascan manfin nantifi nan rutunifo cuscan marifi man rutui cafisca huaiquin. Ascacun Diosin atohuunshon mato omitsisca huaqui finacoin. <sup>36</sup>Ascacun un mato icon yoi. Nantifi Diospan yorafo chaca huapaonifo cuscan natian man niyoano atohuunshon mato omitsisca huaqui finacoin.

**Jerusalén anoashu Jesús yorafohuunoashu uaini**

*Lc 13.34-35*

<sup>37</sup>¡Ohua! Jerusalén ano icafoan. Manfin Diosin tsain yoimisifo rutufain nan Diosin matoqui nichian futsafori man toquirin in ato tsacaqui nanonfo. ¡Ohua! Tacaranun ahuan facufo ahuan pui naman onutiro cuscan huaquin un mato yorafoya cushupaifia mancafin ua nicacasmamisiquin. Manricai uqui fumisima un mato cushunon. <sup>38</sup>Ascan natiancai tsoan mato cushuima. Diosiricai afanan mato cushuima. <sup>39</sup>Ascacuai man ua afanan oinnacama nan Diosin matoqui nichian un nai murannoashu oaitian. Man yoiqui isca huaino, “Dios nocoqui nichian fasi shara finacaia. Upa Diosin a shara huapanacaran,” ishon man uhuunoa yoishquin, —ishon Jesús ato yoini ahuanooa.

**Jesús yoini Dios fu tsainti pushu paoinshquiran ishon**

*Mr 13.1-2; Lc 21.5-6*

**24** <sup>1</sup>Ascatan Jesús Dios fu tsainti pushu murannoashu caiton non afu rafafoan yoini, —Ifon, oinpon. Nocon Dios fu tsainti pushu fasi sharashtacoinran, —non huaiton. <sup>2</sup>Noco cumani, —Ai. Nan icon. Natian Dios fu tsainti pushu toquiri putsamuashu

cunuacua sharashtacoin. Ascafiashu nan man oiain chipo paoincanocai afanan rato toquirishta tushushquima, putsamushquima. Nantifi paoinquin cuyocoinshquiran, —ishon Jesús noco yoini.

**Nan cuyoaitian ahuarafu iishquiai cuscan**

*Mr 13.3-23; Lc 21.7-24; 17.22-24*

<sup>3</sup>Ascatan machi Olivo ano mapufaintan Jesús tsaoni tosa futsa anomano non afu rafuafoan yocaqui isca huani, —¿Nan min yoiai cuscan ahuutian ishquimun? ¿Ahuuscashomun non tapitiroquin nantifi cuyoaitian min afanan oshquiai? Noco yoihuu, —non huaiton.

<sup>4</sup>Jesús noco cumani, —Oinfain mato paranonfoma. <sup>5</sup>Yora ichapafoan “Un Cristoran,” ishon mato parapaisheani. Ascashon yora ichapafori parashceni. <sup>6</sup>Ascaino mani futsafo ya futsafo rutunainfoan man nicashquin. Ascara nicacani ratuyamacahuun. Un mato yoimisi cuscan nansacoin aiquin. Ascafia nantifi cuyoaitian icataima. <sup>7</sup>Mai futsa ariafo fu futsafo ya rutunainfoanno mani futsafo ya rutunanshquicani. Ascaino mai futsafoanri yora tushuomafo icaifoanno. Mai futsafo ari fasi mai nayanaiyashquin. <sup>8</sup>Nanscaifin omitsisca taushcaniquin. Ascafia chipo fasi finacai omitsiscashceni.

<sup>9</sup>Ascano mato achicashon omitsisca huaquin mato rutusheani. Uhuunshon manifestotun mato noicasmashceni. <sup>10</sup>Ascaino nantianri atrifi yorafoan ua cachiquiri huashquicani afanancai tsoan ua icoinra huashquicanima. Nanfo afiranan achinantanansheani noincasmatanancani. <sup>11</sup>Ascaino nan fuparamitsamisifoan yoiqui isca huashceni, “Unfin Diospan tsain yoimisiquin,” ishon mato yoishceni.

Afocai Diosin tsain yoimisiyamafishon yora ichapafo ato icoinra huamashceni. <sup>12</sup>Ascaifoanno fasi yora chaca huaquin finacoinsheani. Ascashocai afanan atrifi yorafoan Diosi noishcanima. <sup>13</sup>Ascafia nan omitsisca huafiafoan tsoan ua cachiquiri huatama tunufain uhuun tsain tanasharacun un cushusharatiro Uhuun Upa Diosin icano afu ipasharanon. <sup>14</sup>Ascano nan tsain shara Diosin nantifi yorafo iquinai cuscan manifestotun uhuun tsain yoimisihoan yoiaitian un afanan oshquin.

<sup>15-16</sup>Ascacun Daniel nan Diosin tsain yoimisitun inon pacoai cuscan cunuqui isca huani,

“Dios fu tsainti pushu muran ahuafo fasi chacacoinfo futsafoan huanonpacoinran,”

ishon cununi. Ascacun nan tapicahuun. Daniel cununi cuscacoin aiton oin nan Judea ano icafoan machi ari ichoriscatacahuun. <sup>17</sup>Ascaino tsoa pushu fomancayan niashucai afanan ahuun pushu muran iquitiroa ahuafo fiishquin. Ascataca ichoriscatacahuun. <sup>18</sup>Nanscarifiai tsoacai mau ano yonofiai afanan ahuun pushu ano nasotiroa ahuun sahuuti fiishquin. <sup>19</sup>Ascacun ohua ainfo nan facu nanuafu yafi aton facu yomumishti chocho acaifo omitsiscaashceni. <sup>20</sup>Ascacun Upa Dios cuficahuun nan omitsiscaitian oipacutian yafi tunutitianri ascanonma. Ascaino nantian ascaimaino man ichoima. <sup>21</sup>Nan omitsiscaitiancai tsoan ascara oinyomisima cuscara fasi yorafo omitsisca finacoinsheani. Diosin yora onihuaquin tau huani chaincai tsoa omitsisca ascaimomisima. Ascashucai tsoari afanan omitsisca ascanacama. <sup>22</sup>Ascashu nan omitsiscaifotian nantifi yorafo cuyocuwashquin. Diosin ahuun yorafo nan catoanfo atohuun ramapaiqui omitsiscaifotian ato



shatumariscashquin. <sup>23-25</sup>Ascacun ua nicasharacahuun. Omitsiscaifotiancai icataima iquisi un mato yoiyoi. Nan omitsiscaifotianri nan fuparamitsamisifo fucani. Fucashon yoiqui isca huacani, “Un Cristoran,” ishon yoi yamarai “Un Diospan tsain yoimisiran,” ishon nanfoan yoishcani. Ascashon nanfoanri Satanashuunshon tsoan atiroma cuscara mato ismaquin mato parapashcani. Ascan Diosin nan catoanfo ato cushuyamaino nanfoanri nan fuparamitsamisifo icoinra huaacuana. Ascaino nantian mato yoishcani, “iOincapon! Nanfin nocon Cristoqui,” ishon yoi iyamarai, “Nanno chaimashta Cristo nocoqui oaran,” ishon yoiiafoan ato icoinra huayamacahuun.

<sup>26</sup>Ascashon nanfoanri yoicani, “Cristo tsoan istaipama ano nocoaran,” ishon mato yoiiafoanno ari foyamacahuun. Nanscarifi aquin mato yoishcani, “Criston nan pushu cunu muran iquiaran,” ishon mato yoiiafoan ato icoinra huayamacahuun. <sup>27</sup>Uficoin un oaiton man ua shafacafi oinshquin. Canan facaicaiton shafacafi nantio non oinriscatatiro. Nanscarifiain unfin Diospan Facuquin un afanan oaiton nantifi yorafoan ua shafacafi oinshcani. <sup>28</sup>Ahuara naa nanno cotocotofo nocoriscatatiro. Nanscarifiain un nocoaitian ua tanamisifo uqui furiscashcani.

**Diospan facu nasoaitian**  
*Mr 13.24-37; Lc 21.25-28*

<sup>29</sup>Ascashu nan omitsiscaifo cuscan anaitiano fari afanan chashayamafain oshuricai afanan chashashquima faquishicoin iishquin. Ascaino fishifori nai ariashu pacui futsushquin. Nantifi nai murannoafori nayanaiyashquin. <sup>30</sup>Ascashon ahuafo nai arishon un ismai cuscacoin aiton tapitirofo un

afanan mai ano nasoai cuscan nantifi yorafoan tapinonfo. Un Diospan facushon un nantifi iquinai cuscan. Un nai murannoashu coin camaqui fotoaiton oincani manifoti nan icoinra huamafo fasi ratucani uaishcani. Uhuun curushhuunoashu un fotoaiton oincani. <sup>31</sup>Ascaino nantianri uhuun oinmatifo ufu nai muran icafo un nichishquin aton manuti fasi curushcai chaan chaan acaino uhuun yorafo manifoti anofo yafi nai murannoafori uqui fushcani.

<sup>32</sup>Ascacun un mato fana huiguerahuunoa ahuafo futsa yoinon. Ua nicasharacahuun. Huiguera pui risquisi futsuaiton man tapitiro faritian itiro cuscan. <sup>33</sup>Nanscarifiain un mato yoiia cuscacoin aiton tapicahuun mun oti chaima nanscacoin aiquin. <sup>34</sup>Ascacun un mato icon yoi. Ahuafo un mato yoiia cuscacoin aiton nataishoma oinyocani. <sup>35</sup>Ascaino nai yafi mai cuyoshquin. Uhuun tsain cayacafi iconcoin fiananancai apanacama. Un mato yoiia cuscacoin aashquin.

<sup>36</sup>Ascafia ahuitiaran un nai ariashu afanan fotoainocai tsoan tapiama. Diosin oinmati afu icafoanricai tapiafoma. Urifi uhuun Upa Diosin facufiashocai un tapiama. Nan uhuun Upa Diosin fustitofin tapiaquin. <sup>37</sup>Noco shuni Noé niyoano inifo cuscacoinrifiai afanan un oaitian nanscarifi ashcani. <sup>38</sup>Ascaino nantian tsoan Dios shinantama pii sharafain ayafain fianansharacainoaino. Fai tahuan noconi. Nanscasi ariaifoanno Noé ahuun shashohuan muran iquini. <sup>39</sup>Ascashu iquifiaitocai tsoan tapinima fai tahuan nocoai. Ascashu nantifi yorafo asai futsunifo. Nanscacoindrifi aashcani un afanan oaitian. Ua shinantama afi apaiyaifo cuscasi huariaifoanno. <sup>40</sup>Ascaino nantianri nocofunu rafu mau

ano yonocani futsa uari cai yamariscatanaino. Futsa nitushquin omitsiscapanacafo muran caashquin.

<sup>41</sup>Nanscarifiayainfon rafu nanincani. Futsa uari cai yamariscatanaino futsa nitushquin omitsiscapashquin.

<sup>42</sup>Ascacun itisharacahuun. Un maton ifofiacucaí marifi man tapiama ahuutiamain un afanan matoqui oshquicain. Un mato yomisi cuscan nansacoin acahuun. <sup>43</sup>Ua nicasharacahuun tapishcaquin. Pushu ifoan iquisi itisharashon yomutso yamu ahuuscaraino ahuun pushu muran iquiai tapishocai iquimatiroma. <sup>44</sup>Nanscarifiái marifi itisharacahuun. “Iscaino nocon Ifo oimaran,” ishon shinanyamacahuun. Ahuuscara atanaino un matoqui nocoriscainquin.

**Oinmati rafu futsa ifoan yonoai cuscacoin aino futsa nan yonoai cuscacoin aima**  
*Lc 12.41-48*

<sup>45</sup>Man tapinon un mato yoi ahuu cuscaramain oinmati shara itiroquin. Niaifocoin mai futsa ari caquin niaifo patashari yoitiro isca huaquin, “Uhuun oinmati futsafo ato tushu shafatifi inanhuun. Nanticoin rafu ato pashcananshara huahuun. Ascashon ua ato cushusharashohuun,” huafaini catiro. <sup>46</sup>Ascatan niaifocoin afanan nocoshon oian ahuun niaifo patashari nan yoia cuscacoin aano fasi aqi unimacointiro. Ascashon naan shara huatiro. <sup>47</sup>Ascacun un mato icon yoi. Nan niaifoan ahuun oinmati yoi, “¡Aicho! Natian nantifi uhuunafo mian cushusharashotiroran,” ishon yoitiro. <sup>48</sup>Ascafia niaifo patashari chacapan ahuun nomuran shinanquin isca huatiro, “Uhuun ifo funa nasoimaran,” ishon shinanquin. <sup>49</sup>Oinmati futsafo nantifi sutuqui futsatiro. Ascashon shafatifi nan paunmisifo ya pauncain monocai.

<sup>50</sup>Ascashon shinantiro isca huaquin, “Natiancai uhuun niaifo oimaran,” ifiaino samamashta nocoriscatiro.

<sup>51</sup>Ascashon niaifoan nan niaifo patashari fasi onaintimai. Asca huatan ahuun oinmati futsafo yonoqui isca huai, “Nan omitsiscapanacafo muran fuparamitsamisifo ano nan chaca potacahuun,” ishon ato yoishquin. Ascannannoashu uaiqui omitsiscapanaca.

**Diez shomayafohuunoa Jesús ato yoini ahura futsa ato tapimashquin**

**25** <sup>1</sup>Ascatan diez shomayafohuunoa un mato yoi un oaitian ahuu cuscaramainquin un mato tapimashquin. Ascatan nan diez nan nocofunun rama ainfo fiaí manafo atofu fuusishcaquin. Ascafia nan nocofunun ahuun ahuin fiicashu nasoataimacai tsoa afi ranan fuusi tauafoma. Nan diez shomayafoin iquisi lamparina foafo. Nocofunu manai focani. <sup>2</sup>Nan mucu fustiti shomayafain tsoancai cayacafi shinansharayamafain itisharafoma. Asca nan mucu fustiti futsafoan shinansharafain iquisi itisharafafo. <sup>3</sup>Nan shinansharaimafoancai aton lamparina fofiaquin tsoan kerosene foama. <sup>4</sup>Ascafia nan shinansharafain itisharafafoan aton lamparina fofain iquisi keroseneri foafo. <sup>5</sup>Ascafia nan nocofunun ahuun ahuin fiaicai funa nocoyamaino nan shomayafoin manariacani fasi oshapaicoancani oshafo. <sup>6</sup>Ascashu oshafoanno futsan yamu nacucahuanaino oi ashcafinin ato cuna, “Nan ainfo fiicaitan man oiquin. Moinifoancahuun. Non ihui sharanon,” ato huaa. <sup>7</sup>Ascaino shomayafoin moinifoan aton lamparinafo otaqui futsafo. <sup>8</sup>Ascashon nan mucu fustiti shinansharaimafoan nan itisharafafo yocani “Maton kerosene ichapamashta

noco inancahuun. Man nocon lamparina nocaiquin,” ishon ato yocaifoan. <sup>9</sup>Nan itisharafoan ato cumani, “Ma. Noconariraca itiroma. Ascan kerosene inanmitsafo ari fotacahuun fiishcaquin,” ato huanifo. <sup>10</sup>Ascaino kerosene fii focani foaifoanno nan ahuun ahuin fiái nocotan iquicainaino nan shomaya itisharafo afu pushu muran iquiafo fuusishcaquin. Ascashon caincaiti fupofo.

<sup>11</sup>Ascaino chipo shomaya futsafo nococashon yoiäfo, “Ifon. Noco fupushohuun non iquinon,” huaifoan. <sup>12</sup>“Un mato fupushotiroma. Icon un mato yoi. Uncai mato oinmisima,” ishon ato yoini. <sup>13</sup>Nanscarifiai ahuutiaran un afanan matoqui oshquicain tsoan tapiama. Ascacun itisharacahuun.

**Puihuunoo yoiqui Jesús ahuara  
futsa ato tapimani**

*Lc 19.11-27*

<sup>14</sup>Afanan un mato ahuara futsahuunoo yoi. Nocofunu ahuun pushu anoashu chai caquin ahuun oinmatifo cunashon yoiquin isca huani, “Uhuun pui ua cushusharashocahuun,” ato huafaini cani. <sup>15</sup>Ascashon ahuun oinmati rafu non fusti ato pui inanni. Futsa cinco mil pui inanfain futsa dos mil pui inanfain futsari mil inanni. Nan tapiafo cuscan ato inanpacua. Ascan ato inantan mai futsari cani. <sup>16</sup>Niaifoan caquin nan cinco mil inan cuscahuunshon samamashta ahuarafo fiashu afanan inanmitsashon ahuun rafanan cinco mil fia. Asca huaquin diez mil man fia. <sup>17</sup>Nanscarifi aqui nan pui dos mil fiaton afanan dos mil fia. <sup>18</sup>Ascan nan oinmati mil pui fusti fiaton funocasmaquin mai poquishon amuran ahuun niaifo pui huashoan.

<sup>19</sup>Ascashu fari ranan finontan afanan niaifo ahuun pushu ano nasoni.

Nasoshon nan rafu non fusti ahuun oinmati ato cuna ahuutimain fishoäfoquin ato yocashquin. <sup>20</sup>Ascaino nan cinco mil pui inanniton yoiqui isca huani, “Niaifon, mian cinco mil pui inanni. Ascafia mun mia natian afanan cinco mil fishoan. Ascan oinpon. Naquian,” ishon inanni. <sup>21</sup>Ascaiton ahuun niaifoan yoini, “iAicho! Mian fasi shara huua. Un mia yoiä cuscaquin min huua. Un mia ichapama inanfia ahuunshon min yonocoin shara. Ascacun nan un aya cuscan mian cushusharashotiro. Un unimai cuscan mirifi nanscarifiai min ufu unimatiro. Ascacun iquiyohuu,” ishon yoini.

<sup>22</sup>Ascaino nan dos mil pui inanniton arifi yoiqui isca huani, “Niaifon, Mian dos mil pui inanni. Ascafia mun mia natian afanan dos mil fishoan. Ascan oinpon. Naquian,” ishon inanni. <sup>23</sup>Ascaiton nanrifi ahuun niaifoan yoini, “iAicho! Mian fasi shara huua. Un mia yoiä cuscaquin min huua. Un mia ichapama inanfia ahuunshon min yonocoin shara. Ascacun nan un aya cuscan mian cushusharashotiro. Un unimai cuscan mirifi nanscarifiai min ufu unimatiro. Ascacun iquiyohuu,” ishon yoini.

<sup>24</sup>Ascan nan mil pui inanniton arifi yoiqui isca huani, “Niaifo, mun tapiän mincai tsoa shinainma. Minricai nocohuun ramapaima. Non mia yonoshofiaitocai min noco ahua inantiroma. Mina fusti itiroran. <sup>25</sup>Ascacun un ratuqui min ua inan cuscahuunshon ahuarafo fipaifiai un funotiroracati, ishon un shinan. Ascacun nan mian inan cuscan un mai muran onua. Ascan natian mun mia fishoan. Oinpon. Naquian,” huaiton.

<sup>26</sup>Ahuun niaifoan cumani, “Min fasi chacacoin. Minfin oinmati shanishuniquin. ¿Min shinanmun un

futsafo shinainmaquin? ¿Uaraca futsafoan yonoshonaiton un ato ahua inanma? <sup>27</sup>¿Ascan nannori shinanfiaquin ahuuscaquin mai muran min pui huamun? Asca huatamarocon nan pui huamisifoanno min huacun un nocoshon paratamari un fiicuanaran,” ishon niaifoan yoini.

<sup>28</sup>Ascashon ahuun niaifo patashari yononi, “Nan oinmati shanishuni ahuun pui fianhuun futsa nan cinco mil aya inanshquin. <sup>29</sup>Ascano nan ua icoinra huacoinnafin un fasi paratamacoin inainquin. Ascan nan ua icoinra huama ichapama aya cuscan futsan fiain.

<sup>30</sup>Ascacun nan oinmati ahua tapiama chaca faquish muran potacahuun. Nannoashu fasi omitsiscail fasi uainon,” ishon niaifoan yoini.

**Cuyoaitian Jesús yoishquin ratofomain afu ipatiro iyamarai omitsiscapanacafo muran focaniquin**

<sup>31</sup>Ascacun un mato afanan yoi. Unfi Dios ariashu mai ano fotoniquin. Ascashu un afanan oaitian nantififain aton niaifocoin un iishqui. Un Diospan Facucoincun nantififain ua oinshceni. Uhuun oinmatifo ufu nai muran icafoya un oaiton. Nantianri un ato yoishquin ratofomain Diospan yorafo iyamarai ahuun yorafomaquin. <sup>32</sup>Ascashu nantifi manifotifi uqui fushceni. Chashoan cushumisiton ahuun chashoanfo yafi nan chashoan ointsafon aton anu cabra aton ichanan huai. Nan chashoanfosi tiri futsa huafain nan cabrafori tiri futsa huai. <sup>33</sup>Ascashon ahuun mumihuuri chashoanfo huafain ahuun mushquihuuri cabrafori huai. Nanscarifiai ua tanamisifo un tiri futsa huafain nan ua icoinra huamafo un tiri futsa huai. Ua tanamisifo uhuun mumihuuri huafain uhuun mushquihuuri nan ua icoinra huamafo ato huashquin.

<sup>34</sup>Ascatan un Niaifoshon nan ua tanamisifo un yoiqui isca huashquin, “Uqui fucahuun. Uhuun Upa Diosin mato unimamanon. Nan mai onihuaitian matohuunoa shinanquin isca huani, ‘Un icano un ato iquimanonpacoi uhuun yorafo inonfo. Uhuunafori atona inonpacoiran,’ ishon Upa Diosin shinanyoni.

<sup>35</sup>“Man ua shara huamisi. Ascacun uhuun Upa Diosiri mato shara huashquin. Un fonaicaiton man ua pimamisi. Un nomiaiton man ua ayamamisi. Un matoqui nocoaiton ua oinyamafiamisishaquin man ua yoiqui isca huamisi, ‘Uhuun pushu muran iquiyohuu. Un mia pimafain min nuno uhuun pushu muran oshatiro.’ <sup>36</sup>Un sahuutiromacuri man ua sahuuti sahumani. Un isinincaitori man ua cushusharamisi. Ua cunu muran iquimanafoanno man ua oin camisiran,” ishon ua tanamisifo un yoishqui.

<sup>37</sup>Ascacun ua tanamisisharafa uhuun Upa Diosin aton chaca soashona. Nanfoan ua cumacaquin isca huashceni, “¿Ifon, ahuutian non mia oinmisimun min fonaincaiton non mia pimafain min nomiaitori non mia ayamamisi?

<sup>38</sup>¿Ahuutianritsi min nocoqui nocoaiton non mia oinyamafiamisishaquin non mia nocon pushu muran iquimafain min sahuutiromacuri non mia sahuuti sahumamisi? <sup>39</sup>¿Ascan ahuutianritsi mia cunu muran iquimanafoan non mia oincani?” ishon ua yoishceni.

<sup>40</sup>Ascaifoan un aton niaifoan un ato yoiqui isca huashquin, “Uhuun yorafo nan ua icoinra huafon futsafoan atohuunoa yoiqui isca huamisi ‘Nancai ahuamaran,’ ishon man yoimisi. Asca nan uhuun yora ahuamafiashu man ato shara huamisi cuscafin nan uari shara huai cafisca man ato huamisiquin,” ishon un ato yoishquin.

<sup>41-43</sup>Ascashon nan ua icoinra huamafo tiri futsa niafoan un ato yoiqui isca huashquin, “Manfin ua chaca huamisiquin. Un fonainfiatocai man ua pimamisima. Un nomiaitoricai man ua ahuara ayamamisima. Un matoqui nocofiaitocai ua oinyamafiamisishaquin man ua pimayamafain un sahuutiromafiacuri man ua sahuumamisima. Un isinincaitoricai man ua cushumisima. Un cunu muran iquimanafoanno cai man ua oincamisima. Ascacun umaquinoashu fotacahuun. Nan yoshin chaca Satanás yafi afu yoshin chaca futsafo Upa Diosin ato chi urumanhuan itishara huashoan nannori mato potai. Nannoashu nanfoya man omitsiscapashquin,” ishon un ato yoiaiton.

<sup>44</sup>Nan ua icoinra huamafoan ua cumaquin isca huashcani, “¿Ifon, ahutiamun non mia oinmisiquin min fonaincaiton non mia pimayamafain min nomiaiton non mia ayamamisima? ¿Ahuutiamun min nocoqui nocofiaiton oinyamafiamisishaquin non mia cushusharayamafain min sahuutiromacun non mia sahuumamisima? ¿Ahuutianritsi min isinincaiton mia cushuyamafain mia cunu muran iquimafiafo non mia oin camisimamun?” ishon ua yocashcani.

<sup>45</sup>Ascaiton un ato cumaquin isca huashquin, “Un mato icon yoinon. Nan ua icoinra hua futsafo man yoimisi isca huaquin, ‘Nancai ahuamaran,’ ishon atohuunoa man yoimisi. Ato asca huaquifin nan ua shara huaima cafisca man huamisiquin,” ishon un ato yoishquin.

<sup>46</sup>Un ato nannori yoiaiono umaquinoashu omitsiscapanacafo muran foshcani. Ascaino nan ua icoinra huafo uhuun Upa Diosin aton chaca soashonafo un icano ufu foshcani ufu ipashcaquin, —ishon Jesús ato yoini.

### Jesús rutushcaquin afi ranan yoinannifo

*Mr 14.1-2; Lc 22.1-2; Jn 11.45-53*

**26** <sup>1</sup>Ascano noco yoiqui anaititan Jesús afanan afu rafuafosi tsain futsa noco yoiqui isca huani, <sup>2</sup>—Man man tapian nocon fusiti shafa man nococuana. [Diosin ahuun oinmati nan afu ica yonoa Egipciofoan aton furun iyoafofosi rutuqui futsani. Ascafiaquicai nocon shunifoan aton furun iyoafofofinonmani ato rutuquima.] Nan non shinanmisi nocon fusiti osha rafutan iqui. Ascan nantianri ua ato achimacani ua mastanonfo, —ishon Jesús noco yoini.

<sup>3</sup>Ascan nantianri nocon yorafohuunshon Dios cufimisi niaifofofutan Moisés cununi cuscan tapimamisifo non Dios fu tsainti pushu cushumisifo Caifás pushu ano ichanancani. Nan Caifás nocon yorafohuunshon Dios cufimisi niaifocoin ini. <sup>4</sup>Ascashu ichanancashon shinannifo, —¿Ahuuscashomain non Jesús achinoanti rutushquin? —ishon ahuara chanishtahuunshon rutupaicaquin. <sup>5</sup>Ascacun yoinifo, —Fusitiancai non achitiroma yorafo fasi mucacani nocoqui sinatiroforan, —icashu yoinannifo.

### Ainfoan Jesusqui ininti ocani

*Mr 14.3-9; Jn 12.1-8*

<sup>6</sup>Ascatan non Jesús fu Betania ano cani. Caashu Simón pushu muran non iquini. Nan Simón nami tocoi futsua ini. <sup>7</sup>Jesús nannoshon noco futan piaino ainfo ininti tsomashu oni aqui ocashquin. Nan moticianon ahuun anu alabastro. Amuran ahuun ininti fasi paratamacoin ahuun pui nuua. Ascashon ainfoan Jesús ahuun mapoqui ininti ocani.

<sup>8</sup>Ocaiton oin non afu rafuafao ainfoqui non sinacoinqui yoini, —¿Ahuuscaimun nan ininti fasi paratamacoin ahuun pui nuua na ainfoan ocaiqui? <sup>9</sup>Nan ininti

ocatama inanmitsashon ahuun rafanan pui fishon nan yora ahuuomafo inanshara icuanaran, —icashu non yoinanni.

<sup>10</sup>Ascaiton non yoiai cuscan Jesús onanshon noco yoini, —¿Ahuuscaimun na ainfoqui man tsain chipuicain? Uafin nanton fasi shara huaquin. <sup>11</sup>Manfin yora ahuuomafo fu ipanacaquin. Ratoran shafatan man ato ahuara shara huashotiro. Ascafia uncai nuno mai ano matofu ipanacama. <sup>12</sup>Ascan nan ainfoanfin uqui ininti ocaquin. Nan yora maiamamaquin ininti ocamisifo cuscan un nataiyamafiaiton na ainfoan ua shinanquin uqui ininti oca. Uhuun caya iquisi itishara huapai ua mai huashquiaifo cuscan. <sup>13</sup>Ascacun un mato icon yoi. Nan tsain shara uhuunoa manifotiton yoishcani. Nan ainfoan ua rama aca cuscari yoishcani. Ascashon ua shara huacuscun ahuunoa shinanpacushcaniran, —ishon Jesús noco yoini.

#### **Judaspan Jesús ato achimani**

*Mr 14.10-11; Lc 22.3-6*

<sup>14</sup>Noco nannori Jesús yoaino non afu rafuafo doce futsan ahuun anu Judas Iscariote nocon yorafohuunshon Dios cufimisi niaifofo ano cani. <sup>15</sup>Ascacaini cashon ato yoiqui isca huani, —¿Un mato Jesús achimacun ahuuti pui man ua inantromun? —ishon ato yocaiton. Cumanifo, —Non mia treinta toro oshopafo inantiroran, —ishon yoinifo. Asca huatan inannifo. <sup>16</sup>Ascano nantian Judaspan ahuun nomuran shinanqui tau huani, —¿Ahuuscashomain un ato Jesús achimanoanti? —ishon shinanriani.

#### **Ahuun unutaquí Jesús afu rafumisifo futan pini**

*Mr 14.12-25; Lc 22.7-23; Jn 13.21-30; 1Co 11.23-26*

<sup>17</sup>Ascano noco fusiti shafan man nocoano nan shafa misi farashati maisi

non pimisi. Nantian non afu rafuafo Jesusqui cashon non yocani, —Ifo, na shafan nocon fuusititian. Nan nocon shunifoan ato facu iyoafofo Diospan nai oinmati finonmani ato rutuquima nan non shinanmisi. ¿Ascan rani min noco nichipaimun non mia itishara huashonon no futan anoshon piishquin? —ishon non yocani.

<sup>18</sup>Jesús noco cumani, —Jerusalén ano fotocahuun. Nanno nocofunu futsaqui nocoshon yoiqui isca huacahuun. “Nocon tapimamisiton mia tsain fomaqui isca huacaa, ‘Un naitian man nocoti chaimashtaqui. Nocon fusititian non min pushu muranshon piiran,’ ishon noco Jesús yoiaran,” —ishon yoitacahuun noco huani. <sup>19</sup>Ascashu nan noco yoia cuscacoin huaquin cunu muran non itishara huani. Nannoshori chashoanun facu non pichani piishquin.

<sup>20</sup>Man fari caino non afu rafuafoya Jesús sapa ano tsaoni. <sup>21</sup>Nannoshon non piaiton Jesús noco yoini, —Un mato icon yoi. Nan ratoran futsan man ua ato achimairan, —noco huaiton. <sup>22</sup>Nicai non pusinima. Ascashon non yocani, —¿Umun, Ifon? —ishon nantifiton non yocapacuni.

<sup>23</sup>Ascaiton noco yoini, —Nan man ufutan taso murannoa misi pocotan piaitofin man ua ato achimaiquin.

<sup>24</sup>Ascan Upa Diosin tsain inon pacoai uhuunoa cununi cuscacoinfin un naicain. Ascafia nan nocofunun ua ato achimanai cainyamanifin shara icuanaquin, —ishon Jesús noco yoiaiton.

<sup>25</sup>Nicaquin Judas, nan ato achimaiton Jesús yocani, —¿Umun, Ifon? —huaiton. —Aifain. Minfiqui, —huani.

<sup>26</sup>Ascashon piaifoanno Jesús misi finifoantan iquisi apa Diosin cufiyoni —iAicho! Upa, min noco cushusharafafainiran, —huatan noco

yoini, —Na uhuun caya cuscara. Picahuun, —ishon torupacushon nocoti inanni.

<sup>27</sup>Ascashon cucho finifoan afanan Apa cufini, —iAicho! Upa, min noco cushushararan, —huatan cuchoqui fimi unu manuta noco inanqui yoini. —Nantififain na ayacucahuun, —noco huani. <sup>28</sup>Asca huatan noco yoini, —Naafin uhuun imi cuscaraquin. Uhuun imi focain un nai. Nantifi yorafoan chaca huamisihuunoashu un nai aton chaca soashonon. Un ascano yora ichapafo Diosin potapacunonma. <sup>29</sup>Ascacun un mato icon yoi. Uncai funa afanan mato futan ayaima. Nan uhuun Upa Diosin niaifoan nantifi iquinaitian un afanan maton futan ayashquin, —noco huani.

<sup>30</sup>Ascano man ahuun tsain yoiqui anaititan Diosin tsain non fanainni. Ascatan machi ahuun anu Olivo ano non cani.

—Pedro min futsafo,

“Un Jesús oinmisimaran,” ishon min yoiran, —Jesús huani

*Mr 14.26-31; Lc 22.31-34; Jn 13.36-38*

<sup>31</sup>Ascashon afanan noco yoini, —Na yamutafin nantififain man ua potafaini ichoi caiquin. Diosin tsain cununi isca huaquin,

“Unfi chashoanfo cushumisi rutucain. Ascaino chashoanfo ichoi futsucaniran,”

icashu cununi. Nanscarifiai ua rutuaifoanno na yamutan man huunoashu ratufaini ichoicai. <sup>32</sup>Ascafia un funiashu Galilea ano un cai tauicai. Ascano man uqui chipo nocoicashquiran, —ishon Jesús noco yoiaiton.

<sup>33</sup>Pedronun Jesús cumani, —Nantifiton mia potafaiifoannocai un mia potaimaran, —huaiton. <sup>34</sup>Jesús

Pedro yoini, —Un mia icon yoi Pedro. Tacara cuoatama min ato yoiqui “Uncai Jesús oinmisimaran,” ishon min ato yoiqui rafunon fusti huairan, —huaiton. <sup>35</sup>—Ma, Ifo. Un mifu nafiaquicai un ato yoinacama un mia oinmisimaran, —ishon Pedronun yoini. Ascaiton norifi nantifiton non nannori yoini.

**Jesús Getsemaní anoshon apa cufini**

*Mr 14.32-42; Lc 22.39-46*

<sup>36</sup>Ascatan ihuifo mapoano ahuun anu Getsemaní nanno Jesús no fu cashon noco yoini, —Nuno tsaocahuun. Uhuun Upa un cufiyotanon, —noco yoini.

<sup>37</sup>Ascatan Pedro yafi Zebedeo ahuun facu rafu Santiago yafi Juan nan rafu non fusti ato iyoni. Nan fasi omitsiscai tauai cuscan shinain fasi ahuun nomuran isicoinni. <sup>38</sup>Ascashon ato yoini, —Un fasi omitsiscai cuscan uhuun nomuranshon shinain mun naacuana. Ascacun nunoshon oinyocahuun. Oshacaquima, —ishon ato yoini.

<sup>39</sup>Ato asca huatan chaimashta caashu fuopacucahuan Apa Dios cufini, —Upa un omitsiscai cuscan mian numatiromainquin ua numahuu. Ascafiashon un apaiyai cuscan huaquima nan min apaiyai cuscan fusti ua huahuu, —huani.

<sup>40</sup>Ascashon apa cufinquin anaititan afanan atoqui oquin oian man oshafo ini. Ascaiton Jesús Pedro yoini, —¿Man u futan Diosin cufiyotiomamun? <sup>41</sup>Oshacaquima. Dios cuficahuun Satanás mato chaca huamapaiyai cuscan huashcaquima. Ascashon Diosin mato amapaiyai cuscan marifi huapaifiaquicai Diospan curushyamainocai man atiomaran, —ishon Jesús ato yoini.

<sup>42</sup>Ato asca huatan afanan apa Dios cuficaicani. Cashon apa yoini, —Upa, min ahuara futsa yorafo numashqui

atiromamainquin nan min apaiyai cuscan huahuu. Unfi man itisharaqui atohuunoashu omitsiscacaini naashqui, —ishon Jesús apa cufini.

<sup>43</sup>Ascashu afanan atoqui oquin oian afu rafuafo afi oshafo ini. Fasi osha murancoianfo. <sup>44</sup>Ascaino afanan ato anoashu cashon apa Dios cufini. Nan cufia cuscacoin afanan nannori cufini.

<sup>45</sup>Ascatan afanan oquin oian afi oshafo ini. Ascaiton ato yoini, —¿Manmun afi moiama? Natianfin nan chaca huamisifoan ua ato achimai fucaniquin. <sup>46</sup>Funicahuun. Non canon. Nan nocofunun ua ato achimai man oiquin, —ato huani.

#### Jesús achinifo

*Mr 14.43-50; Lc 22.47-53; Jn 18.2-11*

<sup>47</sup>Ascaino nan Judas Jesús fu rafumisi futsan oaino a yorahuanrasi nopo yafi coshatifo tsmacanasu funifo. Nocon yorafohuunshon Dios cufimisi niaiffoan futan Dios fu tsainti pushu niaifo patasharifoan ato yonoa funifo. <sup>48</sup>Nan Judaspan yorafo iquisi yoiqui isca huani, —Un Jesús tamoqui tsoacaiton tapicahuun nanfin Jesusquin achicahuun, —ato huani. <sup>49</sup>Ato yoiqui asca huatan samamashta Judas Jesusqui nocoshon ahuun tamo tsoacatan yoini, —Tapimamisiton, man yamuaran —ishon yoiaiton.

<sup>50</sup>Jesús cumani, —Uhuun yoran, nan mian apaiyai cuscan ua huahuu. Nanscayoi min oaqin, —huani. Ascaiton nan Judas fu fuafocan Jesús achinifo niaiffo ano iyoshcaquin.

<sup>51</sup>Ascaiton Jesús fu rafua futsan nopo fitan nocon yorafohuunshon Dios cufimisi niaifocoinin ahuun oinmati pashtufain rurani.

<sup>52</sup>Ascaiton Jesús yoini, —Unuhuu. Min nopo ahuun ona muran huahuun. Nan nopun yora rutuaafin arifi nopun

natiroquin. <sup>53</sup>Uhuun Upa Dios un yocaitofin ahuun oinmatifo afu icafo 72,000 ua nichishotiroquin ua cushui funonfo. <sup>54</sup>Ascaino uafin uhuun Upa Diosin ahuun nai oinmatifo ua nichishotiroquin ua cushui funonfo. ¿Ascafia ahuuscashumun Diosin tsain uhuunoa cununi cuscan un yorafohuunoashu natiromaquin? Ascaino uncai Upa Dios cufima ua ahuun oinmatifo afu icafo ua cushunon, —ishon Jesús ato yoini.

<sup>55</sup>Ascaino nantianri Jesús achipaiyaifoan ato yoini, —¿Unmun yora pofu cuscaracun man ua nopo yafi coshatifo yashon achi fua? Shafatifi un Dios fu tsainti pushu muranshon un mato yoifiaitocai man ua achipaiti huama. <sup>56</sup>Ascafia nan man ua acai cuscan Diosin tsain yoimisiifoan uhuunoa cununifo cuscan nanscacoim man ua huairan, —ishon Jesús ato yoini. Ascaino non afu rafuafo nantifi non amaqui ichoni.

#### Jesús niaiffoan ointaifi iyonifo

*Mr 14.53-65; Lc 22.54-55, 63-71; Jn 18.12-14, 19-24*

<sup>57</sup>Ascaino achicashon nocon yorafohuunshon Dios cufimisi niaifocoinin ahuun pushu ano iyonifo. Nan niaiffoan ahuun anu Caifás. Nannori niaiffo ichanannifo. <sup>58</sup>Ascaino Pedro acachori cani. Acachori cafiái fishtatama cani. Dios fu tsainti pushu cushumisifoya Pedro niaiffoan umainti ano tsaoni Jesusmain ahuusca huacaniquin ishon oinpai.

<sup>59</sup>Nannoshon niaiffoan shinanpainifo, —¿Nonmun raquiri huatiroquin Jesús ahuara chaca huaran ishon rutushquin? Ahuacai ahuusca huaiton non nicayomisima non rutuai, —icananshu nocon niaiffo afi ranan yoinannifo. <sup>60-61</sup>Yora ichapafoan,



—Jesús ahuara chaca huaran, —ishon ahuunoa tsain chaca yoinifo. Paracaquin. Ascafia niaifofoancai Jesushuunoa ahuara chaca iconcooin nicanifoma rutushcaquin. Ascashon futsafoan Jesushuunoa tsain chaca huaquin anaitiafoanno chipo nocofunu rafutan niaifofoan ointaifi Jesusqui tsain chaca huanifo. —Man non nicaitan na nocofunun isca huaquin yoia, “Nocon Dios fu tsainti pushu yorafoan aca cuscan unfi choquiatiroquin. Ascashon osha rafu non fusti finontan un afanan futsa huatiro. Uncai tsofutan atiroma. Urus fustifin un atiroquin,” Jesús iquitaran, —ishon nan rafutan yoinifo. <sup>62</sup>Ascano yorafohuunshon Dios cufimisifo aton niaifocoin nan Caifás Jesús yocani, —¿Miqui tsain chaca huafo cuscan icon iyamarai iconmamun? —ishon yocaino. <sup>63</sup>Jesús puusinima. Ascaiton afanan yoini, —Diosin nan nipamisi ahuun anuhuunshon ua yoihuu. ¿Minmain Diospan Furunquin nan Diosin mia catonnimainquin? Ascan natian nannori un mia yonoi. Ua icon yoihuu, —ishon yocaiton.

<sup>64</sup>Jesús cumani, —Nan mian yoiai cuscafin unquin. Un mato yoinon. Upa Diosin ahuamamishti huatiro cuscan chipo man ua oinshquin. Uhuun Upa Diosin niaifo fu un icun. Urifimain un afu niaifocoianshu. Ascacun un nai ariashu coinfo camaqui oaiton man ua oinshquiran, —ishon Jesús ato yoini.

<sup>65</sup>Ascaiton nicai nocon yorafohuunshon Dios cufimisi niaifocoin, —Un Diospan Fururan, —Jesús icaiton nicai fasi sinacoinni. Ascacun ahuun sahuuti fashnuqui yoini, —Noncai afanan yorafoan Jesusqui tsain chaca huai yopaima. Manmain nofocoin ahuun tsain chaca nicayamaifin, “Un Diospan fururan,”

iquifin Dios chaca huaquin. <sup>66</sup>¿Ascacun man ahuusca Jesús huapaimun? —ishon aton niaifocoinin ato yocaiton. Nantiffain, —A rutucahuun, —huanifo.

<sup>67</sup>Asca huatan ahuun fusoqui cumo michofain sutufain futsan tapasni. Ascashon cashu mutsama huacaquin. <sup>68</sup>Yoinifo, —Min Cristomainquin min nantifi tapicoian. Asca tsoan mia acamainquin noco yoihuu, —ishon cashu mutsama huanifo.

—Un Jesús oinmisimaran,  
—ishon Pedronun yoini

*Mr 14.66-72; Lc 22.56-62; Jn 18.15-18, 25-27*

<sup>69</sup>Ascaino Pedro pushu umainti caashu tsaoni. Ascano nocohuunshon Dios cufimisi niaifoan ahuun oinmati shomayatón Pedro fuchishon yoini, —Jesús Nazaret anoa fu mirifi min afu oaquin, —huaiton. <sup>70</sup>—Ma. Mian yoiai cuscaai un tapiamafinquin, —Pedronun aton ointaifi huani.

<sup>71</sup>Asca huafaini caincaiti ano caacun nannoshori shomaya futsanri Pedro fuchishon ato yoini, —Na nocofunufin Jesús Nazaret anoa fu imisiquin, —ishon yoiaiton.

<sup>72</sup>Afanan Pedronun yoini, —Ma. Min yoiai cuscafin Diosin tapiaquin uncai na nocofunu oinmisimaran, —ishon yoini.

<sup>73</sup>Sama racatan afu niafoan Pedro yoinifo, —Icon. Minfin mirifi Galilea anoaquin. Min tsainhuunshon non mia onanran, —ishon yoiaifoan.

<sup>74</sup>Afanan ato yoini, —Uncai mato paratiroma. Diosin ua oin. Un chanicun Diosin ua chii uru muran potatiro. Nantonfin tapiaquin un mato icocoin yoiaiton. Ascan uncai na nocofunu Jesús oinmisimaran, —ishon Pedronun afanan ato yoini. Ascaino samamashta tacara cuoni. <sup>75</sup>Tacara cuoaino Jesús yoia cuscan Pedronun shinantani. —Pedron un mia yoi. Na yamutan tacara

cuoatama min ato yoiqui rafu non fusti huai, “Un Jesús oinmisimaran,” —ishon Jesús yoia cuscan shinantani chifi caashu Pedro fasi uaini.

### Pilato ano Jesús iyonifo

*Mr 15.1; Lc 23.1-2; Jn 18.28-32*

**27** <sup>1</sup>Ascaino funamanrishta nocon niaifofoan shinanpainifo, —Ahuuscashomain non Jesús rutumatiroquin, —icashu yoinannifo. <sup>2</sup>Ascatan munushcashon nan Romanon niaifofoan ahuun anu Pilato ano Jesús iyonifo.

### Judas nani cuscan

<sup>3</sup>Asca huashon Judaspan Jesús rutuaifofoan nicaquin fasi shinanni. —iOhua! Un Jesús ato achimanama shara icuanaran, —ishon shinanni. Ascashu nocon yorafohuunshon Dios cufimisi niaifofo yafi Dios fu tsainti pushu niaifofo ano cani treinta toro paratamacoin ahuun pui nuua ato nasoin cai. Ascacainicashon ato yoini. <sup>4</sup>—Unfin chaca huaquin. Jesuscai ahua chaca huayamafiamisicun un ato parashon achimanaran, —ishon ato yoiaiton. Cumanifo, —Ahuuscaquitsi min noco anori yoiyoa. Noncai ascara tapipaima. Mififin min shinanquin, —huaifofoan. <sup>5</sup>Nicaquin nan Dios fu tsainti pushu muranshon ato naman torofo saafaini caashu afiri rusfipan tunushumuacucahuatan nani.

<sup>6</sup>Asca huatan Judas cai cachiori niaifofoan nan torofo topinifo. Ascashu niaifofo afi ranan yoinannifo, —Nocon shunifofoan yononi cuscan non ahuun rafanan yora rutumana nan puicai non Dios fu tsainti pushu muran huatiroma. Nan pui huati murancai non huatiroma. <sup>7</sup>Na torofohuunshon nan cuti huamisi ahuun mai non finon. Nanno yora futsafo non mai huanon, —icashu

yoinannifo. <sup>8</sup>Ascasho nan mai anunifo —Imi maiiran, —huanifo. Natianri nannori yoirafo. <sup>9-10</sup>Ascano nan Diosin tsain yoimisi Jeremías inon pacoai cununi cuscan natian man nanscacoan huaafo. Isca huaquin cununi,

“Israelifoan yoinifo, ‘Non treinta toro inantiro nan nocofunun noco achimashocun,’ ishon yoirafo. Nan torofohuunshon cuti huamisiton ahuun mai fiafo. Uhuun Ifoan ua yononi cuscan un cuti huamisiton ahuun mai fia. Nanscarifi aqui nanfoanrifi aton torofohuunshon cuti huamisiton ahuun mai fiaforan,”

ishon Jeremías cununi.

### Pilato ano Jesús iyonifo

*Mr 15.2-5; Lc 23.3-5; Jn 18.33-38*

<sup>11</sup>Ascashu Romanon niaifofoan ahuun anu Pilato fu Jesús nia ini. Nan niaifofoan Jesús yocani, —¿Minmun Judiofoan niaifocoin? —ishon yocaiton. —Nan min ua yoiyai cuscafin unquin, —Jesús huani. <sup>12</sup>Ascashon nocon yorafohuunshon Dios cufimisi niaifofo yafi Dios fu tsainti pushu niaifofoanri Jesús ahuaara chaca huamisiran huafiaifoannocai puusinima. <sup>13</sup>Ascaiton Pilato yoini, —¿Yorafhoan mia chaca huaifo cuscan min nicaimamun? ¿Min ato cumapaimamun? —ishon yoini. <sup>14</sup>Asca huafiaitocai Jesús cumanima. Tsain ichapa aqui chaca huafiaifoanricai fustishta ato cumanima. Ascaiton Pilaton ahuun nomuran shinanni, —iAira! ¿Ahuuscai ato cumapaimamun? —ishon shinanni.

### Niaifofoan ato yononi Jesús rutunonfo

*Mr 15.6-20; Lc 23.13-25; Jn 18.38-19.16*

<sup>15</sup>Nan fusititian faritifi a cunu muran iquiafo fusti caimaquin Pilato ato yocapaoni. —¿Ratocai man

caimapaemun? —ishon yorafo yocapaoni. <sup>16</sup>Nantianri cunu muran iquia nocofunu fasi pofu rutumitsamisi. Ahuun anu Barrabás ini. <sup>17-18</sup>Jesús ahua chaca huaiyamafiacun. A icai cuscan apaicaquin nocon niaifofo Jesusqui sinacaquin Pilato ano iyonifo. Nan acaifo cuscan Pilato man tapian ini. Ascacun Pilato nanno yora ichananfo yocani, —¿Ratocaimun un mato cainmashotioquin? ¿Barrabás iyamarai Jesús nan Cristo Diosin catoanran man huamisi? —ishon ato yocaiton. <sup>19</sup>Ato yocatan tsaoshon manani cumaifoan nicapaiquin. Ascaino ahuinin cunu fuma aqui noconi. Cunun yoiqui isca huani, —Nan nocofunu Jesús shara. Ahua chaca huamaquin. Ahuusca huayamahuu. Uhuun namapan un oian ahua chaca huayamafiashu omitsiscaiton oin urifi uhuun nomuran ahunoashu un omitsiscacoinna. Ascacun ahuusca huayamahuu, —ishon Pilato ahuinin cunushoni.

<sup>20</sup>Ascafiacun nocon yorafohuunshon Dios cufimisi niaifofo yafi Dios fu tsainti pushu cushumisifoan nanno ichananfo ato yosiquin isca huanifo, —Jesús noco cainmashotamarocon Barrabás noco cainmashohuun. Ascashon Jesús rutuhuu ishon Pilato yoicahuun, —ishon ato yononifo.

<sup>21</sup>Ascacun Pilato ato yocani, —¿Nan rafu ratocaimun man fuchipaiquin un mato caimashonon? —ishon ato yocaiton. “Barrabasquian,” huaifoan. <sup>22</sup>—¿Un Barrabás caimashomun un Jesús nan Cristo Diosin catoan un ahuusca huaicai? —ishon ato yocaiton. Afanan nantifiton yoinifo, —Mastahuun, nanon, —huaifoan.

<sup>23</sup>Ascaifoan Pilato ato cumani, —¿Ahuuscacufin? ¿Ahuamun chaca huaquin? —ishon ato yoiaiton. Ascafia fasi curushcain yoirianifo, —Mastahuun, nariscanon, —huanifo.

<sup>24</sup>Ascaiton Pilato oian tsoan nicapaitama fasiocon mucai finaifoan. Masu fitan aton ointaifi muchoquimuni. Muchoqueimutan ato yoini, —iOincapon! Uhuun nuama. Un Jesús cainmapaifiainocai man cainmapaima. Manrocon fasi rutupai. Ascan matohuunfi nuuquin, —ishon ato yoiaiton. <sup>25</sup>Nantififain cumanifo, —Nansanon. A nai nocohuun nuononquin. Nocon facufohuunri nuunon, —ishon yoinifo.

<sup>26</sup>Ascaifoan nicaquin Pilato Barrabás ato cainmashoni. Ascashon ahuun ranushumuafu yononcun fichi cunoqui tuchiaton Jesús coshaqui futsanifo. Asca huashon mastanonfo iyonifo. <sup>27</sup>Nan ranushumuafu Jesús iyoafu anofin niaifoan ahuun pushu iniquin. Ascano nan niaifo cushumisifoan ranushumuafu chifinoafu cunani Jesús oin funonfo. <sup>28</sup>Ascashon ahuun sahuuti shorifain futsa shonan sahuumanifo. <sup>29</sup>Ascatan mosha chainipafo maiti huashon maimafain poquiti ahuun mumihuuri tsomamashon ratoconun mai chachishon yoinifo, —iAicho! Minfin Judiofoan aton niaifoquin, —ishon cashu mutsama huanifo. <sup>30</sup>Ascashon aqui cumo michofain ahuun poquiti fiantan ahuun coshapacunifo. <sup>31</sup>Ascashofin cashu mutsama huacatan nan sahuuti shonan pucashon ahuun sahuuticoin afanan sahuumanifo. Asca huatan mastai focaquin iyonifo.

### Jesús ihui coyan iquinanqui mastanifo

*Mr 15.21-32; Lc 23.26-43; Jn 19.17-27*

<sup>32</sup>Focani nan nocofunu Simonqui noconifo. Nan Simonfin Cirene anoashu cainniquin. Ascan nan ranushumuaton yononi. —Ihui coyan iquinan noco foshoicahuun, —ishon iyamafainifo. <sup>33</sup>Gólgota ano fonifo. Gólgota yoia mapo shao. <sup>34</sup>Nanno nococashon Jesús

fimi unu pau tashipia osia  
ayamapaiyaifoan muutacai Jesús  
apainima. <sup>35</sup>Asca huatan Jesús  
iyocashon mastanifo. Mastacatan ahuun  
sahuuti fianpacunifo. Toquiri tocoro  
rafuya cashuqui nan finonmanaton  
ahuun sahuuti fiqiu tau huani. Ascashon  
cuyonfianifo. <sup>36</sup>Asca huatan tsocashon  
a Jesús mastafo foisnifo.

<sup>37</sup>Ascano man ihui coyan iquinanqui  
mastacashon amanaonri cununifo isca  
huaquin,

NAN JESUSFIN ISRAELIFOAN ATON  
NIAIFOCOINQUIN

ishon cununifo. Nannori Jesús icaran  
ishon mastanifo. <sup>38</sup>Ascashon yomutso  
rafuri mastanifo. Ocuma futsa futsafain  
ocuma futsa futsa anifo. <sup>39-40</sup>Ascashon  
camacaquin isca huanifo, —iCuu!  
Minfin yoimisiquin nocon Dios fu tsainti  
pushu min choquiagai. Ascatan osha  
rafu non fustitan min afanan futsa  
huairan min imisi. Mifin numatan ihui  
coyan iquinanmaquinoashu fotohuu.  
Min Diospan facumainquin, —ishon  
roanifo.

<sup>41</sup>Nannori nocon yorafohuunshon  
Dios cufimisi niaifofo yafi Dios fu tsainti  
pushu cushumisifo futan Moisés cununi  
cuscan tapimamisifoan Jesusqui  
cashumutsamanifo. <sup>42</sup>Ascashon yoinifo,  
—Nanton futsafo numafiatiroshaquin  
aficai numatiroma. Ascan minmain  
Israelifoan aton niaifoquin ihui coyan  
iquinanmaquinoashu fotohuu. Min  
ascaiton oinquin non mia icoinra  
huaicain, —ishon roanifo. <sup>43</sup>Ascasho  
niaifofoan nanno niafo ato yoinifo isca  
huaquin, —Jesús noco yoimisi, “Unfin  
Diospan facuqui,” ishon noco yoimisi.  
Nantofin Dios icoinra huamisiquin.  
Ascan Upa Diosin a fuchipaiquifin  
numatiroquin, —ishon aqui tsain chaca  
huanifo. <sup>44</sup>Ascano afu masta rafutan  
aqui tsain chaca huacaqui roanifo.

### Jesús nani cuscan

*Mr 15.33-41; Lc 23.44-49; Jn 19.28-30*

<sup>45</sup>Ascano fari masafinin racafishu  
nan maitio faquishpacucahuani.  
Ascashu man fari caino afanan shafani.

<sup>46</sup>Ascaino nantianri Jesús fasi oi  
ashcafinin apa cunani, —*¿Elí, Elí lema  
sabactani?* —nan yoipai, —*¿Uhuun  
Diosin, Uhuun Diosin, ahuuscai mian  
potamun?* —huani.

<sup>47</sup>Jesús ascaiton yorafoan mapo  
cashion nicacaquin yoinifo,  
—Nicacapon. Elías cunaiton, —huanifo.

<sup>48</sup>Ascaino futsa ichoni fimi unu focash  
muran mishan nanupacufoantan faca  
tahua shatun mishan tunhuuinfoan  
Jesús inanpaiquin. <sup>49</sup>Inanpaiyaiton  
atirifoan yoinifo, —Unuhuu. Elías  
oshomain fotomaicai non oinon,  
—huanifo.

<sup>50</sup>Ascano Jesús fasi fiisinacahuani.  
Fiisinacahuatan naani.

<sup>51</sup>Ascashu Jesús natapaiyaino a  
Judiofoan Dios fu tsainti pushu  
murannoa pano puta pochimua aficoin  
fashnupacucahuani. Nanscatapaiyaino  
mai nayanaiyainquin. Toquirininhuanfo  
torufafaini. <sup>52-53</sup>Ascaino nan Diospan  
yorafo naacun mahua quini muran mai  
huanifo. Nan toquirinin huafo fupucui  
futsuaino Diosin afanan ato nimani.  
Ascashu Jesús funiaitian nanfori nan  
mahua quini murannoashu Jerusalén  
muran iquinfo. Ascaiton nanao yora  
ichapafoan oinnifo.

<sup>54</sup>Ascaino ranushumua niaifo yafi a  
futan Jesús cushuafoan mai  
naiyanaiyaicaino ahuara futsafori  
ahuascaraiton oincani fasi  
ratucoincaquin yoinifo, —Iconfinquin.  
Nanfin Diospan facuquin, —ishon  
yoinifo.

<sup>55-56</sup>Ascaiton nannoshon ainfo  
ichapafoan chaicushon oinnifo. Nan

María Magdalena non María futsa nan Santiago futan José ahua non Zebedeo facufoan aton ahuari. Nantifi nan ainfofo Galilea anoashu Jesús fu foanfainmisifoan nan apaiyaifo cuscan ato huashomisifo.

**Jesús mai huani**

*Mr 15.42-47; Lc 23.50-56; Jn 19.38-42*

<sup>57</sup>Ascatan man fari caino nocofunu ahuashta yopatanaima ahuun anu José nan Arimatea anoashu cainni. Nantorifi Jesús tanamisi sharacoin ini. <sup>58</sup>Nan José niaifo Pilato ano cashon yoiquin isca huani, —Niaifon, un Jesús toquirininhuan quini muran mai huapai. Un mia yocayoaran, —ishon yoini. Ascaiton, —Jesús ahuun caya José inancahuun, —ishon Pilato yononi. <sup>59</sup>Ascaiton José Jesús ahuun caya pano oshopa sharacoinchi raconi. <sup>60</sup>Racoshon toquirininhuan quini muran Jesús mai huani. A murancai tsoa maiyomisima muran mai huani. Ascashon toquirininhuanun fupofaini cani. <sup>61</sup>Nannoshori María Magdalena futan María futsan tsaoshon oinnifo.

**Ranushumuafoan nan mahua quini ano cushunifo**

<sup>62</sup>Iyoconaino tunutitian yorafohuunshon Dios cufimisi niaifofo yafi Fariseofo Pilatoqui fonifo. <sup>63</sup>Focashon yoinifo, —Niashu nan Jesús chanishunin yoimisi, “Un naashu osha rafu non fustitan un afanan funitiroran,” imisi. <sup>64</sup>Ascacun min ranushumuafo a maia toquirininhuan quini ano ato nichihuun cushunonfo. Min asca huaiyamaitofin afu rafuafoan ahuun caya onui futirofoquin. “Man funiaran,” icashu chanishcaquin. Jesús chani tauyomisi. Ascan chipocafin fasi chani finacointirofoquin, —huaifoan. <sup>65</sup>Pilato ato yoini, —Manfin mato Dios fu tsainti

pushu murannoa maton ranushumuafo a toquirininhuan quini ano ato nichicahuun cushutanonfo, —ishon ato yoini. <sup>66</sup>Ascaiton a toquirininhuan quini ano ranushumuafo nichinifo. Nanfoan toquirininhuan sapa tocoro fuposhon ahuaara tuipaton tanyacunifo. Ranushumuafo nanno nichifurani funifo nannoshon cushunonfo.

**Jesús funini cuscan**

*Mr 16.1-8; Lc 24.1-12; Jn 20.1-10*

**28** <sup>1</sup>Ascano Israelifoan noco tunutitian nan Domingo anaitia iyoconaino nan maia ano oin focani fonifo. <sup>2</sup>Ascaino nantianri mai fasi curushcain nayanaiyaicaino nocon Ifo Diosin ahuun oinmati afu icafo nai ariashu fotoni. Fototan toquirininhuan fuputan acamaqui tsaoni. <sup>3</sup>Ascaino ahuun fuso fasi chashacoinni. Naan canan facaica ointsa. Ahuun sahuutiri fasi oshopa yoa rama furoa ointsa. <sup>4</sup>Ascaiton oincani ranushumuafo fasi ratui tari taricani aton ratupasi nayonifo. Nan naa shinantsa anifo.

<sup>5-6</sup>Ascaiton Diospan oinmatinin afu nai muran icaton María rafu yoini, —Ratuyamacahuun. Mun tapia man Jesús funai yoa. Jesús man mastafiaitafo natian nunoma. Mato yoimisi cuscan man funia. Oin fucapon quini muran. Nan racaitano. <sup>7</sup>Ascashon afu rafuafo ato yoiriscatacahuun, “Jesús naafiaitashaqui man funiaquin. Galilea ano cai tauciai anoshon mato manashqui. Nannoshon man ointiro.” Un mato yoiyai cuscan ato yoiriscatacahuun, —ishon Diosin nai oinmatinin ainfo rafu yoini.

<sup>8</sup>Ascaiton nicatan nan ainfo rafu toquirininhuan quini anoashu ichonifo. Ratufiacani aton nomuran fasi unimacoincaquin afu rafuafo yoi focani ichonifo. <sup>9</sup>Ichaoifoanno Jesús atoqui

niriscatani. Ascashon, —Mun moiyyaran, —ishon ato yoini. Ascaiton nan ainfo rafutan taicopacufoantan, —Min nocon Iforan —huaifoan.

<sup>10</sup>—Ratuyamacahuun. Ascataमारोcon uhuun ushtofu ua yoishotacahuun Galilea ano fononfo. Nannoshon ua oinshcaquin, —ishon ato Jesús yoini.

**Ranushumuafoan yorafo  
chani huani cuscan**

<sup>11</sup>Ascatan ainfofo Jesús anoashu foaifoanno ranushumuafori yorafohuunshon Dios cufimisi niaifofoqui nan oianfo cuscan atoqui chaninifo. <sup>12</sup>Ascaiton nicacani niaifofo ichanancashon shinannifo, —Nonmun ahuusca huaicai, —ishon. Ascashon ranushumuafo yoinifo, —Non mato yoiai cuscan nannoricoinrifi futsafo yoicahuun non mato pui ichapa inanon. <sup>13</sup>Ascacun ato yoiqui isca huatacahuun, “Jesús fu rafumisifoan non oshano fucashon Jesús ahuun caya man onuaforan,” ato huatacahuun. <sup>14</sup>Ascaiton niaifocoinin nicaquin Jesús ahuun caya anoma nicai raquirira icaiton non yoisharaicanon mato ahuusca huanonma, —ishon niaifofoan ranushumuafo yoinifo. <sup>15</sup>Ascashon ato pui inanfoanno focashon nan niaifofoan ato yoiafo cuscan

nannoricoin ato yoinifo. Ascaiton nan maifoti anoafo futan Israelifoan nicanifo. Ascano nantian icoinra huanifo ranushumuafoan ato yoiaifo cuscan nicacaquin.

**Jesús ahuun unutaqui a  
rafuafo yononi cuscan**

*Mr 16.14-18; Lc 24.36-49; Jn 20.19-23*

<sup>16</sup>Ascashu non afu rafuafo once nan Jesús noco yoia cuscan machi Galilea ano non cani. <sup>17</sup>Ascashon oinquin non yoini, —iAicho! Min nocon Ifo Jesús. Non mia fasi noiran, —ishon non yoini. Ascafiaitocai futsafoan icoinra huacuanima. <sup>18</sup>Ascano nocoqui chaimashta oshon noco yoini, —Uhuun Upa ua yonoa nantifi nai ariafu yafi mai anoafori un yononon. <sup>19</sup>Ascacun manifoti anoafo yoifoanfafaicahuun ua icoinra huafain ua tanasharanonfo. Uhuun Upa Diosin ahuun anuhuunshon yafi uhuun anuhuunshon non Diospan Yoshin Sharahuunshonri yorafo unu muran iquimashcaquin. <sup>20</sup>Ascashon nantifi un mato yonoa cuscan huafain yorafori yosicahuun icoinra huafain ua nicasharanonfo. Unfin matofu iquicai. Ascashu nan un afanan oaitian un mato furi ipanacaran, —ishon noco Jesús yoini. Nanti.